



石屏詩序

戴石屏之詩有樓攻媿先生之序文諸名公
鉅賢之品題不患不傳遠也趙懶菴爲選其
尤者別爲小集乃命僕爲此序無乃以非人
爲贅耶懶菴於詩少許可常陶之外雖輞川
柳州集猶有所擇今於石屏詩取至百三十
首非其機有契合者乎夫詩之傳非以能多
也以能精也精者不可多唐詩數百家精者
纔十數人就十數人中選其精者纔數十篇



而已惟少陵謫仙能多而能精故爲唐詩人
巨擘也蓋藝之難精者文也文之難精者詩
也運竒於斧鑿者少從容之態受成於材具
者希汲取之功豪逸者欠雋永慘淡者乏膾
炙取妍耳目者興未必高遠寄吟性情者詞
多至流宕凡是者皆詩之喻而駁者也石屏
之詩平而尚理工不求異雕鏤而氣全英後
而味遠玩之流麗而情不肆即之冲淡而語
多警懶菴之選其旨深矣雖然石屏自謂幼

幼孤失學胸中無千百字書強課吟筆如爲
商賈者乏資本終不能致竒貨也又言作詩
不可計遲速每一得句或經年而成篇僕曩
在贛見懶菴論作詩亦然二公契合之機
豈不 乎石屏其所居山也即之爲號其
名復古字式之天台人其姓字不待人拈出
也紹定二年三月浚儀趙汝騰序

石屏詩後集序

石屏戴式之以詩鳴海內餘四十年所蒐獵

點勘自周漢至今大編短什詭刻秘文遺事
度說凡可資以爲詩者何啻數百千家所游
歷登覽東吳浙西襄漢北淮南越凡喬嶽巨
浸靈洞玳苑空迥絕特之觀荒恠古僻之蹤
可以拓詩之景助詩之奇者周遭何啻數千
萬里所酬唱論訂或道義之師或文詞之宗
或勲庸之傑或表著郡邑之英或山林井巷
之秀或耕釣酒俠之遺凡以詩爲師友者何
啻數十百人是故其詩清苦而不困於瘦豐

融而不羨於俗豪健而不狡於麗閑放而不
流於漫古澹而不死於枯工巧而不露於斷
聞而爭傳讀而亟賞者何啻數百千篇蓋嘗
論詩之意義貴雅正氣象貴和平標韻貴高
逸趣味貴深遠才力貴雄渾音節貴婉暢若
石屏者度乎兼之矣豈非其搜攬於古今者
博耶豈非其陶寫於山水者奇耶豈非其磨
礱於師友者熟耶雖然此舊日石屏也今則
不類行年七十七矣焚香觀化付斷簡於埃

塵隱几閉關等一樓於宇宙離群絕侶對獨
影爲賓朋而時發於詩曠達而益工不勞思
而彌中的然則詩固自性情發石屏所造語
有在言語之外者非世俗所能測也淳祐三
年六月日荆溪吳子良序

唐人以詩名家者衆近時文士多而詩人少
文猶可以發身詩雖甚工反成屠龍之技苟
非深得其趣誰能好之黃岩戴君敏才獨能
以詩自適號東臯子不肯作舉子業終窮而

不悔且死一子方襁褓中語親友曰吾之病
革矣而子甚幼詩遂無傳乎爲之太息語不
及他與世異好乃如此子既長名曰復古字
式之或告以遺言收拾殘編僅存一二深切
痛之遂篤意古律雪巢林監廟景思竹隱徐
直院淵子皆丹丘名士俱從之遊講明白法
又登三山陸放翁之門而詩益進一日携大
編訪予且言吾以此傳父業然亦以此而窮
求一語以書其志余答之曰夫詩能窮人或

謂惟窮然後工笠澤之論李長古玉谿
甚悲也子惟能固窮則詩愈昌矣余之言固
何足爲軒輊邪嘗聞戴安道善琴二子勃顯
並受琴於父父沒所傳之聲不忍復奏乃各
造新弄廣陵止息之流皆與世異其孝固可
稱然似稍過果爾則琴亦當廢矣式之豈其
苗裔邪而能以詩承先志殆異於此東臯子
其不死矣嘉定三年歲未盡三日四明樓鑰
書于攻媿齋

石屏以詩鳴東南半天下其格律風韻之高
處見諸當世名公之所品題者不可以有加
矣况予他日未嘗學詩又安能措一詞第嘗
私竊評之古詩主乎理而石屏自理中得古
詩尚乎志而石屏自志中來古詩貴乎真而
石屏自真中發此三者皆其源流之深遠有
非他人之所及者理備於經經明則理明嘗
聞有語石屏以本朝詩不及唐者石屏謂不
然本朝詩出於經此人所未識而石屏獨心

知之故其爲詩正大醇雅多與理契志之所
至詩亦至焉石屏痛念其先君子平生不肯
作舉子業而顯以詩自適臨終以子在襁褓
而慮詩或遂無傳石屏長而有聞深切疚心
求以傳父業顯父名是其志也實繼父志也
故其爲詩感慨激發多與志應陶靖節言此
中有真意欲辨已忘言故讀書不求甚解黃
太史稱杜詩無一字無來處然杜無意用事
真意至而事自至耳黃有意用事未免少與

杜異不知四詩三百篇用何古人事若語我
石屏自謂少孤失學胸中無千百字書予謂
其非無書也殆不滯於書與不多用故事耳
有靖節之意焉果無古書則有真詩故其爲
詩自胸中流出多與真會三者備矣其源流
不其深遠矣乎故詩有近體有古體以他人
則近易工而不及古在石屏則古尤工而過
於近以此視彼其有效晚唐體如刻楮剪繒
粧點粘綴僅得一葉一花之近似而自耀以

為奇者予懼其猶黃鍾之於瓦釜也此子所
私竊自評者亦未始為石屏道今敢以是質
之請石屏自剖映予也奚敢妄為若是決淳祐
壬寅孟夏四日盱江包恢書于赤城皇華館
恢以卧疾未能自書不免令朋友代札
伏乞尊照恢皇恐申稟

戴石屏詩備衆體揅本朝前輩理致而守唐
入格律其用工深矣是豈一旦崛起而能哉
集首東臯子二詩雖斑駁不完而思致風骨

槩可想見此其源流也少陵之詩是固天授
神助而發源實自於審言審言之詩至少陵
而工石屏本之東臯又祖少陵雖欲不傳不
得而不傳少陵所謂詩是吾家事人傳世上
名者是也石屏與遊皆當世鴻儒鉅公精筆
妙墨極力模寫曾不盡其妙又假僕輩以為
置郵何邪若僕輩正有託於石屏者也端平
甲午十月既望東平趙以夫書

式之與蹈中第齊年而又俱喜為詩式之謂

蹈中有高鑒盡出其平生所作使之擇焉得
百餘首此編是也余讀之竟見式之才果清
放弟識亦甚精到皆非朽拙所能逮者然式
之老益窮奔走衣食四方猶未得歸休于家
而蹈中則下世踰年矣自古文士徃徃困躓
其稍幸稱遂者天輒不假之年蓋存歿俱可
哀也余暇復論詩哉姑命錄藏而歸其本式
之且題其後以致余歎惜云甲申歲夏浚儀
趙汝談

戴君詩句高處不減孟浩然子叨金鑾夜直
顧不能邀入殿廬中使一見天子子之媿多
矣嘉定甲戌月日建安真德秀書

近世以詩鳴者多學晚唐致思婉巧起人耳
自然終乏實用所謂言之者無罪聞之者足
以戒要不專在風雲月露間也式之獨知之
長篇短章隱然有江湖廊廟之憂雖詆時忌
忤達官弗顧也猶每以不讀書爲恨予曰平
生不識字把筆學吟詩非常蘇州之言乎蘇

州興寄冲逸遠追陶謝頌不識字邪蘇州且不識字式之亦何必讀書哉端平甲午良月初吉潛齋王埜子文

作詩難選詩尤難多愛則泛過遴則遺逸懶菴爲石屏戴式之摘取百餘篇兼備衆體精矣章泉所拈出則其尤精而汰者也然滌指知龜美窺管識豹斑愛式之詩者讀此足矣式之方盡屏世學坐進此道發其英華見於章什必當方駕李杜深入陶柳得天之趣侷

神之工回視舊編遂成組繡余未老尚及見之壽峯倪祖義書于西江談笑堂

學詩者莫不以杜爲師然能如師者鮮矣句或有似之而篇之全似者絕難得陳後山寄外舅郭大夫巴蜀通歸使妻孥且定居深知報消息不忍問何如身健何妨遠情親未肯踈功名欺老病淚盡數行書此陳之全篇似杜者也戴式之亦有思家用陳韻云湖海三年客妻孥四壁居飢寒應不免疾病又何如

日夜思歸切平生作計踈愁來仍酒醒不忍
讀家書此式之全篇似陳者也蹈中所選乃
不在數何耶趙蕃

詩盛於唐極盛於開元天寶間昭僖以後則
氣索矣世變使然可與識者道也式之詩天
然不費斧鑿處大似高三十五輩使生遇少
陵亦將有佳句法如何之間晚唐諸子當讓
一頭紹定六年三月廿四日剡姚鏞

石屏南歸過僕於渝江尉舍出示雪蓬姚公

所選四葉下卷僕永歌不足併入梓呂全其
壁端平丙申九月十月月洲李賈友山敬識
乾道間東臯子以詩鳴式之幼孤壯乃能承
其家余頃于都中嘗見江西胡都司揚監丞
皆甚稱其詩蓋二公導誠齋宗派不輕許與
別去踰三年矣一日忽見過於武川村舍神
出近作一編款論終日余爲之廢睡挑燈熟
讀仍爲摘句猶未能盡大抵唐律尤工務新
奇而就帖妥道路江湖間尤多語意之合讀

之使人不厭余益老矣不復能進矣倘未委
土壤尚及見君凌厲斯世捫參歷井橫翔而
傑出也東坡云詩非甚習不能工余謂如登
羊腸之坂中間無地駐足不進即退雖有過
人之才可不勉哉嘉定七年正月甲戌栗齋
輩豐

陶元亮責子不好紙筆杜子美喜其子新知
句律詩人眷眷於傳業如此式之再世昌其
詩東臯子可無憾矣甲戌冬子墨眉山楊汝明

書于道山堂

式之以詩鳴江湖間垂五十年多識前輩晚
乃與余爲忘年友余既流放式之由閩嶠度
梅嶺涉西江吊余於衡嶽之陽此意古矣觀
近作一編其於朋友故舊之情每惓惓不能
忘至於傷時憂國耿耿寸心甚矣其似少陵
也忠義根於天資學問培於諸老故其發見
非直爲言句而已式之復俾銓次不敢辭得
六十篇爲第四藁下且劾李友山摘竒左

方端平三年歲在丙申五月丁卯刻人姚鏞
戴式之嘗見夕照映山峯巒重疊得句云夕
陽山外山自以爲竒欲以塵世夢中夢對之
而不愜意後行村中春雨方霽行潦縱橫得
春水渡傍渡之句以對上下始相稱然須實
歷此境方見其竒妙歸田詩話

復古之作如曲沼方塘鷓鴣鷓鴣徊翔出沒
亦足賞者松石軒詩評

題式之詩卷後

南豐曾極景建

鸞江江上路尚記昔年遊
文客誰青眼苦吟君
白頭塵沙投馬蓋
風雪弊貂裘百首詩情
揀親逢趙倚樓

月洲李賈友山

矯首天地間
妻其望終古前輩文
零落斯文日榛莽
戴君天台秀忽向南方來
老氣橫九川胸次何崔嵬
藻晚更可崩騰豁高趣疑
是赤城霞飄飄隋上章句白首一孤劍誰人薦
子虛有時杯酒間
高論傾淮湖既有四海名

何慚萬鍾樂君看榮與賤千載俱冥漠

豫章李義山

老氣棱棱未易攀
誼襟凜凜可廉頑
瘦筇只在江湖上
詩卷旁行天地間
杜雨風花春正好
酒壚山色夢相關
夔川已後花繩削
今度編成不要刪

方里趙希邁

曩從懶庵遊
輒道辛擇戴式之詩百篇
懶庵仙去今四年
式之忽持所擇詩來

過時余卧疾
展轉甦醒果知懶庵筆削
不輕而式之負名不虛也
因賦鄙語一章以贈

怕得公卿知姓名
扁舟棹月過湖城
卧聽盧葉頭添白
今到梅花語更清
拋却石田甘遠客
愛看山色每分程
如何亦肯敲寒屋
松火煎尔共短檠

同邑無逸林璧

少年曾讀石屏詩
老去江湖幸見之
百倍尋

常真足惜十存八九實堪悲哇嗚嗶噪人爭
羨天巧神功彼自知我欲流傳天下去爲求
完本補亡誰

懶庵趙蹈中寺丞作湘漕時爲僕選此詩凡
一百三十首觀者疑焉謂懶庵古詩得曹謝
常陶之體律則步驟杜工部其議論高絕一
世極靳於許可今所取此編何其泛也復古
議論斯語使有五字可存如崔信明楓落吳
江冷一句十字可存如杜荀鶴風暖鳥聲碎

日高花影重一聯足矣果何以多爲嘉定癸
未二月朔日復古書

復古以朋友縱吏收拾散藁得四百餘篇三
山趙茂實金華王无敬爲刪去其半各以入
其意者分爲兩帙江東繡衣袁蒙齋又就其
中摘取百首俾附于石屏小集之後明珠純
玉萬口稱好無可揀擇是爲至寶凡物之可
上可下隨人好惡而爲之去取者斷非奇貨
紹定壬辰仲夏復古自書

東臯子詩

黃巖戴敏敏才

小園

小園無事日徘徊。頻報家人送酒來。惜樹不
磨修月斧。愛花須築避風臺。引步渠水添池
滿。移箇柴門傍竹開。多謝有情雙白鷺。暫時
飛去又飛回。

屏上晚眺

不能騎馬趁朝班。自跨黃牛扣竹關。無德可

稱徒富貴有錢難買是清閑人行躑躅紅邊
路日落秣歸啼處山遙望蓬萊在何許扶桑
東畔白雲間

約黃董二親與桂堂諸姪避暑

世間無處避炎蒸欲叫西風叫不應恨之白
檀除熱惱心思赤脚踏層冰醉游河朔誰同
徯表借明光愧不能聞有山林最深處清涼
境界着高僧

樓上

終朝役役晚來閑識破浮生一夢間挈榼去
沽深巷酒倚樓貪看夕陽山月臨江館人橫
笛風摺蘆花鴈愛關堪羨漁翁無檢束扁舟
占斷白雲灣

西溪陳居士家

來訪西岩老家居水竹村紫麟遊鏡曲黃犢
卧雲根自惜好賓客相傳到了孫不行亭下
路護筍別開門

後浦園廬

卜築成佳致。幽棲樂聖時。何如謝公墅。畧似習家池。地暖梅開早。天寒酒熟遲。催租人去後。續得夜來詩。

鄭公家

門墻多古意。耕釣作生涯。菽米散魚子。蓮根接虎牙。弄孫時擲果。留客旋煎茶。頗動詩人興。滿園蒼麥花。

海上

萬頃鯨波朝日赤。滄洲四望無窮極。海山何

處是蓬萊。遍問漁翁都不識。

觀梅

三杯煖寒酒。一榻竹亭前。爲愛梅花月。終宵不肯眠。

趙十朋夫人挽章

縫掖先生遊汗漫。夫人高節獨青青。臨行抖擻空書笥。分付諸郎各一經。

此詩有五絕。吟藁零落。十朋先生黃岩前輩行誼甚高。嘗有詩云。數放豚犬粗。

知書二頃良田樂有餘杜酒三盃棊一局客來渾不問親踈梅溪先生尊敬之有杜酒三盃棊一局王十朋如趙十朋之句

右先人十詩先人諱敏字敏才號東臯子平生酷好吟身後遺藁不存徐直院淵子竹隱先生常誦其小園一篇及日落秣歸啼處山一聯續加搜訪共得此十篇復古孤幼無知使先人篇章零落名亦不顯亦

孝之罪不可贖也謹錄於石屏詩藁之前庶幾使人獲見一斑復古忍泣敬書

石屏戴叟以詩行四方名人鉅公皆樂與之遊者有忠益而無諂求有謙和而無誕傲所至怡怡如也歲紹定之己丑叟來閩中携其先人遺藁僅一篇一聯耳俾予題其後予已竊敬其事後十三年叟以書來則又得十餘首與叟近詩合爲卷矣嗟乎叟於其先人之片言隻字訪求甚苦老而益切惟恐失墜其

心將見之何哉唐杜氏世爲詩至子美一飯
不忘君可謂忠矣若叟之一語不敢忘其父
可謂孝矣是皆出於天性且不自負其所學予
故表之以爲知本者勸讀其詩者當有取於
斯淳祐四年甲辰歲九月癸卯永嘉陳昉書
于都官卽舍

物以忘爲適腰適於帶足適於屨忘故也東
皐子一生嗜詩工造妙境而吟藁不存膾炙
而傳者僅十首是真能忘於詩而適其所適
者也則其人之蕭散洒落可想像見豈比夫
世之刻削嚼啗於一聯半句間沾沾自喜期
以術能誇富者哉石屏以篇章零落不顯爲
恨人子之情然耳似非東皐子志也淳祐甲
辰中夏望日東平趙以夫跋

詩和則歡適雄則偉麗新則清拔遠則閒暇
東皐子詩云小園無事日徘徊頻報家人送
酒來歡適也惜樹不磨修月斧愛花須築避
風臺偉麗也引夢渠水添池滿移箇柴門傍

竹開清拔也多謝有情雙白鷺暫時飛去又
飛回閒暇也備是四體一篇足矣况鶴鳴子
和清唳方徹九臯邪寶慶丁亥長至前二日
吳興倪祖義書

石屏詩集目錄

天台戴復古式之詩

浚儀趙汝鐙蹈中

剡中姚鏞希聲

四明袁甫廣微

小山蕭泰來學易

昭武李賈友山選

近古體九十一首

五言律四百十首

七言律二百十首

絕句一百三十首

詞二十五首共八百九十一首

卷上

近古體

求先人墨迹

夢中亦後後

飲馬長城窟

白苧歌

羅敷詞

題陳毅甫家壁

荅婦詞

都中書懷呈滕秘監

湖北上吳勝之運使

桐廬舟中

所館小樓見山

客行河水東

和山谷古風見朝士

題崇和尚送青軒

大熱五首

園亭即事十首

題鄭玉軒詩卷

澣以秋蘭一盆爲供

和高常簿暮春

和鄭提舉見寄

送吳伯成歸建昌

謝包宏父三首

題蘇野塘畫

烏鹽角行

靈壁石歌爲方岩作

章泉二老歌

京口喜雨樓落成

和婦荅夫二首

栗齋以元結文集爲韻

杜甫祠

阿奇醉日

琵琶行

畫水呈王使君

南嶽

送來賓宰

題四祖山滎老月窟

出關

賦雲山燕居

玉華洞

祝二嚴

管仲登飲萬貢堂

急口令寄朝士

鳳鳴有吉凶

婕妤詞

江南新體

感寓四首

寄章泉趙昌父

頻酌淮河水

元宵雨

小孤山阻風寄西山

松江舟中四首

趙郎中示四老飲圖

宋正甫湖山清隱

會稽山中

高九萬示落星長句

李伯時村田樂圖

見真舍人奏疏有感

春郊牧養圖二首

鄂州南樓

題飛龍飲秣圖

儒衣陳贈畫

黃州棲霞樓即景

題上虞縣信芳堂

跋衡山何道士詩

徐通判晚歲得子

寄報恩長老

織婦歎

刈麥行

鄂渚送別

詰燕

寄趙鼎臣

畫龍

漁父詞二首

五言律

秋懷

晚春次韻

元日二首呈劉叔治

宿農家

湘中

水陸寺

題分宜縣呈石子和

清明感傷

都中書懷二首

歲暮呈真翰林

游天竺

盧申之正字小酌

鳳凰臺

山中即事二首

題徐京伯北征詩卷

江上

春盡日

賢女祠

寄鞏仲至

次韻史景均望雪夜

春日懷家

寄沈荥可

山行

題南康縣劉清老園

淮上春日

麻城道中

望花山張老家

春日

聞李全至建康

江漲

上喬右司

贈郭道人

送趙蹈中移憲江東

立春後二首

寄韓仲止

題張簽判園林

哭趙紫芝

何宏甫載酒過清江

新歲呈王監簿

訪楊伯子監丞

慧力寺避暑

秋夜旅中

舟行往吊故人

擬峴臺

無策

題萍山何叔萬雲山

訪許介之途中即景

建昌道上

訪嚴坦叔

杜仲高下儀真

見趙知道運使

趙叔崖山堂安下

黃道士出文

陳伯可山亭

趙昌甫遷居章泉

題永州思范堂

舟中病起登覽

合江亭分韻

見湖南憲陳益甫

南臺寺長老

真西山帥長沙禱雨

游大自在亭

客中寄家書

舟中夜坐

淮東趙漕宴客

沈莊可號菊花山人

別章泉定庵二老人

雪中簡段知縣

烹犢延客

萍鄉縣圃

書事

同趙鼎臣游清虛庵

同曾景建金陵登覽

遇淮人問靳黃之變

寄姚楚州

許介之約過清溪

送張子孟

南豐縣南臺

長沙道上

萍鄉客舍

無爲軍遇趙尉

譚俊明雪中見訪

新喻縣蘇晉叔相會

訪陳與機縣尉三首

訪曾魯叔僧設小供

觀靜江山水二首

題堞篁隱居圖

過三衢訪鄭監丞

題趙庶可山臺

叔宏伯厚載酒送別

贈張季治

姪淑遠遊不得書

寄梅屋趙季防

雨後有感

歸來二首

歸後問訊敷文四首

夢中得一聯足成

酬姪仲晦

一笑

寄趙茂實大著

送彭司戶之官三山

送姪孫汝自往東嘉

寄南昌故人

送趙安仁之官上虞

秋日

訪豈潛見鶴換翎

倚樓

戊戌冬

題豈潛家平遠圖

夏日續題

寄故人兼簡王帥

舟中

送夏肯甫入京

辛丑歲暮

小畦

有感

次韻叔強見寄二首

一冬無雨雪有雷

歲旦族黨會拜

寄節齋陳寺丞

姪孫子淵新居落成

子淵送牡丹

寄山臺趙庶可

晚春

賀姪孫景文得男

屏上懷伯高兄弟

己亥旱庚子麥熟喜

歲不聊生

庚子荐饑六首

歲旦謝送酒

東池隱居小集

次韻君玉春日

寄韓右司趙寺簿三首

月夜懷董叔宏

題林逢吉軒壁

題姪孫子直西閣

與諸姪登白峯觀

羅漢寺省王總幹墓

解后樂清姜主簿

鴈山總題二首

會心

大龍湫

靈峯靈巖

淨明

題胡立方思齋

張子明索賦永齋詩

謝項子宜帥幹遣饋

題昺姪東塾農歌

覽鏡有感

歲暮書懷三首

壬寅除夜

癸卯歲旦

新年晴色可喜

讀三學上書論事二首

守江

送王仲彞宰瀏陽二首

送黎明府二首

訪西山王深道二首

讀王子文詩文有感 挽丁竹坡

廣東漕李實夫四首 求安

秋日早行 何季臯司理

石洲遇陳季申話舊 廣州所見

書事 別李司直蕭小山

峽山二首 舟行和許季如詩

重陽舟中 陳秘書家有感二首

聞時事 送簞劉使君

懷江村何宏甫 投江西魯憲二首

臨江小泊 寄鄭潤甫提幹

趙丞話舊 謝蕭和伯見訪

廬陵城外 董侍郎蒙泉書院

叔震書堂 別董叔宏兄弟

聞邊事 宜春東湖呈趙使君

次韻叔宏山中有感 訪蒼山曾子實

事機 所聞

盜賊梗道二首 張端義謫曲江二首

聞杜儀甫出臺 朱行甫方巨山相訪

行甫送別烹鹿薦酒

題宋安撫月中香

訪方子萬使君

諸詩人會吳門

別邵武諸故人

老儒爲貴人燒丹而走

夜坐懷儀鄉友山

江上

簡曾才叔

舟中

題史賢良錦江詩卷

賢良和五篇不可及

彭時甫雪峯樓話舊

所聞

訪徐益夫

綠陰亭九日燕集

題蕭氏園亭三首

新朝士多故人

題何宏甫江村

卷下

夜吟呈趙東巖

陳萬卿著本草折衷

九月七日江上阻風

和前詩隣舟皆鹽商

有感

春陵山中作

夏日雨後登樓

見飛蝶

寄永嘉趙茂實二首

題蜀中山水障

次韻萬杉長老

借韻書懷

登快閣和韻

客中歲晚呈何宏甫

浼樓大卿作字

淮岸阻風

李丈解后游江上園

南康縣劉隱居

江臯

都下書懷

艤舟登滕王閣

湖口

從子淵借茉莉一盆

吳門訪舊

哭澗泉韓仲止二首

瑯琊山中廢寺

鄂州戎治靜懋亭

江上

游虎丘留題

光孝長老共談時事

杜仲高高九萬相會

衡陽寓懷

懷趙德行

上封

九日

春陵道上

化成巖

喜聞平峒寇

郭伯秀約春游不去

訪陳復齋于私第

衆南

代人送別

度淮

厲使君七夕祈雨

廬州界上寄豐帥

贈孤峯長老

吳子似

世事

冬日移舟入峽避風

湖上

廬陵城外

讀改元詔口號三首

罪言

李深道得蘇養直詩

秋興有感

謝王使君送旅費

舟中小酌

塗中見人家賣酒

長汀寄李使君

光澤溪上

約游西墅病不能去

趙敬賢送荔枝

回泉南主僕俱病

寄趙漳州話病

王堃使君平寇二首

新年自唱自和三首

聞嚴垣叔入朝二首

吾派衰落有感

王深道奏名而歸

朱仲寔官滿送行二首

次李君昉見寄二首

感寓三首

新歲書懷四首

小園

為石雲悼鶴

挽丞相杜公

送飛卿兼簡秋壑二首

晚望懷長沙故人

寄虛齋趙侍郎二首

謝深父作石屏記五首

寄趙用父侍郎二首

亦龍野亭五首

寄鎮江王子文總卿

又送行二首

送包使君入朝二首

送李明府赴太平

得古梅兩枝

爲何宏甫作

題徐子英小園

登祝融

長沙有感

山中少憇

真州上官漕勸農

豫章東湖避暑二首

見江東繡衣袁廣徵

洪大卿同登遠碧樓

濠州春日呈趙教授

訪古田劉無競

淮上回九江

送陳幼度運幹一首

燕

蘄口阻風務官點稅

郭外翁

鄭南夫雲林隱居

夢用父子文叔方相會

戲呈趙明府

訪曾雲巢

冬煖

許提幹湖上下築

見名園荒廢有感

題黃仲文雙清亭

孟運管招客話舊

買蠟

天竺訪明上座

度夏借東驛安下

挽趙縣尉

挽張統制

挽趙縣丞

挽項居士二首

挽姚祥叔

挽林詠道

挽黎顯謨開國三首

悼孫子神童三首

孫季蕃葬西湖上

櫻桃

題清江臺

夏旱得雨呈王監簿

二首

懷何宋甫

題董侍郎山園

蕭仲有遺經堂

讀嚴粲詩

春陵山中

淮上寄趙茂實

金山

焦山

梅花

赤壁

曾雲采

醉吟

次韻胡公權

同子順訪茅庵道人

羅立之酒邊舉數首

爲客

彭綉使平叛卒三首

會李擇之

道傍館

山中夜歸

題春山李基道小園

東軒

宿農家

寄耒陽令嚴坦叔

所聞

胡倅送羊烹以會客

寄清流王令君

生朝對雪

七言律

江濱曉步

鄂渚烟波亭

寄尋梅

元日上樓參政

春日二首呈黃子邁

釣臺

寄湖州楊伯子監丞

飲中達觀

梅

清涼寺有懷

覺慈寺

寄復齋陳寺丞二首

黃州偶成

題泉州王梅溪祠堂

無為山中鄭老家

南康縣用東坡韻

李季克侍郎舟中

湖南見真帥

潘仁叔再約觀梅

廬山四首

豫章東湖感舊

僮約

同鄭子野訪王隱居

夜宿田家

送蒙齋游天台二首

豫章巨浸呈陳提幹

訪趙東野

題方孚若淮南小山

漪嵐堂呈趙明府

春風亭分韻得塵字

送滕審言歸長沙

張仁仲水壺亭燕客

別後舟中用前韻

海月星天之觀

回杜子野贈詩

父兩得晴呈楊監丞

提刑彭仲節平叛卒

中秋李漕水壺燕集

李計使領客

菊坡崔叅政平叛卒

題處士黃公山居

題何季湧江亭

別鍾子洪

再賦惜別呈運使

蕭學易向季臯作別

靈洲

和送別韻

王使君領客湛泉

題鄒震甫江山偉觀

曾幼卿同游鳳山二首

撫州謝樓宗丞見訪

平江呈吳毅夫侍郎

見趙南仲侍郎

鎮江別總領吳道夫

董侍郎山園燕樓宗丞

聶侍郎飲中示書畫

思歸

送趙提舉入朝

長沙呈趙運使

山中見梅寄曾無疑

余惠叔訪舊

張丈相訪舞劍

朱淵出示廷對策

裘司直見訪留款

訪張元德

滕審言相遇話舊

孟參明子同遊麻姑山 興國軍晚春

朱司戶登滕王閣 元宵獻汪守二首

袁州化成巖 友松亭代松語

京口別石龜翁際司 讀放翁劔南詩草

古田行覽呈劉無競 諸葛丞極貧

萬安江上 過昭武訪李友山

李友山諸文留日父 飲中

陪徐淵子登白雪樓 酬靜齋張舍人

客游 都下書懷

新安寒食 烏聊山登覽

癖習 田園吟

九日登裴公亭 訪趙升卿

括蒼石門瀑布 杜門自遣

登快閣和山谷韻 滕王閣次韻劉允叔

竹洲諸姪小集 游雲溪二首

和高興權 懷姚希聲使君二首

豫章東湖酌別 懷徐淵子直院

人日 送劉鎮入京

會丁巖仲新樓

次韻杜運使見贈

訪漳州趙用父使君

見曾提刑兼安撫

思歸二首

登黃南恩南樓二首

山行遇秀痴翁

石亭野老家

讀王幼學上殿劄子

謝史石窓送酒并茶

閱舊稿見喬相詩跋

衡陽度歲

遇張韓伯說邊事

有議袁蒙齋者

醉吟

窓雲避暑

父客還鄉

聞時事

寄趙德行

到鄂渚

艤棹清江

萬安縣芙蓉峯

汪見可約游青原

除夜

黎明府約尋梅

宗裔求竹山詩二首

春日風雨中

寄吳明輔秘丞二首

靈洲梅花

寄廣西漕陳魯叟

王宣子上巳日會客

李革夫飲客西湘

李玉澗不赴召

寄撫州樓使君

江上

京口遇薛野鶴

題邵武熙春臺

秋日病餘

次韻王子文小園詠春

李華入閩討賊二首

海上魚西寺

詠梅校所知

甘窮
黃州竹樓呈謝國正

漢陽登覽呈王使君

簡陳叔方問病

鍾春伯園林

清明前夢得花字

題王制機池岩

訪慧林寺僧

陳潛西園賞海棠

王和甫卜地葬親

喜梅雨既晴

李司直客

一相識無辜獲罪

送黃教授之官章貢

家居復有江湖之興

題亡室真像

題趙忠定雪錦樓詩

陪厲寺丞賞芍藥

次王應求韻

郡圃寒食

杜冲高相遇約李尉

題蕭宰堂亭

陪虞使君登岳陽樓

贈洞霄道士

閱世二首

少筭

南康六老堂

韓張亭

處世

送別朱兼僉

題王制機新樓

王姚顯叔

題姚顯叔南嶼書院

寄朱仲是兼僉

寄宜甫兼簡韓右司

閱四家詩卷

謝吳秘丞序石屏集

有感

湘中

九日櫓洲舟中

曾景建得罪道州聽讀

朱行父留度歲

梅花

金陵游覽用子明韻

呈趙園令

吉州堆勝樓

九高亭小景

泉州紫極宮古檜

都中次韻申季山

上官節推同到浮光

贛州呈雪蓬姚使君

蕭節推衙宇一新

汪教授鳳山酌別

李伯高送鹽蟻子魚

癸巳端午呈李伯高

跋蘇養直深字韻

續祖妣題句

絕句

臘梅二首

汀州道上

題周仁甫古香堂

寄興二首

贈秀痴翁二首

江村晚眺二首

見山居可喜

初夏

桂

江陰淨遠堂

淮村兵後

盱眙北望

訪友人家即事

晚春

揚州端午呈趙帥

次韻郭子秀曉行

山村

題吳熙仲雲萍錄

湘中遇翁靈舒

客中秋晚

都中冬日

湖上

冬至

釣臺

端午豐提舉送酒

同上官節推登增勝樓

次韻梅花

醉麝

次韻盧申之野興

題謝深道國正山庵

題鄭子壽野趣

山中見梅

湘西寺觀瀾軒

道鄉臺

定王臺

陶侃栢

東池

寧鄉道上遇張伯聲

初夏遊張園

鄂渚解纜

別許季如

船過桐江懷郭聖與

篙子請占牌戲成

書事

綠陰亭四絕

次鄭東子見寄六首

寄後村劉潛夫三首

李漕石洲冰壺宴賞

登樓四首

寄上趙樞密二首

初夏

覓芍藥代簡宣潛

思歸

謝趙芾江携吟卷見過

得早梅一枝

巾子山翠微閣

贈饒叔虎

招山二首

李革夫被召二首

清明感傷

次韻李伯高

嶽市勝業寺悅亭

訪舊

代簡答夏肯夫

寄劉潛夫

周子益年八十赴歿

觀捕黃雀

九日

雪中觀梅

鄭子壽野趣

東湖看花呈宋原父

上清道院呈趙雪蓬

無題

到西昌呈愿父諸丈

入閩道中

儀卿友山與權酌別

李敷文酌別口占

李友山索詩卷

題牛圖

別黃希聲

林伯仁話別二絕

題陳景明梅廬三首

題蔡中卿青在堂

劉子及贈瑞桂

寄玉溪林逢吉六首

重陽

題梅嶺雲封四絕

戲題詩藁

論詩十絕

詞

望江南七首

錦帳春

醉落魄

柳稍青

行香子

木蘭花慢

鷓鴣天

浣溪沙

臨江仙

祝英臺

鷓鴣仙二首

大江西上曲

減字木蘭花三首

清平樂二首

醉太平

石屏目錄終




石屏詩集卷上

近古體

求先人墨迹呈表兄黃季文

我翁本詩仙游戲滄海上引手掣鯨鯢失脚隨塵
 網身窮道則腴年高氣彌壯平生無長物飲盡千
 斛釀傳家古錦囊自作金玉想篇章久零落人間
 眇餘響搜求二十年痛淚濕黃壤君家圖書府墨
 色照青嶂我翁有遺迹數紙古田樣髮髯鍾玉體
 吟句更豪放把玩竹林間寒風凜悽慘昂昂野鶴

NATIONAL CENTRAL LIBRARY, TAIWAN, R.O.C.



姿愧無中散狀兒孤襁褓中家風隨掃蕩於茲見
筆法可想翁無恙幽居寂寞鄉風月共來往衆醜
成獨妍群瘖恠孤唱一生既蹉跎人琴遂俱喪託
君名不朽斯文豈天相舊作忽新傳識者動慨賞
嗟予忝厥嗣朝夕愧俯仰敢墜顯揚思幽光發草
莽假此見諸公丐銘松栢壙君其啓惠心慰彼九
泉望

夢中亦役役

半夜群動息五更百夢殘天鷄啼一聲萬枕不遑

安一日一百刻能得幾刻閒當其閒時作夢更
多端窮者夢富貴達者夢神仙夢中亦役役人生
良鮮歡

飲馬長城窟

朔風凜高秋黑霧翳白日漢兵來伐胡飲馬長城
窟古來長城窟中有戰士骨骨久化為泉馬來喫
不得聞說華山陽水甘春草長

白苧歌

雪為緯玉為經一織三滌手織成一片冰清如夷

齊

一作齊美

可以為衣。陟彼西山，于以采薇。

黃玉林云：趙懶菴為戴石屏選詩百餘篇，南塘稱其識精到其間，白苧歌最古雅，語簡意深，今世難得所謂一不為少。

羅敷詞

妾本秦氏女，今春嫁王郎。夫家重蚕事，出採陌上桑。低枝採易殘，高枝手難扳。踏踏竹梯登，樹杪心思蠶。多苦葉少舉頭，桑枝掛鬢唇。轉身桑枝勾破裙，辛苦事蚕桑，實為良家人。使君奚所為，見妾駐

車輪。使君口有言，羅敷耳無聞。蚕饑，蚕饑采葉急歸。

題陳毅甫家壁

了翁之後也

朱門金叵羅，九醞葡萄酒。貴不酌，賤酌富不酌。貧君家破茅屋飄，搖河水濱中。有一樽，綠醉盡天下人。

答婦詞

舊嘗和顏序先婦答夫二首，故復賦此篇。

江山阻且長，矯首鄉關隔。空閨泣幼婦，顛顛失顏色。隱聞鶴鳴篇，寄彼西飛翼。剗封覽情素，既喜復

淒惻別時梅始花傷今食梅實覽古帝王州結交
游俠窟千金沽美酒一飲連十日春風吹酒醞始
知身是客杜宇啼一聲行人淚橫臆衣破誰與紉
髮垢孰與櫛勿謂遊子心而不念家室新交握臂
行肝膽猶楚越醜婦隔江山千里情弗絕慙慙揮
報章歸計何時決今夕知何夕覩此纖纖月此月
再圓時門前候歸一作轍車

都中書懷呈滕仁伯秘監

北風朝暮寒園林日蕭條自非松栢姿何葉不飄

搖儒衣歷多難陋巷困簞瓢無地可躬耕無才仕

王朝一餓驅我來騎驢吟灞橋通名丞相府數月

不見招欲登五侯門非皓齒細腰索米長安街滿

口讀詩騷時人試靜聽霜枝轉寒蠋倘可悅人耳

安望如蕭韶

桐廬舟中

吳山青未了桐江綠相迎扁舟問何之往訪嚴子

陵高風凜千古卧蹴萬乘主富貴直浮雲寒約

烟雨

湖北上吳勝之運使有感而言非詩也

蒼生積釁久天欲盡殺之干戈殺不盡繼以大旱
饑田野委餓孳道路紛流離衆人識天意不敢加
扶持公懷佛子性逆天救民命擅移太倉粟衆拂
生塵甑全活十萬家九州詠仁政逆天天弗怒鬼
神胡不怒白玉尚指瑕青蠅工點素秋風動蓴鱸
公亦思歸去問公歸去兮一作蒼生誰怙恃
所館小樓見山可喜一作恃怙

茲樓非我有久居如主人雖無往來客青山當佳

賓君看樓下路三尺軟紅塵失脚踏此塵淚流多
終身

客行河水東

客行河水東客行河水西客行河水南客行河水
北行行無已時朱顏變老色至人樓一方庭戶羅
八極保心如止水不受萬物役有道肥其軀故能
適所息

和山谷上東坡古風二首見一朝士今取一篇

自謂萬非奇貨強鳴非好聲法當老山林松根斷茯苓

苓謁來長安道霜鬢迫衰齡窮吟無知音祇覺太
瘦生公詩妙一世風雅見根蒂比興千萬篇一作已
作不朽計窮達雖不同嗜好迺相似一作斷

題古源崇和尚送青軒

南山色射窓北山光照戶道人處其中冰玉爲肺
腑茲山自開闢荒翳幾年所一朝得主人荆榛化
庭宇手披風月藏目極烟霞趣居然獲奇觀人境
賀相遇道人詩更高不作蔬筍語朝對北山吟暮
對南山賦聞說玉堂仙擊節賞佳句

大熱五首

天地一大窰陽炭烹六月萬物此陶鎔人何怨炎
熱君看百穀秋亦自暑中結田水沸如湯背汗濕
如潑農夫方夏耘安坐吾敢食

左手遮赤日右手招清風揮汗不能已扇笠競要
功南山龍吐雲騰騰滿虛空一雨變清涼萬物隨
疏通向人無德色大哉造化工

大渴遇甘井汲多井欲竭入喉化爲汗不救胸中
熱吾聞三危露迺與衆水別其色瑩琉璃其冷勝

水雪安得一杯來爲我解此渴

吾家老茅屋破漏尚可住門前五巨樟枝葉龍蛇舞半空隔天日六月不知暑西照坐東偏南薰開北戶胡爲捨是居受此炮炙苦

天嗔吾面白晒作鉄色深天能黑我面豈能黑我心我心有水雪不受暑氣侵推去北窓枕思鼓南風琴千古叫虞舜遺我以一作好音

父寓泉南待一故人消息桂隱諸葛如晦謂客舍不可住借一園亭安下即事凡有十首

寄跡小園中自笑客異鄉東家送檳榔西家送檳榔咀嚼唇齒赤亦能醉我腸南人敬愛客以此當茶湯慙慙謝其來此意不可忘

寄跡小園中豈不勝旅舍俗事無交加客身自閑暇鄰家有酒沽杯盤亦可借吟侶適相過新詩堪膾炙足以慰我懷留連日至夜

寄跡小園中數椽亦瀟灑主人既相知此地可久假縣官送月糧鄰翁供菜把咫尺是屠門亦有賣鮮者里巷通往來欲結雞豚社

寄跡小園中餘春接初夏問木木成陰問花花已
謝黃鸝出幽谷杜鵑叫長夜把酒酌園婆遠客此
稅駕有時吟聲高鬼神莫驚怕

寄跡小園中一心安淡薄每坐竹間亭不知近城
郭昨日看花開今日見花落靜中觀物化妙處在
一覺委身以順命無憂亦無樂

寄跡小園中第一薪水便逐一炊黃梁兼得魚蝦
賤飽飯日無營遮眼有書卷時逢好客來應接不
知倦最苦風雨時有人招夜宴

逐一疑作逐日

寄跡小園中新晴風日曩好鳥竹間鳴野鶴空中
唳悠然動詩興行吟撫松桂久客若忘歸此身笑
匏繫五月倘未行尚及食丹荔

寄跡小園中頗欲悶形影誰爲饒舌者太守忽相
請開心論時務細語及詩境坐中有蠻客狂言事
馳騁明日酒醒來熟思令人瘦

閱一作閑

寄跡小園中忽有烏衣至手中執圓封州府特遣
饋羅列滿吾前禮數頗周緻四隣來聚觀若有流
涎意呼童急開樽四隣同一醉

寄跡小園中倒指五十日既得故人書南游吾事
畢再拜謝主翁奉還此一室雲萍聚復散欲住
不得折柳當馬鞭明朝有行色

題鄭寧夫玉軒詩卷

良玉假雕琢好詩費吟哦詩句果如玉沈謝不足
多玉聲貴清越玉色愛純粹作詩亦如之要在工
夫至辨玉先辨石論詩先論格詩家體固多文章
有正脉細觀玉軒吟一生良苦心雕琢復雕琢片
玉萬黃金

澣以秋蘭一盆為供

吾兒來侍側供我一秋蘭蕭然出塵姿能禁風露
寒移根自巖壑歸我几案間養之以水石副之以
小山儼如對益友朝夕共盤桓清香可呼吸薰我
老肺腑不過十數根當作九畹看

和高常簿暮春

世變日以薄無從見雍熙閉門讀古書聊以道自
怡桃李春益益風雨秋淒淒於春何足喜於秋何
用悲人生一世間所忌立志卑終身有不遇千載

皆明時我生無所解肥遯滄海沂一朝遇名勝朽
骨生光輝歛杜贊明德非公誰與歸

和鄭潤甫提舉見寄

出門欲求仁取友必勝已寥寥雲海鄉所幸有君
爾胸蟠三萬卷智先三十里相與定詩盟誰能執
牛耳

長身如病鶴吟苦如蟋蟀顧此顛顛姿癡生年八
秩舉世皆好筆老夫方鼓瑟梅花莫笑人茅簷晏
朝日

送吳伯成歸建昌二首

此是包宋齋倅台時作癸卯夏

老夫脚病瘡閉門作僧夏麥麵不療饑冬衣猶未
卸喜讀吳融詩窮愁退三舍無因暗投壁有味倒
食蕪冥搜琢肺肝苦吟忘晝夜工夫到深處非王
亦非霸

吾友嚴華谷實為君里人多年入詩社錦囊貯清
新昨者袁蒙齋招為入幙賓千里有遇合隔牆不
見親君歸訪其家說我老病身別有千萬意付之
六六鱗

謝東侔包宏父三首癸卯夏

詩文雖兩途理義歸乎一風騷凡幾變晚唐諸子
出本朝師古學六經爲世用諸公相羽翼文章還
正統晦翁講道餘高吟復超絕巽巖許其詩鳳凰
飛處別

君家名父子爲晦翁嫡傳嘗見黃勉齋極口稱其
賢師友相琢磨南軒惜無年翁之爲汝翁文字相
周旋溟渤深見底泰華高及天宏齋有鳳髓可續
欲斷弦

平生不識字把筆學吟詩舊說常蘇州於余今見
之每遭饑寒厄出吐辛酸辭候虫鳴屋壁風蟬轉
枯枝但有可憐聲入耳終無竒宏齋誤題品恐貽
識者譏

題姚雪蓬使君所藏蘇野塘畫

高者爲山坳者爲壑爲烟爲雲渺沙漠漠水鳥樹
林人家聚落騎者何之舟者未泊三尺紙上萬象
交錯天機自然神驚鬼愕嗚呼此吾故人野塘蘇
元龍之墨迹中有石屏老淚痕又與野塘添一筆

烏益角行

鳳蕭鼉鼓龍鬚笛。夜宴華堂醉春色。艷歌妙舞蕩
人心。但有歡娛別無益。何如村落捲桐吹。能使時
人知稼穡。村南村北聲相續。青郊雨後耕黃犢。一
聲催得大麥黃。一聲喚得新秧綠。人言此角只兒
戲。孰識古人吹角意。田家作勞多愁咨。故假聲音
召和氣。吹此角起東作。吹此角田家樂。此角上與
鄒子之律同。宮商合鍾呂。形甚朴。聲甚古。一吹寒
谷生禾黍。

靈壁石歌為方岩王侍郎作

靈壁一峯天下奇。體勢雄偉身巍巍。巨靈怒拗天
柱擲平地。蒼龍驤首尾。兩片黑雲腰夾之。聲如青
銅色碧玉。秀潤四時嵐翠濕。乾坤所寶落世間。鬼
神上訴天公泣。謂有非常人。致此非常物。可磨斫
賊劍。可倚擊。姦笏。可祝不老年。可比至剛德。自從
突兀在眼前。溪山日夜生顏色。君不見杭州風流
白使君。雅愛天竺雙雲根。又不見奇章公家太湖
碧。高下品題分甲乙。二公名與石不磨。今到方岩

有靈壁我來欲作靈壁歌擊石一唱三摩挲秋風
蕭蕭淮水波中分南北橫干戈胡塵埋沒漢山河
泗濱靈壁今如何安得此石來岩阿鬱然盤礴中
原氣對此令人感慨多

章泉二老歌

在昔商山傳四皓又聞香山圖九老異鄉異姓適
同時爭如章泉一家兄弟登耆頤章泉之上兩山
下有地可宮田可稼伯也早休官季也相約歸林
泉名動京口耕谷口山中有詩天下傳一生得閑

無得壽皓首龐眉世稀有竹隱先生八十三定庵
居士七十九客從遠方來亦是六十叟手把一枝
梅奉勸兩翁酒問公何以致遐齡請翁細說吾細
聽不燒丹不學仙五行有常數天所稟賦馬人生
一氣統四體衆人斲喪吾能全要知養生無他術
日多喫飯夜獨眠承翁見教謝翁去兩翁慙慙留
我住是夜醉眠苔竹軒夢見山靈向我言翁之所
說皆不然兩翁盛德合乎天天與遐齡五百年

京口喜兩樓落成呈史固叔侍郎

京口畫樓三百所第一新樓名喜雨大鵬展翼到
中天化作簷楹不飛去一日登臨天下奇華燈照
夜萬琉璃上與星辰共羅列下映十里蓮花池泰
山爲麴海爲釀手挈五湖爲甕盎銀糟香沸碧瑤
春歌舞當壚多麗人使君歌了人皆飲更賞谷中
花似錦五兵不用用酒兵折衝樽俎邊塵寢茲樓
屹作東南美孰識黃堂命名意特將此酒嘆爲霖
四海九州同一醉

觀陸士龍作顧彥先婦荅夫二首有感韻

此風吹歲暮空閨獨樓止夙興淚盈兩夕息夢千皇
妾生胡不仁失身從浪子嚼蘂苦我心餐冰噤我齒
離異何足愁險澁可勝紀寄書西飛鴈反覆話終始
鼠璞竊美名冠玉假外觀良人誇意氣下妾愁歲
晏念君始行邁雪嶺梅初繁春風桃已紅光陰等
飛彈相思果如何金環寬玉腕昔爲連理枝今作
搏沙散惜哉牛與女呱呱阻河漢特棲良獨難守
堅祗自讚雙劍幾時合寄聲問華煥勿聽五羊歌
富貴忘貧賤

栗齋鞏仲至以元結文集爲韻

尋常被酒時歸到急投枕爲愛坎山文今夜醉忘
寢偉哉浯溪碑千載氣凜凜春陵賊退篇少陵猶
歛社文章自一家其意則古甚大美遺五味純素
薄文錦聲牙不同俗斯人異所稟君君望堯舜人
人欲倉廩古道不可行時對空樽飲

坎山有窪樽銘

杜甫祠

嗚呼杜少陵醉卧春江漲文章萬丈光不隨枯骨
葬平生稷契心致君堯舜上時兮弟我與屹然抱

微尚干戈奔走蹤道路饑寒狀草中辨君臣筆端
誅將相高吟比興體力救風雅喪如史數十篇才
氣一何壯到今五百年知公尚無恙麒麟守高阡
貂蟬入畫像一死不幾時聲迹兩塵莽何如耒陽
江頭三尺荒草墳名如日月光天壤

阿奇晬日

窮居少生涯養子如種穀十苗方在手想像秋禾
熟吾兒天所惠骨相頗豐碩娟娟懷抱中一歲至
週日願汝無灾害長大度可必十歲聰明開二十

蚤奮發胸蟠三萬卷手握五色筆策勲文字場致
君以儒術不然學孫吳縱橫萬人敵爲國取中原
闢地玄冥北他年汝成就料我頭已白光華照老
眼甘旨不可缺爲子必純孝爲人必正直以我期
望心一日必一祝勿爲癡小兒茫然無所識胎教
尚有聞斯斯辨言豈無益

琵琶行

潯陽江頭秋月明黃蘆葉底秋風聲銀龍行酒送
歸客丈夫不爲兒女情隔船琵琶自愁思何預江

州司馬事爲渠感激作歌行一寫六百六十字
樂天白樂天平生多爲達者語到此胡爲不釋然
弗堪諫宦一作便歸去廬山政接柴桑路不尋黃菊
伴淵明忍泣青衫對商婦

毗陵太平寺畫水呈王君保使君畫龍篇在後

何人筆端有許力捲來一片瀟湘碧摩挲老眼看
不真恠見層波湧虛壁天慶觀中雙黑龍物色雖
殊妙處同能將此水畜彼龍方知畫手有神通龍
兮水兮終會遇天下蒼生待霖雨

南嶽

南雲漂渺連蒼穹七十二峯朝祝融
凌空棟宇赤帝宅脩廊翼翼生寒風
朝家遣使嚴祀典御香當殿開宸封
頭四海扶九重千戈永息年屢豐
五嶽惟今見南嶽北望乾坤雙淚落

送來賓宰

君作來賓宰聽我說來賓蠻俗無王化
當爲行化人有民無租賦租賦出商旅
逐利遭重徵商旅亦良苦能放一分寬
可減十分怨不受資囊索但愛

了支遣民窮賴撫摩官貧俸不多但得百姓安
俸薄其柰何勿謂朝廷遠官職易遷轉律已貴廉勤
御事要明斷自縣辟爲州指日爲太守須知早歸
來瘴鄉不可久

題四祖山榮老月窟

道號雲卧

一室虛生白中作滿月形山中三萬戶玉斧新修
成時人指爲月雲卧亦強名似月有圓相不西沉
東升浮雲不能蔽又無虧與盈是爲大圓鏡由師
心地明一圓走無礙光芒照八紘可以破諸暗可

以續祖燈明透雙峯頂輝映慧雲亭此鏡實無臺
請師問老能

出閩

千山萬山閩中路六尺枯藤兩芒屨去歲梅花迎
我來今歲梅花送我去梅花豈解管送迎白髮胡
為又南征天荒地老終無情歸去歸兮老石屏

劉折父為吳子才索賦雲山燕居

燕居適所息非懷傲世心白雲自舒卷青山無古
今中有動靜機杳眇諧素襟以時為出處懷人撫

壺琴平生披短褐時來或華簪世論倘不合矢口
不如瘖避影長松下洗耳清溪潄慎勿出雲外黃
塵三尺深

玉華洞

憶昨游桂林岩洞甲天下奇奇恠恠生妙不可摸
寫玉華東西岩具體而微者神功巧穿鑿石壁生
孔鏤玲瓏透風月宜冬復宜夏中有補陀僊坐斷
此瀟洒空山茅葦區無地可稅駕舉目忽此逢心
駭見希詫題詩媿不能行人亦無暇

祝二嚴

僕本山野人漁樵共居處小年學父詩用心亦良
苦搜索空虛腹綴緝艱辛語糊口走四方白頭無
伴侶前年得嚴粲今年得嚴羽我自得二嚴牛鐸
諧鍾呂粲也苦吟身束之以簪組遍參百家體終
乃師杜甫羽也天姿高不肯事科舉風雅與騷些
歷歷在肺腑持論傷太高與世或齟齬長歌激古
風自立一門戶二嚴我所敬二嚴亦我與我老歸
故山殘年能幾許平生五百篇無人爲之主零落
天地間未必是塵土再拜祝二嚴爲我收拾取

市舶提舉管仲登飲于萬貢堂有詩

七十老翁頭雪白落在江湖賣詩冊平生知己管
夷吾得爲萬貢堂前客朝吟有罪遭天厄謀歸未
辦資身策雞林莫有買詩人明日煩公問蕃舶

懶不作書急口令寄朝士

老病懶作書行藏詩上見一心不相忘千里如對
面我已八十翁此身寧久絆諸君才傑出玉石自
有辯隨才供任使小大皆衆選明君用良弼治道

方一變與之致太平朝廷還舊觀老夫眼尚明細
把諸君看試將草草書用寫區區願一願善調變
二願強加飯三願保太平官職日九轉

鳳鳴有吉凶

鵲噪令人喜鴉噪令人憎人心自分別吉凶屬禽
聲舜時有鳳鳴文王時亦鳴漢時鳳亦鳴六朝時
亦鳴鳳鳴有吉凶人不子細聽

婕妤好詞

丹霞張誠子作此詞出以示僕僕疑其太文因作此

紈扇六月時似妾君恩重避暑南薰殿清風隨扇

動妾時侍君王常得沾餘涼秋風颯庭樹團團無
用處妾亦寵顧衰栖栖度朝暮扇為無情物用捨
不知卹妾有深宮怨無情不如扇

江南新體

王建有此體別張誠子

卽船江下泊妾家樓上住朝朝暮暮間上下兩相
顧相顧不相親風波愁殺人

感寓四首

采薇人固高飲露蟬遂清謀茲一粒粟舉世共營
營營營亦多塗中有虧與盈陋巷一簞食朱門九

鼎烹窮達各有命。緊誰主權衡。吾生未可必。秋風
白髮生。

蛛網幕虛簷。一飽羅群飛。寒蚕齧枯桑。一身終繭
絲。物物巧生理。我生拙矣為。貂裘日以弊。石田歲
長饑。一貧已到骨。一氣儻未衰。舉目送飛鴻。悠悠
知我誰。

夜雨挾西風。撼撼撼庭樹。浮生堪幾秋。青鬢忽已
素。鈿刀剗九牛。策蹇望長路。所操莽無奇。自好徒
自誤。改絃調新聲。履道易故步。收功在桑榆。其敢

怨遲莫

紅紫委路塵。綠樹有嘉色。剗心晚聞道。玩物若有
得。青春坐銷歇。方茲見真實。人生到中年。胡不保
明德。秋風墮庭梧。棲鳳去無迹。矯首碧雲端。一語
三歎息。

寄章泉先生趙昌父

靈鳳鳴朝陽。神龍不泥蟠。時方不可為。昌父乃在
山。思君二十年。見君良獨難。時於邸報上。屢見得
祠官。祠官祿不多。一貧其柰何。采芝亦可食。當作

采芝歌近者李侍郎直言遭逐去人皆笑其踈君
獨有詩句君爲山中人事安得聞入山恐未深
更入幾重雲

時悅齋李侍郎去國章泉詩送其行

頻酌淮河水

有客游濠梁頻酌淮河水東南水多鹹不知此水
美春風吹綠波鬱鬱中原氣莫向北岸汲中有英
雄淚

元宵雨

窮人不謀歡元夜如常時晴雨均寂寞蚤與一騷

期朱門粲燈火歌舞臨酒池酒闌歡不足九街恣
游嬉前呵驚市人簫鼓逐後隨片雲頭上黑翻得
失意歸

小孤山阻風因成小詩適舟中有浦城人寫

寄真西山

群山勢如奔欲渡長江去孤峯拔地起毅然能遏
住屹立大江干仍能障狂瀾人不知此山有功天
地間

松江舟中四首荷葉浦時有不測未句故及之

夜聽楓橋鐘曉汲松江水客行信忽忽少住亦可
喜且食鰕魚肥莫問鱸魚美行一作有

垂虹五百步太湖三萬頃除却岳陽樓天下無此
景范蠡挾西施功名付煙艇

秋風吹客初歸興浩難寫寒林噪晚鴉紅日墮平
野篙師解人意揚棹酒旗下

扁舟乃官差舟子吾語汝汝爲我作勞吾亦不汝
負好向上塘行莫過荷葉浦

趙尊道郎中出示唐畫四老飲圖滕賢良有

詩亦使野人着句

采芝商山秦四皓象戲橋中爲四老我疑此畫即
其人有時以酒陶天真丹青不知誰好手作此飲
態妙入神摩挲半世江湖眼古錦軸中舒復卷細
將物色辨人物迺是晉時劉畢與陶阮一琴無絃
橫膝上一琴團團明月樣一人持杓坐甕邊一人
手携文一編是中必寫酒德篇諸君傷時強自遣
翹生風味况不淺五胡妖氣蔽神州誓江不救中
原亂新亭舉目愁山河萬事何如一樽滿一杯一

杯醉復醉天地陶陶盡和氣道術相忘禮法踈形骸懶散無機事此畫流傳知幾載生綃剥落精神在何人爲我更作杜陵飲中八仙歌將與冰壺主人爲此對

伏龍山民宋正甫湖山清隱廼唐詩人陳陶

故園曾景建作記俾僕賦詩

故人昔住金華峯面帶雙溪秋水容故人今住伏龍山陳陶故園茅三間千載清風徐孺子門前共此一湖水百花洲上萬垂楊白鷗群裏歌滄浪故

人心事孺子高故人詩句今陳陶短衣飯牛不逢堯何如繡鞍上着錦宮袍瓦盆對客酌松醪何如紫霞觴泛碧葡萄豆萁然火度寒宵何如玉堂夜照金蓮膏吟成禿筆寫芭蕉何如沉香亭北醉揮毫再三問君君不對目送飛鴻楚天外細讀山中招隱篇超然意與烟霞會照影湖邊雙鬢皓此計知之悔不早三椽可辦願卜隣荷鍾相隨種瑤草

會稽山中

曉風吹斷花稍雨青山白雲無唾處嵐光滴翠濕

人衣踏碎瓊瑤溪上步人家遠近屋參差半成圖
畫半成詩若使山中無杜宇登山臨水定忘歸

高九萬見示落星長句賦此荅之

天星墮地化爲石老佛占作青蓮宮東來海若獻
秋水環以碧波千萬重雲根直下數百丈作時吐
光燄驚魚龍鳳凰群飛擁其後對面廬阜之諸峯
陰晴風雨多態度日日舉目看不同高髯能詩復
能畫自說此景難形容且好收拾藏胸中養成筆
力可杜鼎然後一發妙奪造化功作高髯高髯

貌取萬物果沉元有數吾聞此石三千年復化爲
星上天去

題申季山所藏李伯時畫村田樂圖

春秧夏苗秋遂穫官賦私逋都了却鷄豚社酒賽
豐年醉唱村歌舞村樂鼓笛有聲無曲譜布衫顛
倒傴僂舞欲識太平真氣象試看作此畫有佳趣
管絃聲按宮商發細轉柳腰花十八羅幃綉幙拂
香春作風九醞葡萄金盞滑王孫公子巧歡娛勿將
富貴笑田夫非溲耕稼飽君腹問有黃金可樂無

嘉定甲戌孟秋二十有七日起居舍人兼直
學士院真德秀上殿直前奏邊事不顧忌諱
一疏萬言援引古今鋪陳方畧忠誼感激辭
章浩瀚誠有補於國家天台戴復古獲見此
疏伏讀再三竊有所感敬效白樂天體以紀
其事錄于野史

禁城鷄唱金門開起居舍人携疏來榻前一奏一
萬字歷歷寫出忠義懷頓首惶恐臣昧死越錄敢
言天下事百年河洛行胡朔恨滿東南天一角夷

甫諸人責未酬志士愁眠劍鋒落天意未回事難
舉鄉來一試成千誤犬羊頻歲自相屠盛衰大抵
由天數昨臣銜命出疆時自期有去必無歸屈膝
穹廬當憤死天相孤忠半道回金山之下長江水
擊檝中流書壯志東風吹上妙高臺畧望江淮見
形勢形勢從來抵如此幾年待得天時至朝廷為
計保萬全徃徃忘却前朝耻臣今未暇論規恢胡
虜已亡何慮哉中原曠地無人管政恐英雄生草
萊北方苦饑民骨立萬一東來竊吾粟邊頭諸州

無鉄壁借問誰能備倉卒請朝廷厲精兵擇良將
辦多多策上上更選人材老練通達分守要衝講
明方畧一賢可作萬里城一人可當百萬兵坐令
國勢九鼎重所賴君心一點明長牋奏徹龍顏悅
繼言臣愚進此說言雖甚鄙用甚切宸斷必行天
下福勿謂儒生論迂濶臣之肝膽與人別讀書豈
為文章設王師若出定中原玉堂敢草平羌策
盧申之正字得春郊牧養圖二本有樓攻媿
先生題詩且徵予作

竹弓鳴鴈鴨驚飛來別浦無人境春風不搖楊柳
影長頸紛紛占作家半游波面半眠沙或行或立
或如舞或隻或雙或群聚飲啄浮沉多態度物情
閑暇世忘機分明一片太古閒時巧偽不作民熙
熙

我之居元在野平生慣識牛羊者今見蒲江出此
圖半日不知渠是畫一捷當前轉頭立一捷度浦
毛猶濕中有一蒼騎以牧犍犍相隨數十足斃後
兩枚黃齧棘分明如活下前坡路轉南山春草多

耳根只欠牧兒歌

鄂州南樓

鄂州州前山頂頭上有縹緲百尺樓大開窓戶納
宇宙高插欄干侵斗牛我疑脚踏蒼龍背下瞰八
方一作荒無內外江渚鱗差十萬家淮楚荆湖一都會
西風吹盡庾公塵秋影涵空動碧雲欲識古今興
廢事細看文簡李公文

題曾無疑飛龍飲秣圖

雲巢示我良馬圖一騎欲水一騎芻竹批雙耳目

搖電毛色純一骨相殊何人貌此真權奇筆端疑
有溼洼池駕駘當用驂騮老羸得畫圖人看好盆
中飲槽中秣無用霜蹄空立鉄何如渴飲長城濠
上波饑則飽喫天山禾振首長鳴載猛士龍荒踏
碎犬羊窠

儒衣陳其姓工於畫牛馬魚一日持六簇為
贈以換詩

生絹六幅淡墨圖伊人筆端有造化驂騮汗血捉
雷光拈捩倦耕眠草下陂塘漠漠烟雨後出水群

魚戲瀟灑細看物物有生意不比尋常能畫者請
君就此三景中揮毫添我作漁翁岸頭孤石持竿
坐白鷺同居蒲葦叢有時尋詩出游衍款段徐行
山路遠奚奴逐後背錦囊木杪斜陽鴉噪晚有時
蓑笠過田間農婦農夫相往還手放鉏犁吹短笛
日暮青郊黃犢閑王孫貴人不識此此是吾儂佳
絕處掛君圖畫讀吾詩令人願踏長安路

黃州棲霞樓即景呈謝深道國正

朝來欄檻倚晴空暮來烟雨迷飛鴻白衣蒼狗易

改變淡粧濃抹難形容蘆洲渺渺去無極數點斷
山橫遠碧樊山諸峯立一壁非烟非霧籠秋色須
臾黑雲如潑墨欲雨不雨不可得須臾雲開見落
日忽展一機雲錦出一態未了一態生愈變愈奇
人莫測使君把酒索我詩索詩不得呼畫師要知
作詩如作畫人力豈能窮造化

題上虞縣信芳堂

河陽種桃彭澤柳歲歲春風誇不朽何如君種一
池蓮開向五月六月天紅粧當暑清無汗綠葉添

風香不斷坐令百里盡清涼天乃贈君雲錦段此
花不可無此堂主人姓字同芬芳更看堂後參差
竹醉倚炎空舞寒綠

衡山何道士有詩聲楊伯子監丞盛稱之以
楊所取之詩求跋其後

道人幽吟巖壑底伴曉猿啼秋鶴唳自陶情性樂
天真一心不作求名計一朝邂逅楊東山詩聲楊
揚滿世間東山才與誠齋敵手腕中有萬斛力為
君翻九淵探君驪龍珠為君擘滄海鈎上珊瑚枝

豐城地下掘起一作龍泉太阿雙寶劍南山霧裏窺
見隱豹文章皮是寶欲藏藏不得總被東山手拈
出道人從此詩價高石廩祝融爭率律君不見彌
明石鼎聯句詩千載託名韓退之

徐京伯通判晚歲得二子

竹隱種竹知幾年千竿萬竿長拂天群飛不敢下
棲止常有清風凜凜然丹穴飛來兩雛鳳鳳來此
竹為之重牙籤玉軸帶芸香家藏萬卷為渠用人
間豚大不足多我來為作徐卿二子歌手傳竹隱

文章印看取他日官職高差幾

寄報恩長老恭率翁

報恩千楹歸一炬佛也不能逃劫數寶坊化作瓦礫場堪笑月庭來又去率翁修造鳳樓手第一能將無作有神工作舍鬼築墻鞭笞木石能飛走風斤月斧日紛然行看華屋突兀在眼前好留一室館狂客早晚來參文字禪

織婦歎

春蠶成絲復成絢養得夏蠶重剥繭絢未脫軸擬

輸官絲未落車圖贖典一春一夏爲蠶忙織婦布衣仍布裳有布得着猶自可今年無麻愁殺我

刈麥行

腰鎌上壠刈黃雲東家西家麥滿門前村寡婦拾滯穢饘粥有餘炊餅餌我聞淮南麥最多麥田今年歲屯干戈飽飯不知征戰苦生長此方真樂土

鄂渚張唐卿周嘉仲送別

武昌江頭人送別楊柳秋來不堪折漢陽門外望南樓昨日不知今日愁英雄握手新相識人情正

好成南北酒闌人散最關情一鴈西飛楚天碧

詰燕

去年汝來巢我屋梁間汗泥高一尺啄腥拋穢不
汝厭生長群雛我護惜家貧惠愛不及人自謂於
汝獨有力不望汝如靈蛇銜寶珠雀獻金環來報
德春風期汝一相顧對語茅簷慰岑寂如何今年
來於我絕蹤跡一貪簾幕畫堂間便視吾廬爲棄
物

寄趙鼎臣

學如劉子政不使校書天祿閣文如李太白不使
待詔金鑾殿倚樓終日看廬山贏得虛名聞九縣
才忌太高心忌太清平平穩穩爲公爲卿騏驎可
羈乃歸帝閑麟鳳莫馴爲瑞人間爲瑞徒能
好騏驎可羈終遠到歲寒心事幾人知手把梅花
供一笑

毗陵天慶觀畫龍自題姑蘇羽士李懷仁醉
筆詩呈王君保寺丞使君

姑蘇道士天酒星醉筆寫出雙龍形墨蹟從橫奪

造化蜿蜒滿壁令人驚。一龍翻身出雲表。口吞八
極滄溟小。手弄寶珠珠欲飛。握入掌中拳五爪。一
龍排山山爲開。頭角與石爭。崔嵬波濤怒起接雲
氣。不向九霄行。兩來萬物焦枯天作旱。兩雄壁隱
寧非懶。真龍不用只畫圖。猛拍欄干寄三歎。

漁父詞四首袁蒙齋元取前二首黃魯庵俾
並錄之以見其全 其三其四二首缺

漁父飲不須錢柳枝斜貫錦鱗鮮。換酒却歸船。

其二

言天新閣文

漁父醉釣竿閑柳下呼兒牢繫船。高眠風月天
五言律

秋懷

紅葉無人掃。黃花獨自妍。聽談天下事。愁到對酒
樽前。水濶終非海。樓高不到天。昔人已懷古。况復
後千年。

晚春次韻

酒醒愁難醒。春歸客未歸。鶯啼花雨歇。燕立柳風
微。世路多殊轍。人生貴識機。低頭飽一粟。仰首愧

雲飛

元日二首呈永豐劉叔治知縣

焚香拜元日受歲客他州白髮難遮老新年諱說
愁無人能訪戴有地足依劉桃李爭春事梅花笑
未休

市近人聲雜窓明雨色開異鄉輕度節同邸重傳
杯不礙狂夫醉知無賀客來故園歸未得茅屋想
蒼苔

宿農家

門巷規模古田園氣味長小桃紅破萼大麥綠銜
芒稚犬迎來客歸牛帶夕陽儒衣愧飄泊相就說
農桑

湘中

荆楚一都會瀟湘八景圖試呼沙鳥問曾識古人
無痛哭賈大傅行吟屈大夫汀洲芳草歇轉使客
情孤

水陸寺

長沙沙上寺突兀古樓臺四面水光合一邊山影

來靜分僧榻坐。晚趁釣船回。明日重相約。前村訪
早梅。

題分宜縣呈石子和知縣

古鎮更爲縣封疆。半是山賊繁。官吏窘。土瘠稻梁
慳。流水心何急。高山意自閑。春風細吹拂。桃李滿
民間。

清明感傷

一笠戴春雨。愁來不可遮。清明思上塚。昨夜夢還
家。歸興隨流水。傷心對落花。晉原松下淚。沾酒趁

天涯

都中書懷二首

醉卧長安市。思歸東海涯。瓶餘殘臘酒。梅老隔
年花。日興愁爲地。時憑夢到家。鄉書三兩紙。一讀
一咨嗟。

雪化晴簷雨。爐烘凍壁春。窮猶戀詩酒。懶不正衣
巾。寂寞安吾分。奔馳失我真。枯桐就煨燼。容有賞
音人。

歲暮呈真翰林

歲事朝朝迫。家書字字愁。頻沽深巷酒。獨倚異鄉樓。
詩骨梅花瘦。歸心江水流。狂謀渺無際。忍看大刀頭。

游天竺

好山看不了。遂借上方眠。酒渴傾花露。詩清瀉澗泉。
生無適俗韻。老欲結僧緣。睡覺鐘聲曉。窓牕騰子烟。

盧甲之正字小酌

清境無塵雜。一作夢餘 何蕭酒。羈懷向此開。主人有風度。和我

不塵埃。倚竹評詩句。拈花泛酒杯。出門見明月。客去又招回。

鳳凰臺

登臨舒老望。一作眼 吊古得淒涼。故國自龍虎。高臺無鳳凰。
浮雲多改變。喬木見興亡。往事渾休問。鍾山又夕陽。

山中即目一作事二首

岩路穿黃落。人家隱翠微。籠鷄為鴨抱。網犬逐鷄飛。
竹好堪延客。溪清欲浣衣。禪扉在何許。僧笠戴

雲歸

茅屋七五聚沙汀八九磐梯山哇夾秀囊石障溪
端端作父老鷄豚社兒童梨栗盤幽居有餘樂奔走
愧儒冠

題徐京伯通判北征詩卷

一襟忠誼氣數首北征詩不許公卿見徒為篋笥
奇街枚衝雪夜擊楫誓江時此志無人共愁吟兩
鬢絲

江上

山東江流急。雲兼霧氣深。輕鷗閑態度。孤雁苦聲
音。客路行無極。風光古又今。梅花出籬落。幽事頗
關心。

賢女祠

南康縣外二十里有女祠昔有劉氏
女少而慧父母初以許蔡無故絕蔡
而以許吳吳亡又以許蔡女曰女子
身初許蔡奪以許吳二年矣今吳亡
復以許蔡一女二許人尚何顏面登
人之門投身于潭而死

士有敗風節慙菟埋九京幽閨持大誼千載著嘉
名父不重然諾女能輕死生寒潭墮秋月心迹兩

清明 著作對

春盡日

撚指過三月又當春夏交花殘蜂課蜜林茂鳥安
巢芳草生青霽新篁展綠梢風騷將斷絕誰有續
絃膠

寄栗齋輩仲至

幾度觀朝報差除不到君山林自臺閣文字即功
勲吟苦子血東野潛深楊子雲一官雖偃蹇千載有
知聞

次韻史景望雪夜

雪中寒力壯病骨瘦難勝溫酒撥爐火題詩敲硯
冰驚心雙白鬢知我一青燈欲悟浮生事思參小
大乘

春日懷家

細數平生事何堪挂齒牙客游兒廢學身拙婦持
家開甕嘗春酒租山摘早茶關心此時節歸興滿
天涯

寄沈莊可

無山可種菊強號菊山人結得諸公好吟成五字

新紅塵時在路白髮未離貧吾輩渾如此天公似
不仁

山行

度嶺休騎馬臨淵看網魚木根高可坐岩石細堪
書谷鳥鳴相答山雲卷復舒儒衣人賣酒疑是馬
相如

次韻謝敬之題南康縣劉清老園

劉子隱居地真如李原盤萬松春不老多竹夏生
寒卜築世情遠登臨客慮寬題詩亦君壁聊以記

萬字不若首字
為勝

游觀

淮上春日

邊寒客衣薄漸喜暖風回社後未聞燕春深方見
梅壯懷頻撫劍孤憤強銜盃北望山河語斷天時
不再來

麻城道中

三杯成小醉行處總堪詩臨水知魚樂觀山愛馬
逢林塘飛翡翠籬落帶醪醑問訊一作邊頭事溪翁
總不知

望花山張老家

即松肪

元從邊上住來此避兵興麥麩朝充食松明夜當
燈蔽門麻葦葦護壁石層層老嫗逢人哭吾兒在
謝陵一老嫗逢人必大哭云我兒在謝陵不歸也
光州有謝陵橋其子與虜戰死于此

春日

滯滯江湖久蹉跎歲月新客愁茅店雨詩思柳橋
春秣馬尋歸路騎鯨問故人山林與朝市何處着
吾身

聞李將軍一作至建康

疋馬徑趨府將軍意氣多來依漢日月思復晉山
河邊將慚尸素朝臣奏凱歌分明御徂詐得失竟
如何

江漲見移居者

夏潦連秋漲人家水半門都拋破茅屋移住小小
村聒聒籠鷄犬纍纍帶子孫安居華屋者應覺此
身尊

上喬右司

端笏立朝日肺肝傾上前把麾持節處桃李滿淮

掃藥石箴時病著龜燭事先焦頭與曲突為計孰
為賢

贈郭道人詩句皆述其所言

滅性能安樂深居絕是非英雄行險道富貴隱危
機紙被如綿軟藜羹勝肉肥蒼苔滿山徑最喜客
來稀

送湘漕趙蹈中寺丞移憲江東

持節復持節因循霜鬢侵盛衰關大數豪傑負初
心宇宙虛長笑江湖寄短吟番陽秋水濶湘浦未

詩語
之款款

為深

立春後二首

久望春風至還經閏月逢梅花文人行柳色少年
時愛酒常無伴吟詩近得師離騷變風雅當效楚
臣為

東風吹竹屋無數落梅花凍雀栖簷角饑鳥啄草
芽家鄉勞夜夢客路又春華莫訝狂天醉西樓酒
可賒

寄韓仲止

何以澗泉號取其清又清天游一丘壑後視幾公
卿杯舉即時酒詩留後世名黃花秋意足東望憶
淵明

題張簽判園林

園圃屋東西從君一杖藜兩寒花並瘦春重柳絲
低亭館常留客軒窗總傍溪摩挲雪色壁安得好
詩題

哭趙紫芝

嗚呼趙紫芝其命止於斯東晉時一作朝人物晚唐家

數詩瘦因吟思苦窮為官情癡憶在截春圃花邊
細話時嘗在平江孟侍郎歲春園終日論詩

江村何宏甫載酒過清江

玉筍千峯雨金風十日秋誰能多載酒來此共登
樓山立閣萬變溪深納衆流故人歸未得我亦為
詩留

臨江軍新歲皇王幼學監簿

夢說去年事詩從昨夜吟三杯新歲酒千里故鄉
心人共梅花老愁連江水深家書忽在眼一紙直

千金。

訪楊伯子監丞自白沙問路而去

欲訪揚雄宅扁舟過白沙自從山以後直到水之
涯風節古人物文章老作家相尋有忙事第一問
梅花

朝市風波地乾坤漁獵場生民日憔悴吾道亦淒
涼龍不爲霖出鳳於何處箴群鴉爭晚噪一意送
斜陽

劉興伯黃希宋蘇希亮慧力寺避暑

何處避炎熱相期過寶坊萬松深處坐六月午時
涼鐘磬出深屋江山界短牆醉來歸興懶留宿贊
公房

秋夜旅中

旅食思鄉味砧聲起客愁夜涼風動竹人靜月當
樓浮世百年夢他鄉幾度秋店翁新酒熟一醉更
何求

舟行往吊故人

喬木風聲壯大江天影圓悲秋時把酒愛月夜行

船未及到河上先愁過竹邊倚蓬思往事聞笛為
淒然。

擬峴臺杜子野主簿寓居

高臺延望眼風物滿前村細讀南豐記頻開北海
樽遠山如看盡近市不聞喧詩是君家事長城在
五言

無策

老覺登樓懶心知涉世疎
夢蕉還得鹿綠木可求
魚晚歲未聞道平生欠讀書
行箴兩無策究竟果

何如

題萍鄉何叔萬雲山

詩人姚仲固乃胡仲方詩友

拄杖穿雲去一坡仍一坡地高山不峻花少竹還
多家近登臨使人賢氣味和能詩老姚合朝夕共
吟哦

常寧縣訪許介之途中即景

竹徑入茅屋松坡連菜畦深渚漚麻水斜豎采桑
梯區別隣家鴨群分各線鷄行人來少憩做道過

東溪

關鷄一線作一群各線則別作一群

建昌道上

此篇誤寫在高九萬集中

凜凜北風勁行行西路賒人情甘淡薄世事苦參
差酒易逢知己詩難遇作家林間數點雪錯認是
梅花

訪嚴坦叔

麻姑山下泊城郭帶烟霞携刺投詩社移船一作
傍酒家沙禽時弄水擘柳夏飛花小酌未能了西
樓日又斜

杜仲高自鄂渚下儀真

鄂渚三千里南樓看月回東園花政好去歲客重
來兄弟皆名士文章動上台傾城傾國色也用覓
良媒

見趙知道運使

飽食武昌魚不如歸故廬盟鷗還海道問鴈覓家
書又把鄉人刺來接使者車東園桃與李莫使着
花踈

趙叔垕山堂安下其家適有喪事

一徑泂溪入數椽松竹間豈知人事變自覺客身

開采菊出尋酒移床卧看山蒼頭無可作把釣過
西溪一作灣

黃道士出爻

林屋何瀟洒。權為羽士家。客來多載酒。僧至自煎
茶。試墨題新竹。携筇數落花。飲中忙過日。無暇問
丹砂。

陳伯可山亭

梯險登霞外。乘流過竹西。寒溪隨雨漲。高閣與雲
齊。雙鶴有時舞。孤猿何處啼。清吟無盡興。白石可

留題

玉山章泉本章氏所居趙昌甫遷居於此章
泉之名遂顯

茲山自開闢有此一泓泉。姓自章而立名。因趙以
傳源。從番水出地。與瑞峯連。寄語山中友。臨流着
數椽。欲使結一亭于泉上。

題永州思范堂

太守能延客。茲堂為我開。清池照窓戶。列嶂帶樓
臺。剔蘚觀題字。披榛欲訪梅。城根數一作株石。曾識

范公來

舟中病起登覽

檣棹病三日登樓舉一觥江山從古在花草逐時
生南浦佳人別西風送客行錦鱗能自躍獻我一
杯羹

邵陽趙節齋史君同黃季玉以合江亭三字

分韻

萬里清秋景都歸乎此亭光陰幾今古天地一宮
廷澗水東西白梅山嶺表裏青登臨生酒興欲

醉又還醒

見湖南綉使陳益甫大著

手攬澄清戀聲名漢范滂一臺振風采列郡正權
綱嶽勢增重文星日有光金門雖藐藐玉節自
堂堂

麾節羅群彥朝廷只數公近民多惠澤望闕負孤
忠星殞京城震沙移海水通欲知休咎證無路問
蒼穹

敢寫散人號來登君子堂論文才力短憂世話頭

長老不堪行路心思歸故鄉數行詩後語夜夜吐
光芒 爲作詩跋甚佳

南臺寺長老乃福州士人陳其姓語及光拙
庵遭際寺乃石頭和尚道場

元龍湖海士參得石頭禪卓筆翻千偈住山今十
年安心一立壑過眼幾雲烟莫笑拙庵拙聲名動
九天

真西山帥長沙禱雨

太守持齋戒精誠動九上作天驕陽變霖雨凶歲轉

豐年信是經綸手行司造化權唐時相房杜斗未
直三錢

出郭問農事家家笑語聲有田皆足水既雨亦宜
晴山下溪流急街頭米價平明朝聞隣領客相見
賀秋成

蘇希亮約客游劉興伯大自在亭

偶爾來江上從君到酒邊雨晴花弄日風定柳凝
烟適意共一笑浮生無百年明朝大自在誰辨載
花船

客中寄家書併簡季道姪

東隱三年別西風一紙書逢人相問訊念我獨勤
渠游子司吾土先人有弊廬欲歸歸未得妻子定
何如

舟中夜坐

獨坐觀星斗一襟秋思長天河司米價太乙照時
康月浦孤帆過風荷一路香持杯問舟子今夜宿
誰鄉俗識以天河頭晦卜米價之貴賤

淮東趙漕領

一作客東園趙世卿贖談近日諸

公僕謂今日東園之會想像歐蘇風流不可
見

今日東園會能為野客期乾坤一南北花木幾興
衰亭館經行地歐蘇無恙時風流不可見烟雨謾
題詩

沈莊可號菊花山人即其所言

老貌非前日清吟似舊時已無藏酒婦幸有讀書
兒連歲修茅屋三秋繞菊籬寒儒有奇遇太守為
刊詩

別章泉定庵二老人

臘裏春風轉墳笮一氣和勸翁新歲酒唱我老人
歌一世聲名重四方書問多章泉一泓水思與海
同波

太湖縣雪中簡段子克知縣

臘雪隨風下蹇驢行路難匆匆投邸舍草草共
杯盤喜見豐年瑞渾忘昨夜寒兒童不解事却作
柳花看

有烹犢延客者食之有感

田家繭粟犢小小可憐生未試一犁力俄遭五鼎
烹朝來占食指妙絕此杯羹口腹爲人累終懷不
忍情

萍鄉縣圃

趙南夫作縣是日縣仙生
日諸妓筵會撥借雙鬟

亭榭八九所一筇隨往還四橋朱檻外三徑綠陰
間鑿淺通流水凭高見遠山琴堂判風月一笑得
雙鬟

書事

兩揆新當國三邊未解兵吾君極勤儉天下望昇

平春雨隨時下福星連夜明寒儒卜天意對酒百
憂輕

同趙鼎臣游黃甫真人清虛庵

昨聞曹兩府河上遇游仙駐蹕錢塘後結庵廬阜
邊焚香觀御帖洗盞酌神泉鴈足傳書日傷心已
百年

同曾景建金陵登覽

興廢從誰問雲烟過眼空吁嗟六朝事想像半山
翁百景饒君詠三杯許我同登臨無限意多在女

陽中

曾有金陵百詠

遇淮人問蘄黃之變哽噎淚下不能語許俊
不解圍乃提兵過武昌

偶逢淮上客急急問蘄黃未語心先噎低頭淚已
滂五關人失守殘虜勢非強聞說許都統提兵過
武昌

寄姚楚州

人材當世用緩急敢辭難身挾天威重名驚賊膽
寒臨機一着妙入境衆心安聞已誅元惡仍須問

禍端

庸將幾誤國流民亦弄兵
康時仗豪傑了事是功名
車馬長淮路貔貅細柳營
山陽還舊觀併使虜塵清

許介之約過清溪道上有成

行盡白雲際乘槎過水西
稻田秋後穫茅舍午時
鷄野飯自不惡村醪亦可携
聞鐘欲投宿何處是招提

送張子孟 柳陽有鬼哭山桂陽有神愁

君爲柳桂客聽說道途難不過
神愁嶺須經鬼哭山
心平無險路酒賤有歡顏
早作還鄉計高堂鶴髮斑

南豐縣南臺包敏道趙伯成同遊

笑傲南臺上東風吹鬢絲
眼明花在處春好雨晴時
樓閣多臨水溪山可賦詩
留連無盡意故遣酒行遲

長沙道上

詩情滿天地客夢繞瀟湘
何處桂花發秋風昨夜

香登山猶矍鑠照水見昂藏未了一生事難禁兩
鬢霜

萍鄉客舍

草罷惜春賦持盃亦鮮歡簷楹雙燕語風雨百花
殘小閣無聊坐征衣不耐寒地爐燒石炭強把故
書看

無爲軍界上遇太湖趙尉制府稟議

解后風塵底周旋鞍馬間三杯送行色一笑強開
顏夜宿煖湯市長炊冷水開軍前獻籌策第一守

光山

譚俊明雪中見訪從而乞米

今日病方起君來喜可知地爐燒楮瓦釜煮梨
祈所外雪三尺窓前梅數枝野夫饑欲死誰與辦
晨炊

新喻縣蘇晉叔相會

偶作榆溪客還逢橘井仙多才出人上笑我老吟
邊買錦囊詩卷典衣供酒錢竹林青眼叔常說仲
容賢

訪陳與機縣尉於湘潭下攝市

清淡守風節當官若隱居自稱為漫尉人道是迂
儒俸外無炊米公餘但讀書王門多貴戚道眼視
如無

買得南坡景創成西尉司宅幽連作寺觀地廣帶

亭池能事易了役民民不知題詩記顛未政不
假人碑

吾里不識面他鄉喜見君數朝相款曲杯酒接慇
懃清挹湘江水笑開衡嶽雲歸心逐回鴈轉首歎

離群

訪曾魯叔有少嫵先從金仙假榻長老作筍
供

俗物敗佳興余非後汝期既來遲一見政恐錯相
疑同訪金仙老因參玉板師樽前有餘暇細讀放
翁詩

觀靜江山水呈陳魯叟漕使

桂林佳絕處人道勝匡廬山好石骨露洞多岩腹
虛崢嶸勢相敵溫厚氣無餘可惜登臨地春風草

木疎

昨者登梅嶺茲來入桂林相從萬里外不負一生
心湖上千峯立樽前十客吟譏評到泉石吾敢望
知音

昭武劉圻甫以岬篁隱居圖求詩

相對兩山碧春風搖綠篁一巢雲建造三澗水宮
商谷口躬耕稼盤中歌壽昌桃花認行路他日訪
劉郎

過三衢尋鄉僧道遇愛山徐叔高同訪鄭監

承其家梅園甚佳選百家詩

暫作三衢客尋僧出郭遲適逢徐孺子同訪鄭當
時詩集百家富梅花幾樹奇匆匆又行役不見爛
柯基

題趙庶可山臺

層臺高幾許此即會稽圖一目空秦望千峯勵鏡
湖雲烟分境界城郭限廉隅他日傳佳話蘭亭與
此俱

天造此一景趨然闌闌間坐分臺上石看盡越中

山松月照今古樵風送往還只愁軒冕出關却白雲關

董叔宏黃伯厚載酒黃塘送別

愁酌開懷酒涼生破暑風論交談洒洒告別恨匆
匆十里黃塘路扁舟白髮翁多情今夜月爲我照
吟蓬

贈張季治

秋扇交情薄儒衣行路難縱懷千里志也要一枝
安夢繞梅花帳愁生首箸盤從來食肉相千萬強

加餐

姪淑遠遊不得書

客夢江湖遠窮居骨肉離尺書無寄處中夜不眠
時念爾衣裘薄滿懷風露悲狂游斷消息深及竹
林期

寄梅屋趙季防縣尉

疇昔交游密興違歲月多石屏今老矣梅屋病如
何世論生荆棘家山足薜蘿共尋深處隱此計莫
蹉跎

雨後有感

逐日愁聞雨今朝喜遇晴雲開山獻狀月出海生
明天地有常理古今無限情靜中觀世變安得見
河清

歸來二首兒子創小樓以安老者

老去知無用歸來得自如幾年眠客舍今日愛吾
廬慶世無長策閑時讀故書但能營一飽渾莫問
其餘

破屋不可住如何着老身喜於香榻下見此小樓

新山好如佳客吾歸作主人摩挲雙脚底無復踏
紅塵

歸後遺書問訊李敷文華字實夫

綉斧離章貢旋聞帥壽沙先生方易節客子已還
家別後仙凡隔歸來道路賒秋風兩行字也勝寄
梅花板闌一作較門

身退謀家易時危致主難才能今管樂人物舊張
韓吾國日以小邊疆風正寒平生倚天劍終待斬
樓蘭

聞說營新第無從賀。成門庭山水色樓閣管絃聲。海內二三傑胸中十一作萬兵寧爲一區計不使九州平。

憶作南州客歸來東海濱尚懷憂世志忍說在家貧老作山林計。夢隨車馬塵。鬱孤臺上月無從照。詩人後夜鬱孤臺上月更從何處照。詩人敷文送行詩也。

醉眠夢中得夏閏得秋早雨多宜歲豐一聯起來西風悲人且聞邊事。

夏閏得秋早雨多宜歲豐今朝上東閣昨夜已西

風田野一飽外乾坤萬感中。傳聞招戰士人尚說和戎。

姪孫仲晦亦龍和前詩甚佳其家有林塘之勝兄弟和睦日以奉親爲樂用此韻以美之。有母身長健無營家自豐林塘孝子宅詩禮古人風。龍畝秋成後弟兄和氣中時聞有佳話常欲訪王戎。

一笑

海曲荒涼地吟邊踉蹌身時危法當隱年老慣君

貧俗客苦戀坐小孫癡弄人等閑成一笑不覺把
杯頻

寄趙茂實大著二首

久坐圖書府方登著作庭人知才可敬公以德為
馨議論參諸老文章本六經省中相別後夜夜望
奎星

詞臣工筆墨亦足致功勳細草平戎策兼為諭蜀
文一言關治亂千載有知聞應笑垂綸叟愁吟對
海雲

送彭司尹之官三山

祭酒家風重民曹官職卑公勤為己任清白取人
知鵬月三山雪梅花一路詩舊時來往處今有夢
相隨

送姪孫汝白往東嘉問訊陳叔方諸丈

子去尋名勝何慚着布衣出門知所鄉在旅亦如
歸道誼無窮達文章有是非寄聲陳與趙相賞莫
相違

寄南昌故人黃存之宋謙甫二首

謙甫多才思存之重誼襟一書愁話別千里夢相
尋南浦扁舟上東湖萬柳陰舊時行樂處何事不
關心
久客歸來後家如舊日貧青山何處隱白髮也愁
人畎畝一生事乾坤百病身時無嵇呂駕相憶莫
相親

送趙安仁之官上虞二首

表表魁梧相面如田字方早宜朝玉陛猶自縮銅
章上挹葉丞相近瞻商侍郎風流接前輩偃室有

輝光

遠庵家學在持此去為官冰雪吾身白風霜吏膽
寒一心毋妄用百姓自相安賢者妙為政誰言宰
劇難

秋日

秋風梧葉兩袞袞送秋涼一氣四時轉幾人雙鬢
蒼舊游如說夢久客乍還鄉欲作安居計生涯尚
渺茫

君玉同訪豈潛飲間君度曼卿不約而至鶴

方換翎羽出舞于桂花之下不可無語

秋來常日雨雨霽忽秋深鶴換一身雪花開滿樹
金三杯動情性一笑付園林莫恠先歸去衰翁薄
被作疾侵

倚樓

賢愚不同道用捨要知機涉世有臧否倚樓無是
非鴉分枯樹立鴈逐斷雲飛朝暮尋常事何須歎
落暉

戊戌冬

造化入難測寒時暖似春蛟龍冬不蟄雷電夜驚
入四海瘡痍甚三邊戰伐頻靜中觀氣數愁殺草
茅臣

題姪孫豈潛家平遠圖

好山橫遠碧。平野帶林塘。四望耕桑地。幾年雲水
鄉。海天龍上下。秋日鶴翱翔。覩物忽有感。無心住
草堂

夏日續題

海近朝曦赫。山明宿霧消。紫雲縈碧落。白鷺點青

昔避暑軒亭爽。凭虛眼界。選時來一登眺。初不待
招邀。

因風再寄南昌故人兼簡王帥子文

寄聲黃與宋書去。望書還別後。交情在。年來世路
艱。吾思蹈東海君合隱西山詩卷動。收拾留名天
地間。

江湖歸亦好朋友。恨相踈。條作三年別。纔通一紙
書。詩盟誰是主。世道正愁予。若見王都督。煩君問
起居。

舟中

檣棹河梁畔。推篷得句新。雲爲山態度。水借月精
神。密樹藏飛翮。平波見躍鱗。幾年行落底。也有醉
歸人。

送曉山復肯甫入京

歲月頻看鏡。功名一據鞍。勿言行路惡。有志戀家
難。芳草客程遠。落花春夜寒。江湖舊時夢。相逐到
長安。

辛丑歲暮三首

日月易流轉一年仍一年身從憂患老事逐歲時
還白首未聞道清貧不愧天寒林松栢瘦花柳又
春妍

臘盡無多日吾住有幾年老於人事懶貧覺世情
偏獨枕江湖夢閉門風雪天三杯動詩興得句落
梅邊

意氣久凋落形模老可憎能扶雙病脚賴有二枯
藤世味淡如水吾心遠似僧明朝今日事一任運
騰騰

小畦

小畦尋丈許鑿壁置柴扉雨後菜虫死秋來花蝶
稀插籬新種菊抱甕已忘機俗客忽相訪妨人洗
布衣

有感

浩浩海風勁滔滔河水渾古人皆去世喬木自當
門族黨諸孫盛吾宗一綫存興衰知有數心事與
誰論

次韻陳叔強見寄

識面者無數。論文要有緣。未聞蒼玉佩。先枉碧雲
篇。采鳳騰詩筆。持螯泛酒船。山陰或乘興。何待菊
花天。

窮通元有命。富貴柰無緣。對此黃梅雨。歌君白雪
篇。風生三尺劍。夢逐五湖船。白首成何事。歸來敢
問天。

一冬無雨雪而有雷

萬物久如渴。三冬一向晴。時無臘雪下。夜有瑞雷
鳴。休咎占天意。悲歡見物情。山禽何所感。爛熳作

春聲

歲旦族黨會拜

衣冠拜元日。樽俎對芳辰。上下二百位。尊卑五世
人。排門喬木古。照水早梅春。寒事將消歇。風光又
一新。

寄節齋陳叔方寺丞

今時古君子。玉立衆人間。再世黃叔度。三生元魯
山。把麾渾細事。憂國欲愁顏。恨不頻相見。空書謾
往還。

姪孫子淵新居落成二首

結屋鄰蒼倉作海。開門面翠屏。堂前萱草綠。壽母髮
絲青。禮樂陳罇俎。詩書立戶庭。一時勤卜築。百世
享康寧。

一區揚子宅。中有讀書堂。早覺儒風好。兼看野趣
長。籬籬帶花竹。里巷接農桑。安得茅三架。爲鄰住
汝傍。

子淵送牡丹

有酒何孤我。因花賦惱公。可憐秋鬢白。羞見牡丹

紅。海上盟鷗客。人間失馬翁。不知衰病後。禁得幾
春風。

寄山臺趙度可二首

天族文章士。會稽山水州。地靈鍾秀異。人物信風
流。要自用卿法。如何與婦謀。功名須早計。莫爲海
雲留。

頃上山臺謁。臨行辱贈詩。相思寸心在。莫訝尺書
遲。好月登樓夜。清秋落木時。見君花萼集。夢到謝
公池。

晚春

春來涉一作能幾日又到落花時老面羞看鏡愁懷強
作詩雨墻蝸篆古風樹鳥巢危有客適相過樽前
一局碁

姪孫景文多女賀其得雄

陰極一陽轉君家氣數回試看庭竹上新添有鳳
雛來端的傳書種分明是福胎三朝食牛氣端不
類嬰孩

屏上懷黃伯高兄弟

扁舟到溪上移杖即行吟問麥雨多少探梅春淺
深古屏今日景脩竹舊時陰疇昔同游者遺蹤何
處尋

嘉熙己亥大旱荒庚子夏麥熟

四野蕭條甚百年無此荒旱禾遭夏旱晚稻被蟲
傷富室無儲粟農家已絕糧逢人相告語生理尚
茫茫

旱潦併爲雪三農哭歲饑當秋穀價貴出廣米船
稀救死知吾拙謀生恐計非固窮君子事辦乘此

山微

餓喙偏生事空言不療饑誰知歲豐歉實係國安
危世變到極處人心無藉時客來談盜賊相對各
愁眉

瑣瑣饑年事駸駸穀價高人將委溝壑誰肯發倉
廩涸沼魚枯死荒村犬餓號與人同一飽安得米
千艘

瀕海數十_{一作}里饑民及_{一作}幾萬家雨多憂壞麥春好
忍看花_{一作}鑿淺疏田水占晴視晚霞老農如鬼瘦不

住作生涯

積雨喜新霽山禽亦好音白雲開曠野紅日照高
林歎歲地惜寶惠民天用心君看太麥熟顆顆是
黃金

人不聊生梅柳早有春意_{一作歲}

歲歉家家窘時危事事難出門如有礙對酒亦無
歡揚柳含春思梅花耐歲寒少須天意轉穀熟萬
民安

庚子荐饑

三月彗星出連年旱魃興自應多變故何可望豐
登孰有回天力誰懷濟世能
瘵君不卹締憂國瘦
嶮增

連歲遭饑饉民間氣索然十家九不爨
餘錢凜凜饑寒地蕭蕭風雪天人無告急處閉戶
抱愁眠

餓走拋家舍從橫死路岐有天不雨粟無地可埋
屍劫數慘如此吾曹忍見之官司行賑卹不遺是
文移

寒時皆閉糶有穀貴如金寒士糟糠腹豪民鉄石
心可憐饑欲死那更病相侵到處聞愁歎傷時淚
滿襟

杵臼成塵設蛛絲網金齋啼饑食草木嘯聚斫山
林八語無生意鳥啼空好音休言穀價貴菜亦貴
如金

去歲未為歉今年始是凶穀高三倍價人到十分
窮險浙矛頭菜一作米愁聞飯後鍾新來慰心處隴麥
早荒荒

壬寅歲旦景明子淵君玉攜酒與詩為壽次

韻

捨我白毫梳把君金屈卮判為元日醉共賦早春
詩水泮魚龍起花開蜂蝶知為予扶病脚頼有古
藤枝

花朝姪孫子固家小集見其後園一池甚廣
因思唐戴簡隱居長沙東池柳子厚有記吾
子固雖富而不驕有禮文足以飾身鄉里稱
其善馬少游之流也余以水池隱居稱之不

為過况此乃吾家故事特欠柳柳州作記爾
今朝當社日明日是花朝佳節唯宜飲東池適見
招綠深楊柳重紅透海棠嬌自笑鬢邊雪多年不
肯消

次韻君玉春日

風雨不相貸繁華能幾時繞歌喜晴賦又作惜春
詩壓架醅醪老翻堦芍藥遲無花何足筭有酒且
相期

代書寄韓履善右司趙庶可寺簿

懶不脩書札。將詩問起居。升沈元自異。故舊忍相
踈。學術有餘用。班行不次除。功名付公等。世道莫
愁予。

涉世幾三折。行年近八旬。江湖倦游客。天地苦吟
身。白髮可憐老。青雲多故人。東風雖有力。朽木不
逢春。

閉戶生涯薄。憂時念慮長。老猶思汗漫。貧已在坐
膏肓。弱柳饒春色。幽蘭抱國香。窮通安我命。一笑
且持觴。

月夜懷董叔宏聞其入京未得振

酒醒興未已。詩成吟不休。一涼風滿座。半夜月明
樓。老驥思千里。飛鴻閱九州。故人何處在。誰作置
書郵。

夢中題林逢吉軒壁覺來全篇可讀天明忘了
落句

囂塵不到眼。瀟洒似僧家。風月三千首。圖書四十
車。綠垂當戶柳。紅映透隔牆。花好讀天台賦。登樓
詠落綺霞。

姪孫子直家有西閣吾有東樓相望秋來景
物佳甚

遍仄人間世思從造物游君方倚西閣吾一作亦上
東樓挹彼千峯秀森然萬象秋相看成二老更有
幾年留

諸姪孫登白峯觀海上一景

自有此山在無人作此遊氣吞雲海浪笑撼玉峯
秋開闢幾百載登臨第一籌諸郎莫高興刻石記
風流

鴈山羅漢寺省王總幹之墓待和甫主簿之
來

山鳥恠儒衣遊山我亦癡叫雲雲不應問水水相
知俗物刺人眼春風發我詩噪簷鴉鵲喜主簿有
來期一作時

解后樂清主簿姜昌齡一見如平生歡同宿
能仁

鴈去蕩猶在龍居山亦靈高峯穿碧落虛谷吸滄
溟愁見僧頭白喜逢君眼青燈前聞妙語字字摘

天星

鴈山總題此山本朝方顯

此地古無聞誰封萬石君山林纔整整來往早紛紛
兩派龍湫水千峯鴈蕩雲東西十八寺紀載欠

碑文

幾山兼幾水更有幾烟霞不立仙人宅都爲釋氏
家賓秋多少鴈報曉一雙鴉有此山林勝如何在
海涯

會心

我本江湖客來觀鴈蕩竒脚穿靈運履履作口誦貫
休詩景物與心會山靈莫我知白雲迷去路臨水
坐多時

大龍湫

百丈雲巖上神龍噴水飛四時作風雨萬斛瀉珠
璣不可形容處無窮造化機非他瀑布比對此欲
忘歸

靈峯靈巖有天柱石屏之勝自昔號二靈

駭見二靈景山林體勢豪插空天柱壯障日石屏

高覽勝苦不足登危不可憚勞白雲飛動處絕壁
走猿獠

淨明

林巒相掩映巖谷獨玲瓏下置維摩室上通龍伯
宮靈珠四時雨秋水一簾風甚欲觀新月山高脚
力窮新月谷在上高不可登

題胡立方思齋

每事再思過參之以古今唯求合天理毋妄用吾
心和氣生琴室清風動竹林所居雖近市不許市

塵侵

張子明索賦永齋詩諾之矣杜撰四十字
以還冷債

為學自不足毋勞課近功聲名垂不朽文字用無
窮草色朝朝碧桃花歲歲紅一機長運轉造物與
人同

謝項子宜帥幹遣饋

聞說沙溪上分明似渭川重山照一作華屋萬竹繞
清泉遣餽知相憶登門未有緣一樓先月景想像

在吟邊

姪孫曷以東林農歌一編來細讀足以起子
七言有汲水灌花私雨露臨池疊石幻溪山
草欺蘭瘦能香否杏笑梅殘柰俗何似此兩
聯皆自出新意自可傳世然言語之工又未
足多其體格純正氣象和平爲可喜余非諛
言自有識者因題其卷末以歸之

吾崇有東塾詩律頗留心不學晚唐體曾聞大雅
音霜空孤鶴唳雲洞老龍吟群噪無才思昏鴉自

滿林

風雨無憀中覽鏡有感作小詩未有斷句適
兩姪孫攜詩卷來

覽鏡忽有感誰能寫我真峻嶒忍饑面蹭蹬苦吟
身風葉飄零夜雨花狼藉春相過慰牢落吾族有
詩人

姪孫槃字子淵服字豈潛各攜詩卷來相
與在酒邊細細讀之足以起子醉石眠花
影吟廊步蘚紋春水綠平野夕陽紅半山

一樽溪上別孤棹雨中行此槃之作也一
燈深夜雨幾處不眠人一草亦關春造化
衆星能表月精神此服之作也如此等語
不可枚數摘其一二以識之當自有識者
爲其賞音

歲暮作書懷寄林玉溪

吾年幾八十暮景不勝斜老鶴猶能語枯梅強作
花一心爲死計無意問生涯有酒時相過東隣八
九家

笑共梅花語窮難與命爭人皆居煥館我獨墮寒
坑假合非吾道幽棲了此生門墻元自靜群小莫
從橫

袞袞日不暇看看歲又徂一生賦茅屋幾度換桃
符天肯容吾老人皆笑我迂玉溪何所見時復問
詩癯

壬寅除夜

今夕知何夕滿堂燈燭光杜陵分歲了賈島祭詩
忙橫笛梅花老傳杯栢葉香明朝賀元日政恐雨

相妨

癸卯歲旦

淳祐第三載正朝把一杯老夫真是病賀客不須
來擇日脩茅屋當春覓柳栽新年莫多事且放好
懷開

新年多雨一日晴色可喜

一晴良可喜始覺好新年綠漲春前水青開雨後
天看花吾老矣把酒興悠然病脚妨行樂三杯歸
醉眠

讀三學士人論事三書

邦計傷虛耗邊民苦亂離諸公事緘默三學論安
危災異天垂戒脩爲國可醫傳聞上元夜絕似太
平時

黃屋見聞遠朱門富貴忙屠沽思報國樵牧解談
玉能轉禍爲福毋令聖作狂草茅垂白叟尚擬見
時康

六月

日聞王鑑除殿前都虞候孟

變

路策應大使時制司籍定漁船守江甚急

聞說北風凜其然其不然新除策應使急點守江
船設險渾無地扶危賴有天吾皇自神武北伐美
周宣

送王仲彛制機宰瀏陽

一身供世用六月赴官忙當此炎天熱知君心地
涼吏能師卓魯縣界接瀟湘試飲瀏陽水清清滋
味長

瀏陽誰謂小桑柘萬家春遠宦逢知己推心在惠
民速宜還縣債聞早綴朝紳說與諸公道方巖後

有人

送黎明府

黃巖萬家縣山海界民屋百里蜀中秀一廡天下
無財多能辦否官滿賦歸歟已作青雲料猶驚急
急符

縣債三年了鄉心萬里飛一身如許瘦百姓不妨
肥買宅憑誰辦抱琴何處歸諸公競推轂穩去着
朝衣

訪西澗岓王深道

諸王居處僻古屋滿山坡傳到宋淳祐來從晉永和詩書歷年久名勝結交多一澗流芳潤滔滔秋水波

諸老傷凋謝淒涼屬此時相從一夜語忍讀四哀詩世事生愁緒秋風吹鬢絲黃花香晚節詵與秀岩知

吳荆溪四哀詩語一作話

東谷王子文死讀其詩文有感

東谷今何在騎鯨去渺茫荆花半零落岩桂自芬芳議論波瀾濶文章氣脉一作味長遺編猶可考何必

計存亡

挽溫嶺丁竹坡

瀟洒復瀟洒是爲丁竹坡生涯渾草草詩句自多
多恨不識是叟悲哉作此歌數編遺稿在不共葬
烟蘿

廣東漕李實夫四首

乾坤雖廣大人物不能多議論還諸老文章自一
科從橫負才畧緩急任干戈不有濟時傑其如世
事何

志士規模遠非時展布難莫言南地暖須念北風
寒楮賤傷財力兵驕稔禍端盛衰關氣數天下幾
時安

千里長城手如何在廣州共談天下事莫上斗南
樓瘦鱗露封侯骨忠懷報國秋丁寧北來鴈邊信
怕沉浮

忘家甘旅食憂國厲愁顏有客佩金印何人守玉
關風霜晚秋後天地夕陽間痛灑傷時決別公歸
故山

求安

愁來須強遣老去只求安酒熟思招客詩成勝得
官梅花天下白雪片夜深寒衲被蒙頭睡儵然百
慮寬

秋日早行

鴈叫秋容老烏飛曙色分晨炊何草草宿酒尚醺
醺野曠連滄海山長帶白雲馬行沙上路驚起白
鷗群

何季臯司理故人也作詩見相勉意二首

梅花庾嶺外別是一山川那使民無訟須知獄有
冤心常存正直法不尚平反于氏緣何事陰功到
子孫

南州通外國濁海溷清波人以廉稱少官從辟奏
多持身宜潔白事上莫依阿話別無他語留心政
事科

石洲遇陳季申話舊

綠樹挂烏喙清波照白頭合隨秋燕去那作賈胡
留紅吐檳榔唾香薰茉莉毬樽前話疇昔一笑不

能休

廣州所見

風波行險道萬里絕人烟幾箇下番客經年渡海
船人皆貪船貨我獨惜青錢
留心禁
漏川

書事

喜作羊城客忘爲鶴髮翁問天求酒量翻海洗詩
窮已過西南道適遭東北風扁舟載明月枉作賣
油公 西南道乃廣州一稅場

前李約作漕時請遊藥湖出新寵佐尊一
意顧盼無暇與賓客語僕有詩云手拍錦
囊空得句眼看檀板遇知音漕大怒謂舟
中有麻油不投稅拘留其船

別李司直蕭小山

老作五羊客時從二妙游文星照南斗吾道欲東
周合作金閨彥那爲玉帳留嚴徐聞有召吾亦辦
歸舟

峽山二首

山近江如束林深路欲迷。平沙印虎跡。絕壁聽猿
啼。綠水人誰釣黃茅地可畦。幽居堪避世。何必武
陵溪。誰一作難

欲訪飛來殿維舟上峽山有溪流屋下無路入雲
間。翠解捐金索猿能記玉環無從旌往事有地足
躋攀

舟行英德江上和許季如詩

跌坐篷窓底客身無事時閑觀曲江帖因和許渾
詩舟楫聊乘興溪山若獻奇數峯英石美天巧豈

人爲

重陽舟中

菡舟何寂寞絕不見人家無處沽村酒何從問菊
花溪山澹相對節序謾云嘉牢果烏紗帽西風日
又斜

故人陳秘書家有感

晚春風雨後花絮落無聲綠泛新荷出青鋪細草
生私蛙爲誰噪老犬伴人行舊日狂賓客樽前笑
不成

林塘劫火後更作兩家分筭拆頭捨地松高氣拂
雲老夫來訪舊稚子解談文自是麒麟種那隨鴈
鷺群

聞時事

鴈豈關兵氣魚常被火災御軍先擇將立國可無
財濟世須人物忠言是福媒西山今已往更待鶴
山來

口號送柳心箴劉使君

適有柳心箴勲持贈君來從三嶼國織作五花

文涼暖宜冬夏清光隔垢氛桃笙與蘄草優劣迥
然分

懷江村何宏甫自贛上寄林檎

人好物亦好交深誼轉深他鄉如對面異體實同心
未得平安報相思長短吟無從回去馬有便寄
來禽

按江西曾憲二首

樞星居紫極遙映使星明天下推名德君家好弟兄
一臺振綱紀列郡想風聲不試褰帷手官曹未

易清

諸賢皆在位治效尚遲遲汗吏未能去明君若可
欺外臺天耳目正士國根基既攬澄清轡那無按
察時

臨江小泊

艤舟揚柳下一笑上茶樓適與胡僧遇非因越女
留雲行山自在沙合水分流獨酌臨清泚知心是
白鷗

寄鄭潤甫提幹

吾鄉有佳士官小惠才多文可登詞苑直宜居諫
坡春風能活物砥柱不隨波客裏喜相遇飄零素
我何

趙丞話舊

憶作齊安別相逢直到今寒溫片時話故舊百年
心折柳送行客栽松遇賞春樽前強歌笑兩鬢雪
霜深

謝蕭和伯見訪

定交雖日淺老眼見君深急誼真如渴能詩不肯

吟江湖尊白髮土首視黃金野客無邊幅相看話
此心

平江城外

郭外人烟好行行過北阡迎船分社肉汲井種春
田綠樹前村路黃梅細雨天客游鄉土別景物足
同然一作前

董侍郎蒙泉書院

一室可忘老四窓宜讀書正教樽有酒莫問食無
魚客子家何在明朝歲又除思歸徒自苦安處即

吾廬

董叔震書堂

數椽深巷底朝夕自委蛇勲業時看劔詩書日下
惟古碑迹素壁破硯浴清池燈火伊吾夜猶如未
第時

別董叔宏兄弟

年老思家切交深話別難扁舟行且止尊酒強相
寬客路歸來晚人情却後看西風吹過鴈千萬寄
平安

聞邊事

昨日聞邊報持杯不忍斟壯懷看寶劔孤憤裂寒
衾風雨愁人夜草莽憂國心因思古豪傑韓信在
淮陰

宜春東湖呈趙使君

東園有佳趣五馬共登臨介石見古意月臺延賞
心雖然近城郭元不遠山林能使一州潤秀江秋
水深

次韻董叔宏山中有感

山中行樂處百感上心來宿霧掃不去好風吹自
開巖花新得句野水莫添杯不盡登臨興扁舟棹
月回

訪蒼山曾子實

故人子曾子居處近金精福地佳山水詩家老弟
兄十年重會面一笑最關情萬象亭前月今宵爲
我明

事機

天下事機別朝廷局面新臺官遷不定年號改何

頻黜陟由明主安危伏老臣祖宗成憲在即此是
經綸

所聞二首

中使入廣詔宣崔右相賊起梗道

屢遣和戎使三邊未解兵武夫惟漸重
輕天下思豪傑君王用老成時無渭濱叟白首致
功名

右席須賢久丹書幾度催賊驚中使轉人望相公
來問政曲江宅調羹庾嶺梅莫因多病後虛出應
三台

歸舟已具李憲樓舍有約盜賊捷遣見避亂

者可憐

歲律又云莫臨風詠式微兩臺方有約一棹未成
歸夜宿三家市天寒百衲衣豺狼當道路鷗鷺亦
驚飛

倉猝拋家舍遑遑走道塗依山結茅戶

宜檢反摘一作屋

草當園蔬老稚朝朝哭生涯物物無避軍兼避寇
何日得安居

張端義應詔上書謫曲江正月一日贛州相

遇

夏世心何切謀身計甚踈樽前話不盡天下事何
如漢武求言詔賈生流涕書龍顏那可犯謫向曲
江居

正朝送遷客好去看梅花此嶺幾人過念君雙鬢
華直言知爲國遠地莫思家翻石叫虞舜傷哉古
道賒

聞杜儀甫出臺

與知宗題山前甚厚善

臺官關係重用捨一何輕請老多慚德斯人有直

聲儻來視軒冕歸去即功名莫拜寬堂墓傷心隔
死生

揚州道宮安下制幹朱行甫撫幹方巨山連

騎相訪

道院群僊集高軒二妙來文章清氣足談笑老懷
開落木三秋晚黃花九日催何當陪勝錢一作錢共把
蟹教杯

朱行甫和前韻送別烹鹿薦酒

此別真成別從今去不來佳人難再得惡抱向誰

開客路一歸晚家書幾度催慙慙見君意烹鹿薦
離杯

題宋安撫月中香

移根廣寒殿栽近讀書堂良夜月中影秋風天上
香此花真異種萬木莫同芳他日五枝秀何慚竇
十郎

訪方子萬使君宅有園林之勝

使君居處好在郭却如村屋帶園林勝門無市井
喧蟄龍將變化雞鳳亦騰寒暑苦無暇相從聽

雅言

諸詩人會于吳門翁際可通判席上高菊澗
有詩僕有客星聚吳會詩派落松江之句方
子萬使君喜之遂足成篇

客星聚吳會詩派落松江老眼洞千古曠懷開八
窓風流談奪席歌笑酒盈缸揚陸不再作何人可
受降

別邵武諸故人

白髮亂紛紛鄉心逐海雲此行堪一哭無復見諸

君老馬尋歸路孤鴻戀舊群酒闌何處笛今夜不
堪聞

一老儒為貴人燒丹丹垂成而走因此失所
道途多險阻此老欲何之命薄丹砂走天寒白髮
悲從教達官罵忍受小兒欺月夜雙烏鵲飛鳴繞
樹枝

江上夜坐懷嚴儀卿李友山

江清天影動樓近角聲雄楊柳枝枝月芭蕉葉葉
風佳人難再得良夜與誰同別後知何處吟詩句

句工

江上

扁舟泊江渚喜近酒家門出網魚鰕活投林鳥雀
喧無橋通竹處有路到桃源一見南塘字凄然憶
故園僕所居之地名

簡曾才叔

虛庭貯明月酒醒獨登樓偶逐一笑樂遂成三夕
留烏鴉工報曉蟋蟀早吟秋欲赴東溪約一作釣煩君
具小舟

舟中

扁舟何處泊沙渚夕陽邊遠浦橫魚網高山起燒
燭客行今老矣秋思日凄然且復開懷抱囊中有
酒錢

史賢良入蜀有錦江詩卷陳誼甚高

學道世情薄論交誼氣深設懷三獻玉肯受四知
金萬里銅梁道千篇錦水吟一芹供七筍聊寓野
人心

賢良一和五篇不可及

世路從他險輸君酒盞深立談雙白壁一諾百黃金志大不少屈詩工非苦吟相隨萬里去老鶴豈無心

永新彭時甫館僕于玉峯樓龍子崇來話舊
智艤溪頭棹來敲月下門江湖十年別故舊幾人
存聽兩夜同榻論心酒一罇不須談世事萬慮滿
乾坤

所聞

北風如許急亦使客心寒近得襄陽報仍聞蜀道

難三杯中夜酒一枕幾時安江上兩都督何人上
將壇

訪徐益夫

仲蔚蓬蒿宅終朝只閉關無心與時競未老得身
閒綠繞巡除水青橫隔岸山客來新酒熟相對一
醅顏

渝江綠陰亭九日燕集

佳節重有感人間行道難登高苦無地把酒一凭
欄山迥暮烟合江空秋水寒沙頭有鷗鷺莫作鴛

鴛者

九日江亭上。誰憐老子書。要人看白髮。不用整烏紗。寄興題桐葉。長歌醉菊花。歸心徒自苦。猶在楚天涯。

題渝江蕭氏園亭

體仁體信伯仲佳士也一區同居不出戶庭而得溪山之勝自昔有秀江亭山谷先生嘗留題云澄波古木使人得意於塵垢之外蓋人閑景幽兩奇絕耳所題之壁猶

存

一作體仁體信佳公子也一區同居鄉里補善石屏見而喜之為題三詩

相識雖云晚相知蓋有年同門好兄弟華屋帶林泉笑傲一樽酒登臨九月天客懷秋思豁萬象在吟邊

三逕逐高低旁通桃李蹊

一作陟彼芙蓉涼臺無

六月釣石俯雙溪醉欲眠花下吟來過竹西風流

黃太史古壁有留題

近市翫塵遠幽居古意存詩人常下榻俗子莫登門日坐圖書府時開風月樽野夫因到此忘却海

雲村

新朝士多故人愁吟寄之

野鹿自由性孤鴻不就群飄零生白髮故舊半青
雲憂國家何有愁吟天不聞北風吹漢水胡騎政
紛紛

題新塗何宏甫江村

近郭是蒼塵移居在水濱江山千古意松竹四時
春賓客門無禁詩書筆有神何郎好心事鷗鷺亦
相親

石屏詩集卷上終


石屏詩集卷下

夜吟呈趙東巖

汲井漱殘酒。行吟到夜分。
一軒清似洗。萬籟寂無聞。
風送迎。秋雨天收。翳月雲鷄鳴庭戶。白人
事又紛紛。

吾鄉陳萬卿儒者能醫見宜春趙守盛稱其醫藥之妙著本草折衷可傳

本草有折衷儒醫功用深何須九折臂費盡一生心藥物辨真偽方書通古今有時能起甦一作一劑



直千金

九月七日江上阻風

艤棹依喬木。扶筇涉淺沙。雲山多態度。水月兩光華。白首吟詩客。青帘賣酒家。明朝風不定。來此醉黃花。

自和前詩隣舟皆鹽商

蘆花
總被利名役。機心欲算沙。舟行阻風色。客夢負年華。洲渚四五曲。漁樵八九家。江村無限好。滿眼是蘆花。

有感

皺眉觀世事。把酒讀離騷。天下無公論。胸中有古刀。徒然成耿耿。何以制滔滔。不逐群飛轉。孤鴻畢竟高。

春陵山中作寫寄孔海翁

昨日分携後。回頭望竹關。相親唯白水。所見但青山。雲近人家遠。苔生石徑斑。聞鐘知有寺。又在渺茫間。

夏日雨後登樓

夏日不苦熱病軀能少康數峯樓上景六月雨餘
涼今古兩虛器乾坤百戲場人生如寄爾聊以醉
爲鄉

偶見飛蝶追思舊遊錄之

早被春情誤渾身着粉衣最宜花上見解向夢中
飛蜂媵爲游伴蛛絲設禍機滕王小圖畫一一造
精微嘗見滕王蛺蝶圖百十爲群真有飛動意

寄永嘉太守趙茂實

龔黃古賢牧政事見於今疾惡風霜手活人天地

心躬行循吏傳時作謝池吟我欲依劉表常憂老
病侵

身爲吟詩瘦家因好誼貧如何賢太守不念可憐
人楠井誰知處桃源莫問津秋風吹白髮滄海老
垂綸

正應求出示蜀中山水障氣勢甚雄偉李巽
巖題其後論其畫筆之源流二百餘字

妙甚丹青手能移造化功三川山水國半幅畫圖
中玉局人何在銅梁路可通巽巖扛鼎筆文與畫

爭雄

萬杉長老秀癡翁見示五言次韻

了得宗門事何憂常住貧聽師林下話是我眼中
人星渚二秋月廬山萬古春昭陵御書在歲久莫
生塵

借韻書懷

虛氣撐枯腹長身到老貧高吟常駭俗爛醉若驕
人京洛繁華夢江湖浩蕩春布衣如雪白不受庾
公塵

飲蕭和伯家醉登快閣和楊伯子題分明觀
韻

醉歸蕭史宅快閣倚西東山歛過雲雨江無起浪
風月行銀漢上人在玉壺中天眼照塵世應憐鶴
髮翁

客中歲晚呈何宏甫

歲事費料理三杯意適然與其愁度日曷若醉忘
年桑落冬前酒梅花雪後天不知身是客多謝主
人賢

先人東臯子小園七言人多喜之浼秋房樓
大卿作大字刻石

父歿名隨泯詩存世莫傳敢求大手筆為寫小園
篇詞翰成雙美光華照九泉托公垂不朽鐫刻到
千年

淮岸阻風

檣棹楓林外平沙步晚晴秋深紅鶴至波動白鷗
驚荻浦留三日江州計幾程夜來風色好行不待
天明

蕲春李文解后游江上園勸游人不可折花
未禁漁弋者不捕禽魚酒邊談論可聽乃中
洲先生之後葉水心嘗與往來

坐斷此江干池亭百畝寬禽魚全性命花竹報平
安有道行其志非時做甚官羊神更閒雅野服竹
皮冠

南康縣劉隱居

秋風送紈扇終日御瑤琴祇可自為樂不求入賞
音無心問軒冕此地即山林堪笑紅塵客飄零雪

滿簪

江臯

江臯有閑客。獨立對秋風。白鳥來無數。青林望不窮。斜陽方照晚。新月早騰空。得句從誰語。傾心酒椀中。

都下書懷

半月不把鏡。羞看兩鬢塵。讀書增意氣。携刺減精神。道路誰推轂。江湖賦采蘋。從來麋鹿性。那作帝鄉人。

鱖舟登滕王閣

散步登城郭。維舟古樹傍。澄江淨野色。虛閣貯秋光。卻酒淋衣濕。搗橙滿袖香。西風吹白髮。猶逐少年狂。

湖口

水落山增峻。江空石出奇。倚蓬看不足。解纜放教遲。沙上鴈初到。樽前蟹可持。中秋能幾日。又是菊花時。

夏日從子淵姪借茉莉一盆

舉眼驚如許，衰懷強自安。
愛涼臨水坐，遣病借花看。
物同天地入，各肺肝。從來涇與渭，混作一流難。

吳門訪舊

孟良夫侍郎有歲春園

去此十三秋，重來雪滿頭。
鏡顏加老醜，詩骨帶窮愁。
鳥語新晴樹，人尋舊倚樓。
歲春門下客，一半落山丘。

哭澗泉韓仲止二首

只選後篇，家記其臨終一節，故併錄之。

雅志不同俗，休官二十年。
隱居溪上宅，清酌澗中

泉慷慨傷時事，淒涼絕筆篇。
三篇遺稿在，當並史

書傳

聞時事驚心，得疾而死，作所以桃源人所以尚山人所以鹿門人三詩，此絕筆之詩也。

忍貧長傲世，風節似君稀。
死後女方嫁，峽中兒未歸。
門人集詩藁，故卒服麻衣。
澗上梅花發，吟魂何處飛。

瑯琊山中廢寺

欲訪山中寺，沿堤石甃長。
寶坊兵後廢，御帖窖中藏。
故址生秋草，寒窓帶夕陽。
孤僧出迎客，滿口話淒涼。

鄂州戎治靜憇亭

幽亭何處尋巖樹碧森森
獨坐生雲石少安經世
心伴人雙鶴立多事一蟬吟
提劍翻然起中原秋
草深

江上

江上維舟穩人間行路難
數朝花雨細一夜社風
寒燕語能留客蛙鳴豈爲官
苦吟成底事贏得瘦
團圞

趙端行杜子野游虎丘有詩僕因思舊與趙

子野同宿唱和留題

出城十里許有此一山門
丘在虎無迹池清劍有
痕孤松冠巖頂萬竹繞雲根
借問東軒壁舊題存
不存

海陵光孝長老驥無稱山谷後也共談時事
且說黃巖柑橘之美

俗子避形影僧家共往還
高談犯時忌妙語發天
慳霜後思新橘夢中歸故山
何時免奔走終老白
雲關

杜仲高高九萬相會

杜癖詩無敵高髯盡絕倫笑談能不朽富貴或成塵
今古多奇事乾坤幾恠民相逢不容易一醉楚江濱

衡陽寫懷簡王景大趙俊卿

夢覺他鄉枕寒生半夜衾客程湖外遠秋意雨中
深老馬尋歸路羈鴉憶故林家書連數紙難寫此時心

懷趙德行學慈湖從趙元道游

所學源流遠澹交滋味長者來渾易與別去自難
忘獨客夢千里佳人天一方細觀賓退錄亦足慰
淒涼

上封

樓臺逼霄漢窓戶納雲霓
回顧千巖路如登萬仞梯
泉從山頂出雪壓樹頭低
高絕無人境非僧不可棲

九日

今日知何日他鄉憶故鄉
黃花一杯酒白髮幾重

陽日晚鴉爭宿天寒鴈鳴霜客中無此醉何以敵
淒涼

春陵道上

春陵音元杜少陵有春陵行

雲際尋行路時逢一兩家山川閑世界耕釣小生
涯病竹長新筍寒芒搖落花溪翁解延客連煮數
杯茶

化成巖

城郭囂塵外江山勝槩中鏗然一灘水和以萬松
風夾徑森竒石危亭納太空蒼巖不能語曾識

皇公

喜聞平峒寇

峒寇都平了官軍奏凱歌千山通道路一雨洗干
戈天地和風轉江湖春水多蜀中無近報西賊定
如何

郭伯秀約聯騎春游不去有詩

心老尋春懶年衰跨馬難便能相強去未必有真
歡獨酌三杯妙高眠一枕安好花如可拆覓取數
枝看

訪陳復齋寺丞于私第

以時爲出處真有古人風奉母易爲孝事君難及
忠閒居非傲世直氣尚摩空語及朝廷事乾坤萬
感中

泉南

南地無冰雪常疑暖作災晝昏山霧合寒變海風
來攏麥街芒早梅花帶葉開客中歸未得歲事漸
相催

代人送別

南浦春波碧東風送客船別君楊柳外揮淚杏花
前粉壁題詩句金釵當酒錢一聲離岸櫓心碎楚
江邊

度淮

一雨足秋意孤吟寫客懷人情容易變身事苦難
諧每日思歸浙今朝却度淮此生煩惱造物畧畧爲
安排

蘄州厲使君七夕祈雨

樽俎忘佳節衣冠肅廣庭爲民祈一雨何暇賞雙

星五馬無慙德。三龍合效靈。前山好雲氣。早已動雷霆。

廬州界上寄豐帥

身健心先老。時危事愈乖。無成携短劍。有恨滿長淮。村酒時時醉。山肴日日齋。功名非我有。何處問生涯。

贈孤峯長老

孤峯何處住。惠遠舊林泉。日用無非道。心安即是禪。幽棲雲壑底。夢寐雪蓬邊。何日山陰道。同尋訪

戴船

吳子似

酒櫻桃熟。柳樹陰青山。去人遠。黃鳥話春深。薄俗非吾道。虛名愧此心。休言今不古。又恐不如今。

世事

世事真如夢。人生不肯閑。利名雙轉轂。今古一凭欄。春水渡傍渡。夕陽山外山。吟邊思小范。共把此詩看。

冬日移舟入峽避風

棹入黃蘆浦驚飛白鷺群霜華濃似雪水氣盛於
雲市遠炭增價天寒酒策勲同舟有佳士擁被共
論文

湖上

久住人情熟湖邊酒可賒來時飛柳絮今日見梅
花十載身為客幾封書到家斜陽照林屋獨立數
棲鴉

讀改元詔口號

伏讀改元詔仍觀拜相麻競傳新政事方見好官
家雪作豐年瑞梅開近臘花路逢江上客立馬問
京華

喜見新除目焚香洗眼看老儒居翰苑正士作臺
官有道為時用非才處位難寄聲崔與李催慚促
到長安

國以人為重人惟德可招九重方厲政諸老盡歸
朝盛事追三代清風動百僚切聞天上語歡喜到
漁樵

罪言

盜賊干戈後安知有太平衆人皆競利百姓不聊
生國用何能足官曹未易清漢家政虛耗第一莫
言兵

李深道得蘇養直所寫深字韻詩一作翁景山崇
故人作字送行

表出塵埃外濃薰蘭蕙一作班馬香風流晉人物高古

漢文章老眼不多見前程豈易量三杯話胸臆一

笑對雲驤

秋興有感

客游江海幾度見秋風遠浦蘆花白疎林秋實
紅紅人情朝暮變景物古今同老眼猶明在從教兩
耳聾

謝王使君送旅費

風撼梅花雨露籠楊柳烟如何殘臘月已似半春
天歲裏無多日閩中過一年黃堂解留客時送賣
詩錢

舟中小酌

獨立秋風裏悵然思故鄉街頭沽美酒船上作重

陽籬菊一枝瘦溪魚三寸長客中聊爾耳亦可慰
淒涼

塗中見人家賣酒

連歲遭饑饉人無糴米錢今秋好行路到處說豐
年村酒新芻濁溪魚出網鮮黃花留客醉况近竹
林邊

長汀寄李使君

在處晚禾熟經今瘴霧消山林無盜賊道路有歌
謔人喜逢豐歲誰知感聖朝溪橋閑寓目魚鳥亦

道遙

光澤溪上

艤棹西岩下舟人語夜闌風林無鳥宿石窰有龍
蟠月色連沙白灘聲入夢寒曉來新得句寄與故
人看

約游曾參政西墅病不能去

骨肉去家遠異鄉童僕親老身潭顛汝久病亦愁
人無暇遊西墅尋醫訪北辰主翁翻作使奔走莫
勞神

趙敬賢送荔枝

荔子固多種色香俱不同新來嘗小綠又勝擘輕
紅大嚼思千樹分甘僅一籠嘗觀蔡公譜夢想到
莆中

自漳州回泉南主僕俱病

雅興難忘酒羈懷不耐秋坐窮思賈劍扶病強登
樓適有坐中客來從邊上州所談驚老耳身世併
成憂

寄趙漳州話病

聽雨無聊賴高眠獨掩扉塞鴻書不到海燕約同
歸吾道關通塞人情有是非荊州相別後玉祭更
誰休

客自邵武來言王堃使君平寇

聞說賊來日君能判死生扁舟載母去倚劍到天
明百姓各逃命四旁無援兵王尊豈非勇獨自守
孤城

太守自監軍片膽大如身立馬斬數賊犒軍捐萬
緡威行千里外手活一城民孰謂書生怯書生中

有人

新年自唱自和

聖朝開寶曆淳祐四年春生自前丁亥今逢兩甲
辰黃梁一夢覺青鏡二毛新七十八歲叟乾坤有
幾人

死灰無復暖橋木不逢春近日愁多病今年歲在
辰處喧如處寂求舊不求新笑問長河水誰為不
老人

江山一夜雨花柳九州春過節喜無事謀權要及

辰年年仍歲歲故故復新新把酒有餘恨無從見
古人

聞嚴垣叔入朝再用前韻

淒涼風雨日強把甕頭春獨守空虛室那逢耗磨
辰見荆楚歲時記正月
十三日為耗磨辰詩家青眼舊世路白頭新
每誦梅花句一心思故人嚴公有詩云過却海棠
花膾炙人口

我本江湖客歸來二月春居多閉門日未卜賞花
辰繞樹鵲聲喜隔簾鶯語新可憐垂白叟却羨踏

名曰不
磨

青人

吾族兩派而下吾之一派衰落殆盡諸孫一
兩入而已其勢不絕如綫彼之一派富盛一
日出門有感

門外長河水有時鳴不平河邊古樟樹亦各有結
榮人事關時數春風莫世情賢哉滄海月夜夜一
般明

王深道奏名而歸

忠言犯時忌決不中高科一日成名了諸公屬望

多還家寧久住經世欲如何西澗一泓水行通滄
海波

朱仲寔少府到官無幾日即入僉幕官滿送
行二首

才智人難及上官能用賢梅仙無一事蓮幕坐三
年政譽傾千里歸途仰二天辟書聞早上松菊莫
留連

孝友平生事守廉天下難居官一日俸闔室幾人
餐病骨何妨瘦吟骨不肯寒功名未須問且奉版

輿安

次韻盱江李君昉見寄二首時李在包守郡齋

久作丹丘客疑君去復來高吟闖風雅妙句斲瓊瑰道誼心千古文章水一杯荷花時話別別後又梅開

共醉荆溪酒不論杯淺深定交從此日識面早知心久缺寒溫問忽聞長短吟玉霄亭下路幾夜夢相尋

感寓三首

古今通一理趨鄉自多門賢士玉成美貪夫金注昏誰知身是患人以道爲尊前輩死姓名千載存

誼利不同道盛衰何用疑布衣甘寂寞純袴自矜持勿謂人爲巧待觀天定時銅山或一作餓死富貴五羊皮

自覺心無愧何須座右銘人將金作塢吾以石爲屏年老醫難療天寒酒易醒菊花香到死不肯就

飄零

新歲書懷四首

衰年百病身淳祐五年春塵世自多事風光又一
新鄉人方拜相野客自垂綸說與烟波侶海濱非
渭濱

七十九歲叟時吟感寓詩年高胡不死身健欲何
為細柳綠垂地小桃紅滿枝春風不到處枯蔓掛
踈籬

老病從人笑兒童識我誰窮愁無地着心事有天

知鵲噪緣何喜蛙鳴豈為私如何得懷抱長似醉
眠時

正月後二月百年如一年世間人易老天下事難
全生計麥十斛傳家詩幾篇眼前雖不足心地自
超然一作村翁不識字白屋貯青錢

小園

小園春欲半老子作兒嬉政喜花開蚤還愁客到
遲詩當得意處酒到半酣時蜂蝶來無數無知却
有知

為石雲悼鶴

瘞鶴有故事花邊結小筵不登千歲壽無復九皋
鳴問汝緣何死主翁無限情最令人憶處側耳聽
松聲

挽立齋杜丞相

邪正不兩立國家當再興有時須有命稱德不稱
能方喜千年遇如何一旦薨世間無哭處吾欲哭
昭陵

蕭飛卿將使赴湖北戎幕詩送其行兼簡秋

壑賈總侍二首

文章蕭穎士一劔去從軍遠望西關路愁看兩浦
雲九霄騰意氣萬里取功勳馮上一杯酒須斟滿
十分

鄂渚三千里遙遙望使星江湖今寂寞桃李半凋
零世有一秋壑時無兩石屏平生不相遇老眼向
誰青

晚望懷長沙故人

却扇清風起樓頭坐晚涼青山連遠水綠樹帶斜

陽客路傷離別人情果在亡定應今夜夢隨月到
瀟湘

寄虛齋趙侍郎

老眼開還闔愁懷醉不醒乾坤多變故人物曉天
星藥石在時切著龜見事靈得公十數輩亦足壯
朝廷

災異天垂戒安危事可知試將黃兩證請問白雲
司對客論孤憤傷時賦五噫醉中忘萬慮安得酒
如池

斗山子王深父作石屏記爲老夫書其文甚

佳采記中語作五詩致謝

細讀石屏記臨風覺厚頰如何一片石欲比衆名
山浪迹江湖上歸身巖壑間漁樵爭半席人笑老
癡頑

細讀石屏記誠然愧我心蘭蓀借芳馥金石假聲
音俗子方騰謗朋儔合獻箴分爲無用物白髮委
山林

細讀石屏記尋幽到水涯老人相問答屬意在岩

花江海浮天濶山林去國踪
草茅最深處認作野人家

細讀石屏記堪嗟老病身
誰知饑欲死曷取壽長
貧雪片豐年瑞梅花臘月春
今朝一杯酒誰道是
生辰

細讀石屏記多君才思清
南山數峯碧北斗七星
明風土鍾奇秀文章到老成
待看黃鵠舉垂手取
功名

寄建康留守制使趙用父都丞侍郎

蠻貊聞名姓當今有此人
片心天共廣一笑物爲
春花滿金陵路風清玉塞塵
九重方簡注四海望
經綸

燕許文章筆片言輕萬金
先人十詩序孝子一生
心入手方爲寶三年等到今
九泉應有望取壁照
山林

姪孫亦龍作亭于小山之上
余以野亭名
之得詩五首

平地變丘壑安排若自然爲山移
白石鑿沼貯清

泉粟里有松竹蘭亭無管絃軒裳非我事在野不妨賢

蔡外有餘地登臨作此亭心如喬木古眼共遠山
清社酒誰同醉村歌自可聽有時來夜坐收拾讀書螢

詩禮家聲重田園活計饒自甘爲野客不願仕王
朝時爲花開眼誰因米折腰此心安出處何日不
逍遙

勿謂此亭水歸然氣不群靜中觀變化閑處立功
勲水細通巖竇亭高壓海雲隱居行素志不負聖
明君

田間四五月此景看來稀翼翼青苗上雙雙白鳥
飛茅茨林下住簑笠雨中歸拍岸瓜藤水不須憂
歲饑

寄鎮江王子文總卿

一代文章手官如水樣清三軍皆飽德諸將共談
兵鐵甕橫天立金山壓浪平北人向南望
月
分明

又送行二首

荏苒歲云暮雪霜天正寒取程毋大急御下放教
寬朝夕去家遠關山行路難邊頭辦功業恐不在
儒冠

荆門在何許鄂渚小躊躇宿處好看劍客中宜讀
書交遊天作合江漢景何如窓戶半天上南樓好
寓居

送包使君入朝除左曹郎二首

宋齋儒者政賞罰自宜民世欲無公論天知有正

人側身觀宇宙平步履星辰試把安危事從頭問
化鈞

金門行入奏何以告君王請下求賢詔兼陳活國
方解紛

在床

救弊細思量若見高常簿言予病

送李明府赴太平倅

黃巖號難治能者治何難堯李民心悅風霜吏膽
寒公行無不可私請莫相干三尺兒童輩皆知好
長官

人說陳胡蔡合君為四賢一廉官似水三載吏無
權政自詩書出民從教化遷神明判事筆一出萬
人傳

庭闈定省外都是坐廳時盡日身無倦對天心不
欺縣花潘岳賦池草惠連詩磨取九峯石刊成德
政碑

通守太平州金陵在上頭風寒當一面江
艘此日要人物九天寬顧憂詩書用處別游統換
封侯

得古梅兩枝

一作雲川劉

家古梅

老幹百年久從教花事遲

一作有此老梅似枯元
持君從何處移

不死因病反成奇玉破

一作點稀踈蓋苔封古恠枝

誰能知我意相對歲寒時

一作連朝看不足
政要看花罷

貧作負恩人為何宋甫作

九陌塵中事三生石上身狂為好詩客貧作負恩
人十載江村別扁舟塗水濱音書久不至得夢往
來頻

題徐子英小園

奉親營小圃僻在水之湄霜露蔡公賦假山慈竹
詩人皆稱壽母我獨喜佳兒八行家風在三遷憶
舊時

登祝融

秋風吹拄杖直到祝融顛目擊三千界肩摩尺五
天扶桑暘谷畔青草洞庭邊雲氣無遮障分明在
眼前

長沙有感

自飲長沙酒春風幾醉醒江波隨意綠山色爲誰

青鳥好因人好龜靈不已靈江離與杜若何幸入
騷經

山中少憇

地僻人稀到山寒水欲冰聞鐘知有寺見犬不逢
僧斷壠森一作生喬木頽蒼樹古藤斜陽照孤影詩骨
瘦峻嶒

真州上官漕勸農

小隊出行春旌旗帶野雲草成平寇檄翻作勸農
文幕府多奇士詩書策異勳請將邊上事一一奏

明君

豫章東湖避暑

行坐自徜徉吟聲遠屋梁曉烟滋柳色晨露發荷
香以我一心靜參他六月涼淵明知此意高卧到
羲皇

徧訪諸亭館蒼苔掩舊蹤十年如昨日萬象又秋
容閱世存喬木公堤倚瘦筇何人殺風景斫盡木
芙蓉

見江東繡衣表廣徵

半宮歸徵數安老委大臣金門一回首玉節又臨
瓦雅志思行古清風不受塵潔齋家學舊用處日
如新

洪子中大卿同登遠碧樓歸來有詩

角巾華屋下丘壑在其旁寄興青山遠憂時白髮
長無心當世用袖手看人忙善自為身計須傳活
國方

濠州春日呈趙教授體國

柳似眠初起梅雖老可觀水開春水活風暖雪泥

乾得酒忘為客談詩不論官無人知此意一笑對黃冠

訪古田劉無競潛夫宰建陽無此宰有聲人言自有

前說建陽宰古田今似之難兄與難弟能政更能詩文字定交久江湖識面逢人傳花萼集俱水心知

淮上四九江

江水接淮水扁舟去復回客程官路柳心事故園梅活計魚千里空言水一杯石屏有茅屋朝夕望

歸來

送陳幼度運幹

臺幕三年最雲霄萬里程西山餞行色南浦棹新晴骨秀荆山璞胸涵元氣英更携扛鼎筆紙合上蓬瀛

君是青雲料吾當白髮年駑駘傍騏驥魚鳥各天淵他日難忘處寒宵不忍眠挑燈雪窓下共讀鴈奴篇

燕

聞說烏衣國低連海上村春來避霜雪秋去長兒
孫華屋語如訴故巢多不存雙飛惱幽獨紅袖有
啼痕

蘄口阻風務官點稅

舊有一相識爲務官

江漲行無路西風又打頭頗聞商婦怨自作賈胡
愁

生朝對雪張子善有詞爲壽

焚香拜天貺滿眼是瑰琦臘月雪三尺春風梅數
枝登樓忘老態對酒展秋眉爭唱陽春曲山翁醉

不知

郭外翁

郭外生涯少城中糴米歸種花無處賣挑菜入籃
稀風撼傾欹屋寒生藍縷衣此翁何所樂談笑傲
輕肥

鄭南夫雲林隱居

一來陪勝踐餞再到惜蹉跎記得山中景行尋竹
外坡天寒梅信早海近鴈聲多烟渚蒲洲外時聞
款乃歌

夢與趙用父王子文陳叔方相會甚款

鼎足當州縣別來音問稀故人俱顯達吾道亦光
輝三鳳夢中見孤鴻天外飛應憐江海客白首未
成歸

戲呈趙明府

堂堂附郭縣深遠半如村能共斯民樂渾忘太守
尊梅花高可折橫浦撓無渾欠與詩狂者清談共
一樽

訪曾雲巢

一老今無恙諸公昔與儔隨時難苟合懷道早歸
休古似陶元亮全如秦少游筆端鋒銳別有待續
春秋

冬暖

天下兩霜雪朝曦與暮霞江梅逢臘蕊岩桂更冬
花地暖宜爲客時難重憶家楚山當晚眺歸興逐
樓鴉

許提幹湖上下築

才氣有如許功名不可無樂從閑歲月養就大規

無限感慨

模雅志難諧俗幽居古並湖君看蓮下藕不與葉
同枯

見名園荒廢有感

喬木無留影殘花尚假妍荒池蛙叫噪破屋燕周
旋富貴偏多事風流得幾年墻東有寒士書種世
相傳

題黃仲文雙清亭

亭下新池好亭中古意存欲通溪上路遂闢竹邊
門自昔好賓客相傳到子孫會看司命鶴時到種

瓜園

靜寄五運管招客皆歲春侍郎故人因與花
翁孫季蕃話舊有感

來訪歲春宅因登靜寄堂異香薰寶鼎清樂送瑤
觴穿竹過花所尋梅見海宗白頭思往事無語立
斜陽

莆中遇方

邀出城買螭而飲一僧同行

出郭新虹雨倚棹新鷗天三盃古榕下一笑菊花
前入市子魚貴堆盤牡蠣鮮山僧慣蔬食清坐莫

流涎

天竺二訪明上座

顧影良堪笑胡爲八尺長蒼顏抗塵土餓咏說與
亡一作文章竹雨先秋爽松風生夜涼愛尋湖上寺留
宿贊公房

隆興度夏借東湖驛安下

一面對一池荷四旁楊柳坡樹陰遮日少屋敞受風
多疑是清涼國暫爲安樂窩人人爭避暑老子自
安安

撓越縣尉自號十竹極貧不肯爲官

十竹相依住一官真漫爲狂來裂軒冕窮不顧妻
兒疾世吟孤憤傷時賦五噫高名應不朽自作墓
中碑

張統制之子爲父求詩斲州城破足馬打圍
而出能知數謂時不可爲

夜半金城破身隨鉄馬飛橫揮三尺劍突出萬人
圍勇銳資神力功名與願違自能占氣數終老着
農衣

挽趙縣丞

好古好作人
各家為之窮

以緩急告雖千金不

雅志思行古幽居不愛官傾家為義舉竭力奉親
歡閱世開天鏡歲身作瓦棺聞知捐館日有夢跨
金鞍

挽沙溪項公苔湖居士

讀書不成事何恨老山林處世有容德與人無諍
心友于兄弟樂惠彼里閭深細把豐碑讀懷賢淚
滿襟

一曲苔湖上深居萬竹間自尋三徑樂早得一身

閑澆纒楮除水林林夾屋山傷心白雲際遺跡尚

班班

挽大溪姚祥叔即南

慶門今獨盛舊族有光華日坐不欺室天與積善
家山林娛晚境書史是生涯手種堂前桂君看身
後花

挽唐吉林詠道

博雅林夫子隱居城市中家貧書甚富學苦字尤
工四海交名勝諸文辨異同阿戎談更好端不負

家風

黎明府見示令叔顯謨開國墓誌求詩爲賦
三首

巴蜀何多事賢能見一時纔爲花縣宰早受菊坡
知關外科民急興元易帥遲預曾陳利病人不信
著龜

虜橫干戈密官清財賦強饑年無餓草亂後有金
湯五郡樹佳政諸公交薦章忠言動天聽惜去把
麾忙

寄家蒼雲上萬里故鄉愁未入金門奏還爲玉局
遊孤忠徒耿耿一病竟休休爲國惜人物淒然老
淚流

族姪孫子榮之子神童顏老不幸短命而死
哭之不足三詩以悼之

亘古英靈在顏面有後身年纔十三一作歲才過萬
千人學到由天悟文高見理真再生仍再天無路
問鴻鈞

昨應童科日群兒竝下風丰姿傾衆目文采動諸

公兩耳能兼聽六經皆暗通相期到揚晏有始柰
無終

汝祖積陰德汝翁多讀書汝生天報施汝死又何
如脩短有定數賢愚莫問渠冥官聞慟哭還許再
來無

神童諱顏老生而秀骨竒姿非凡子比及
晬父漁村徇俗修試兒故事羅書籍玩具
果殺於席顧盼無所取獨拏禮記一帙披
捲若讀誦然稍長口授以書兩耳兼聽日

記數千百言七歲能暗誦五經舉止應對
儼若成人十歲善屬文思如湧泉王帥幹
懋卿試以數題捉筆輒就懋卿稱賞不容
口嘉定元年丁酉參政范公嘉其俊異舉
應神童科第一後省中勅賜免解進士朝
廷以其能行文永免年十三卒

跋戴神童文稿

余昔訪戴君見顏老容貌豐且秀步趨詳雅
甚以遠器期之因語戴君曰昔楊公億晏

公殊皆嘗以童科顯世之過二公之神者亦多矣而或夭而殤者病於握苗而弗獲實也子宜經史華潤薰浸而茂悅之以需其成慎勿以世俗干祿之文揉其心扼其膽也去之幾何年今乃徒見其揉心扼膽之文而其人則已矣嗚呼九齡與玄昔賢所痛玄可與也齡不可與也雖痛奚益實佑三年乙卯春仲同邑杜範儀夫識
孫季蕃死諸朝士葬之於西湖之上

卜宅西湖上松翁死亦榮詎諧老方朔曠達醉淵明風月生前夢歌詩身後名風流不可見腸斷玉簫聲

櫻桃

綠樹帶朱實駝禽費彈丸獨先諸果孰堪奉五侯餐猩肉和瓊液瑣珠走玉盤同時得同賞芍藥滿雕欄

題清江臺

是日新打范石湖碑表于亭上

秋色無邊際酌之以醉顏亭高俯城郭未闕見江

山勝踐園林古好詩天地怪范碑生羽翼飛上畫
屏間

江西壬辰秋大旱饑臨江守王幼學監簿極
力救民癸巳夏不雨幾成荐餓監簿禱之甚
切終有感於天

懇切金章奏精誠玉帝知稻梁民性命豐歉國安
危苗秀方成實雨來還及時人能合天意天亦順
人為

天續饑民命神知太守心驕賜化霖雨六月借春
陰早稻先秋熟晚田儲水深去年饑欲死不料到
于今

監簿和篇

赤地我民苦寸心天我知元元爭救死凜凜強扶
危備具先三日憂端彼一時倏然返生意人力豈
能為
叫得神明力挽回天地心連朝被甘澤既雨積重
陰水滿田高下涼生秋淺深老癯幸無死一飽慶
從今

懷何宏甫

何郎好兄弟愛我往來頻人作交游看情如骨肉
親茅庵思共隱蕙帳暖生春別後長相憶寄書無
便人

題董侍郎山園

行盡芙蓉徑尋秋扣竹關樓高納萬象木落見群
山平野水雲際畫橋烟雨間紅塵城下路只隔一
湖灣

蕭仲有請經堂

一經傳世寶說與子孫知欲作久長計毋忘禮義
為黃金生悔吝白璧有瑕疵兼取龐公語圖安不
遺老

讀嚴粲詩風撼瀟湘覆江空雪月明以其一

聯穩槩為對

筆端有神助句法自天成風撼瀟湘覆江空雪月
明苦吟非草草妙趣若平平李杜詩壇上為君題
姓名

春陵山中

地僻民風古。雨晴天氣新。空山豎竒石。喬木墮枯
薪。深入千崖路。多逢百歲人。繁華凋性命。寂寞可
全真。

淮上寄趙茂實

渺渺長淮路。秋風落木悲。乾坤限南北。胡虜迭興
衰。志士言機會。中原入夢思。江湖好山色。都在夕
陽時。

金山

水湧孤峯出。波深日夜聞。重岩成鐵屋。雙塔碍行

雲。天地八憲迴。江淮兩岸分。登臨多感慨。北鴈又

成羣。

焦山

江接海冥冥。山連島樹青。似非人境界。宜有佛宮
庭。葺壓蟠龍宅。潮滄壓鶴銘。西岩更清絕。心與酒
俱醒。

梅花

細把南枝看。百花無此竒。夜深鍾月魄。
古樹龍其似。寒香蝶不知。幽蘭開亦早。二妙喜

同時

赤壁

千載周公瑾如其在目昨前英風揮羽扇烈火破樓船白鳥滄波上黃州赤壁邊長江醉明月更憶老坡仙

曾雲巢年八十聰明不衰小楷寫六經家有

小樓日登覽不倦諸監司嘗薦遺逸

八十雲巢老諸公舊典刑心情古井水輩行曉天星身健登高閣眼明書六經嘗聞薦遺逸何以報

朝廷

醉吟

一狂兼一懶窮到白頭年客路備耽酒詩囊不貯錢吟邊忘世故醉裏樂吾天不答諸公問何如孟浩然

次韻胡公權

日用無非道人心實在平果能行實學何必問虛名草木隨時態江山無世情晚來溪雨歇一段夕陽明

同安子順訪茅庵道人鳳凰麒麟不可見道人語也

道者日高卧清風隔世塵鳳麟不可見猿鳥自相親
山木輪囷古茶花冷淡春草荒門外路常怕有來人

法曹羅立之酒邊舉數首皆僕故人為我寄聲

佳士欣相識吟邊問姓名官為三語掾詩到五言城
野客可憐我故人煩寄聲白頭歸故隱秋後會

群英

為客

琴劍長為客詩書欠策勲老來臨鏡懶愁裏把盃
勤北鴈寒離塞秋鷹健拂雲物情能奮發人不解
超群

彭綉使平叛卒後除經略小詩陳利害

廣東經略使今古幾人賢陛下用一士民間有二
天清風排瘴雨廉德照會泉龍節生光彩鸞車奏
凱旋

軒蛟移鱗後近水有驚鱗間外尚多事幕中無一人佩常防猶急強飯養精神羅致賢能士仍須藻鑑真

乳虎戀巢穴窮猿失木悲早須思一着先要釋群疑豪傑通心腹人民無怨咨御軍明紀律威愛貴兼施

會李擇之其父名丙字南仲著丁未錄丙申

錄

吟邊逢李白談笑亦風流相對各青眼安知有白

頭兩家窮活計四海老交游不負雲山約同登百尺樓

道傍館

道傍誰氏館我坐開樽翁媪出迎客兒童爲掃門好花生竹所流水浸雲根儻遂卜隣約爲農老此村

山中夜歸

落盡一林月山中夜半歸驚行群犬吠破暗一螢飛舉我赤藤杖敲君白板扉興來眠不得吟到曉

星稀

題春山李基道小園

瀟灑數椽屋。旋營花竹坡。心寬忘地窄。亭小得山多。共賞春晴好。其如客醉何。棲鸞將遠舉。寧久眎庭柯。

東軒喜鵲飛花即景

東軒亦瀟灑。春晚雨晴時。喜鵲立門限。飛花落硯池。青山解留客。綠竹適題詩。一點歸心動。夜來聞子規。

宿農家

宿此屋頭閣。无窓通月明。夜深鸚鵡噪。人靜桔槔聲。村落有古意。田園關客情。儒衣成底事。所得是虛名。

寄耒陽令嚴坦叔

士元堂上坐千載。仰清規百里宜。民政數篇懷古詩。江連杜甫墓。水落蔡倫池。公暇登臨處。寧無憶我時。

所聞

今虜既亡後中間消息稀山河誰是主豪傑故乘
機喜報三京復旋聞二趙歸此行關大義天意恐
相違

胡侔送羊烹以會客

烹膾會賓客花酒一時來愁逐歌聲散心隨笑口
開飲疑金盞漏醉到玉山顏借問歡娛地相逢能
幾回

寄清流王令君

朴直存吾道一心唯向公知非巧宦者直有古人

風行志非爲矯潔身能固窮如何有廉吏不

入薦書中

七言律

江濱曉步

津頭曉步落潮痕行盡蒲根到柳根鴈影參差半
江月鷄聲啞啞數家村求魚看下列筒釣乞火聽
敲隣舍門料得錦城無此景欲將圖畫寄王孫

鄂渚烟波亭

倚遍南樓更鶴樓小亭瀟灑最宜秋接天烟浪來
三峽隔岸樓臺又一州豪傑不生機事息古今無

盡大江流凭欄日暮懷思鄉國崔顥詩中舊日愁

寄尋梅

寄聲說與尋梅者不在山邊即水涯又恐好枝爲
雪壓或生幽處被雲遮蜂黃塗額半含蕊鶴膝翹
空踈帶花此是尋梅端的處折來須付與詩家

辛未元日上樓叅政攻媿齋先生

東風入仗慶雲翔百辟朝元奉玉皇一代安危寄
黃髮群生枯瘁轉青陽梅花結果調勲鼎栢葉宜
年上壽觴宰相黑頭天子聖賴公同與措時康

春日二首呈黃子邁大卿

尋人何得以詩鳴落魄騎驢走帝京白髮半頭驚
歲月虛名一日動公卿頗思湖上春風約不柰樓
頭夜雨聲柳外斷雲篩日影試聽幽鳥話新晴
帝里風光二月新西湖幾隊作踏青人杏花時節
偏饒兩楊柳門墻易得春或是或非塵裏事無窮
無達醉中身五陵年少誇豪舉寂寞詩家戴叔倫

釣臺

赤符新領舊乾坤多謝君王問故人暫作客星侵

帝座終爲漁父老江濱層臺不啻幾
辨千仞直釣何曾挂一鱗莫道羊裘
欠圖畫丹青難寫子陵真

寄湖州楊伯子監丞

宛如公幹卧漳濱枕上窮吟過一春
遣病每懷詩眷屬訪醫因問藥君臣
鑽龜小卜占灾數覽鏡羸形類別人
寄語雪川賢太守新詩莫厭話愁頻

飲中達觀 三首取其

一
人生安分即逍遙莫向明時歎不遭
赫赫幾時還寂寂閑閑到底勝勞勞
一心似水惟平好萬事如

棊不着高正謝功名有遺恨爭如劉阮醉陶陶

梅

孤標粲粲壓群葩獨占春風管歲華
幾樹參差江上路數枝裝點野人家
冰池照影何須月雪岸聞香不見花
絕似林間隱君子自從幽處作生涯

清涼寺有懷真翰林運使之來

不特來觀德慶碑江山勝槩六朝遺
興亡了不關吾事登覽胡爲作許悲
梅爲有香奇似雪酒能無悶妙於詩
蕭蕭綠竹無人愛留取雲稍待鳳來

覺慈寺

踏破白雲登上方自。媯塵土沈禪床。和山月色令人醉。半夜梅花入夢香。深谷不妨春到早。老僧殊為客來忙。山童懶慣勞呼喚。自拗枯松煮木湯。

寄復齋陳寺丞二首

豈說一作喜從來用處難。出乘五馬看廬山。鳳凰覽德下千仞。虎豹憎人上九關。持論太高天動色。憂時未老鬢先斑。平生風節誰其似。汲黯朱雲伯仲間。長憶西灣繫小舟。野人曾伴使君游。夜浮星子邀

明月雨對廬君說。好秋坐擁紅妝磨寶硯。醉歌赤壁寫銀鈿。當時一段風流事。翻作相思一段愁。欽

歌實赤壁詞為作大字書之今刻石于庐山羅漢寺

黃州偶成

鴈叫淮南欲雪天。倚樓無味抱愁眠。筭從滄海白雲際。行到黃州赤壁邊。萬事忌於懷壯志。一生窮為聳吟有鬢間白者。休教鑄要使天知老可憐。

題泉州王梅溪先生祠堂。徐竹隱直院謂梅溪古之遺直。渡江以來一人而已。

堂堂大節在朝廷名重當時太華輕乾道君臣
載遇先生議論九重驚人歌黃霸思遺愛我頌朱
雲青直聲一瓣清香拜圖像英風凜凜尚如生

無爲山中鄭老家

高談可聽用心幽灼見此翁非俗流鞍馬破家還
避世田園得地肯封侯開窓脩竹無由俗繞屋青
山總是秋門外短籬看亦好黃金菊間碧牽牛

南康縣用東坡留題韻

鏡中雙鬢已非鴉身在江湖心在家道路飄零如

柳絮山川迤邐近梅花客行有債頻沽酒老怕無
眠戒飲茶昨夜夢歸滄海上釣竿橫插鴈邊沙

李季允侍却舟中

憶昨楓橋既語離何期千里又相隨太湖不見鷓
夷子秋浦同尋杜牧之燈火船窓深夜話江山客
路早冬詩人間草木空無數除却梅花莫我知

湖南見真帥

致身雖自文章選經世尤高政事科以若所爲即
伊呂使其不遇亦立軻長沙地窄儒衣濶明月池

冬字不如寒
字為勝

乾春水多天以一賢私一路其如四海九州何

未新宰潘仁叔再約觀梅

去年憶訪潘懷縣樽俎風流主意饒爆竹聲中度
殘歲華燈影裏醉元宵春風又起觀梅興野客仍
煩折簡招預想張園尋故事挿花秉燭過溪橋

廬山十首取其四

山靈未許到天池又作西林一宿期寺是晉時陶
侃宅記傳隋代率更碑山椒雲氣易爲雨客子情
懷多費詩暫借蒲團學禪寂茶烟飛繞鬢邊絲

道人問我看廬山地上爭如閣上看呈露千峯秋

落木雕鏤萬象客凭欄靜中見得天機妙閑裏回

觀世路難管領風光有微憾桂花香裏酒瓶乾

宮朱陵
閣觀山

擁鼻行吟上下廊今宵又宿贊公房松搖半夜風

聲壯桂漆中秋月色香白石清泉聞笑語名山大

澤出文章老夫甘作無名者不逐紛紛舉子忙

乘鸞不見李騰空試與尋真訪故宮黃葉堆邊覓

行路紫烟深處望仙蹤眼高天近千山上身共雲

仍字煩字
惟滿之雅石
而古見自法
之不存也

下三子妙

棲一壑中。九疊屏風三疊水。更無詩句可形容。

豫章東湖感舊

憶見堤邊種柳初。重來高樹滿東湖。交游大半入
鬼錄。歌醉一時逢酒徒。夜雨總成流水去。春風能
免落花無。經行孺子亭邊路。猶有沙鷗識老夫。

僮約

汝在何鄉何姓名。路途九百愛惺惺。衣裳脫着勤
收管。飲食烹煎責潔馨。每遇歇時尋竹所。須教宿
處近旗亭。吾家僮約無多事。辦取小心供使令。杜一作佳

同鄭子野訪王隱居

聯騎來尋失馬翁。相期投宿此山中。一庭花影三
更月。萬壑松聲半夜風。共把酒杯眠不得。劇談世
事恨無窮。明朝莫使兒童見。一作倘有江船吾欲東。

夜宿田家

笠笠相隨走路岐。一春不換舊征衣。兩行山崦黃
泥坂。夜扣田家白板扉。身在亂蛙聲裏睡。心從化
蝶夢中歸。鄉書十寄九不達。天北天南鴈自飛。

送蒙齋充長游天台二首

方丈蓬萊去，昨渺茫天台祇在白雲傍。羽衣金策
群仙過，珠閣瓊樓八桂香。采藥有時逢道侶，挑包
遇夜宿僧房。寒山拾得如相見，指點人間笑幾場。
山林勝處說天台，仙佛多從此地棲。司馬八篇通
道妙，豐干一語指人迷。時逢好酒從容飲，莫把新
詩取次題。白日看雲思我否，惠連無分共攀躋。

豫章巨浸呈陳幼度提幹

乞得新晴賦晚霞，出門無路欲乘槎。憂風憂雨動
經月，足食足衣能幾家。一飯共君烹瓠葉，三杯無

處看荷花自成鼓，吹喧朝夕輸與東湖兩部蛙。

訪趙東野

名時習休
官隱居

榻來問訊病維摩，花滿溪堂竹滿坡。髮禿齒危俱
老矣，人高詩苦柰窮何。四山便是清涼國，一室可
為安樂窩。猶有憂時兩行淚，臨風揮洒濕藤蘿。

方孚若真宅堂前池上作淮南小山題詠
者甚多見其詩軸次韻

妙手能移造化功，壺中幻出九華峯。山雖云小能
棲鳳，水不求深貴有龍。事紀淮南千古勝，記成嘉

秦八年冬先生不用賦招隱辦了功名訪赤松

江州德化縣漪嵐堂盡得廬山之勝醉中作

此呈趙明府

不羨君爲花縣宰羨君日坐漪嵐堂有時酒與兼
詩興無限山光與水光百姓熙熙知教化群胥凜
凜對風霜公餘置酒看飛李醉倒花前客自狂

廬州帥李仲詩春風亭會客有塵字韻詩和
者甚多韻拘無好語

玉關人老鬢絲新千里長城在一身氣使黃金結

豪傑手揮白羽翦靜風塵山河四望亭中景桃李
一開天下春鄉日滿城騎戰馬而今四野盡耕民

送滕審言歸長沙別無聊

折柳亭前送故人平沙留得馬蹄痕雲生渡北一作
迷行路烟起江南認別村恨不與君同上道歸來
無伴自開樽西樓獨倚黃昏月欲倩飛鴻寄斷魂

張仁仲提幹衡陽冰壺亭燕客

大抵吾曹臭味同留歡卜夜莫匆匆一亭景物冰
壺上萬里乾坤玉鏡中踈柳無心挂明月敗荷有

恨倚西風吟家舊日張公子千首詩成句句工

別後舟中用前韻

出郭風光便不同轉頭猶恨去匆匆維舟別岸鴉
啼後倚拖澄江鴈影中向老客懷驚歲月乍寒天
氣轉霜風水壺亭上人如玉謾寄篇詩不暇工

海月星天之觀

京口普照寺舊有橫陳軒岳總侍改作此觀唐張祐普照

上方詩云人行中路月上海鶴語上方星滿天就中摘此四字為名

魏然華屋似凌歊下際滄溟上九霄萬頃波濤浴
蟾兔一天星斗轉魁杓征鴻有感入飄泊宿鶴無

后疑是石

聲夜寂寥誰似風流楊叔子登臨

杜子野主簿約客賦一詩為贈與僕一聯云
生就石橋羅漢面吟成雪屋閬仙詩

杜陵之後有孫來自守詩家法度嚴秀骨可仙官
况薄高情追古俗人嫌起看星斗夜推枕為愛江
山寒捲簾飽喫梅花本更好錦囊雖富不傷廉

楊伯子監丞雪川父兩得晴為喜

村南村北晒蓑衣好是雲開日出時太守少寬憂
世志野人為賦喜晴詩兩岐瑞麥黃金實八廟吳

蚤白雪絲政事端知能能合天意雨陽還亦順人為

提刑彭仲節平叛卒

千兵喝賞黃金盡六月臨戎白刃寒慷慨丈夫為
事別太平人物濟時難誰言江左無王謝今喜軍
中有范韓漢節梅花留不住借君一劍斬樓蘭

中秋李漕水壺燕集

諸亭環立一作一湖灣區界無多眼界寬蒼石傳為
偽劉物綠波曾浴葛仙丹兩邊堤樹四時碧一片
水壺六月寒咫尺雲烟接滄海須知此地有龍蟠

李計使領客游白雲景泰

一作李漕實大壩
僕將觀海上諸山

四途至瀟湘乃鄭
安期得仙之地

天近剛風吹面寒繡衣玉立白雲間滄波萬頃海
南海翠碧幾重山外山自覺登臨無限意誰思富
貴不如閑前峯若箇神仙宅描點烟霞見一斑

菊坡崔參政說平叛卒不得已拜經略之命

豈敢言功

角巾私第自逍遙諸老之中此老高無可柰何懷
印綬甚非得已用弓刀風生玉帳千兵肅天落金

牌一札褒緩急經心護鄉井生憎兒輩說功勞

題處士黃公山居

行盡松坡與竹坡沿溪窈窕上岩阿山深每恨客
來少寺近莫教僧到多但覺洞中人不老不知雲
外事如何邊頭又報真消息靛使來朝乞講和

題何季湧江亭

勝槩何妨近市塵紅塵踈處著三椽數重青嶂橫
天未一道澄江在眼前海浪浴紅朝出日樹林堆
碧晚生烟請君分付堤邊石莫使漁翁來繫舟

別鍾子洪

識得潮陽鍾子洪今人可想古人風文章有氣吞
餘子天地無情負此翁問舍求田非細事參禪學
佛見新功欲知別後真消息莫惜頻書寄海鴻

再賦惜別呈李實夫運使

一生飄泊老江湖今日別公歸故廬此去怕無相
見因風或有寄來書雲烟過眼時時變草樹驚
秋夜夜踈人物似公能幾輩不知天下竟何如

蕭學易何季舉和作別詩佳甚再用前韻

少年行脚白頭歸不負平生汗漫期
望海山雲漠漠愁生江路草
離離一篇王粲登樓賦幾首已
陵送別詩獨倚蓬窓無意緒
瓦盆傾酒憶金卮

靈洲

一臺中立鬱蒼蒼四面山光接水光
潮信往來知氣候龜精出沒兆災祥
烟生茶竈僧留款風展蒲帆客去忙
白髮東坡在何許兩行遺墨照琳琅

和韶州許使君令子送別之韻

詩瘦吾非沈隱侯五窮相值結爲讐
方愁度嶺無

相識却喜聞韶到此州世道從來三不合
客行何止七宜休故人知我平生事肯笑蘇秦着弊裘

南安王使君領客湛泉流觴曲水

橫浦堂前舉一卮古榕陰下坐多時
連朝好雨千山澗昨夜新一作清秋一葉知
梅嶺鄉來逢行驛一作者蘭亭今日又羲之家聲不墜一作傳風流在如見初寮

說好詩

題鄒雨夜甫江山偉觀

八境橫陳淦水濱異鄉誰識倚樓人
江山不越一作

乾坤如烟雨。翻成風月。新十載經營。梅屋趣三間。
突兀草堂隣。題詩未得。驚人句。從此登臨。莫厭頻。
去年訪曾幼卿。通判携歌舞者同游。鳳山僕
有歌舞不容人不醉樽。前方見董嬌嬈之句。
今歲到鳳山。又闌西隅築堤種柳。新作數亭。
且欲建藏書閣。後堂佳麗皆屏去之矣。僕嘉
其志。又有數語併錄之。

一丘一壑自逍遙。莫恠山人索價高。是處園林可
行樂。同來賓客不須招。臨風桃李花狼藉。照水樓
臺影動搖。歌舞不容人不醉樽。前方見董嬌嬈
別駕常懷物外心。黃金屢費買山林。後堂不肯着
歌舞。高閣唯思貯古今。幾處亭臺新結束。一春風
雨阻登臨。野夫昨日閑乘興。着屐尋詩到柳陰。

撫州謝樓宗丞見訪

客裏門庭可設羅。使君千騎肯相過。心忘貴賤交
游重。論及興衰感慨多。諸老逢時起巖壑。三邊何
日罷干戈。老夫何預人間事。歸去一作滄江一作理釣
簑。

平江呈毅夫侍郎

龍墀射策三千字未抵胸中十萬兵遠大無過為
將相文章爭似立功名當今天下幾豪傑獨數君
家兩弟兄世事從橫人事左未知何以措昇平

見淮東制帥趙南仲侍郎相待厚甚特送買

山錢又欲刊石屏詩置于揚州郡齋話別叙

謝

如公當向古人求識面何須萬戶侯浪說釣鰲游
瀚海真成騎鶴上揚州受恩多處難為別宿酒醒

時始覺愁回首平山堂下路不堪風雨送歸舟多一竹深

鎮江別總領吳道夫侍郎時愚子琦來迎侍朝

夕催歸甚切

落魄江湖四十年白頭方辦買山錢老妻懸望占
烏鵲愚子催歸若杜鵑濟世功名付豪傑野人事
業在林泉難禁別後相思意或有封書寄鴈邊

董侍郎山園燕樓宗丞

旌旗千騎擁春華傾動臨川十萬家皂蓋出郊因
問柳紫荷領客共看花樽前人唱鶯隨唱堂下吏

衙蜂亦衙寄語風流賢太守好留醉墨伴烟霞

聶侍郎領客觀園林之勝飲中出示名賢書

畫

烈士家風從橐尊時容野客上朱門如登東觀圖
書府又似西巖水竹村自以一閑銷日月誰知萬
慮滿乾坤諸公衮衮成何事不若花前對酒罇

思歸二首

吟詩不換校書郎但欲封侯管醉鄉疎懶無成祗
叔夜清狂似達賀知章安貧不怕黃金盡既老從

教白髮長百計不如歸去好子孫相對說農桑

老矣歸歟東海村長裾不復上王門肉糜豈勝魚

羹飯紈袴河如犢鼻禪是處江山如送客故園桐

竹已生孫分無功業書青史或有詩名身後存

趙用甫提舉夢中得生雲不隔梅花月之句

時被命入朝雪中送別用其一句補以成章

一時議論動諸公有詔西來玉節東又見清朝更

大化好趨丹陛奏孤忠片雲不隔梅花月一雪翻

成柳絮風把酒莫辭今夕醉明朝車馬去匆匆

長沙呈趙東巖運使併簡幕中楊唯叔通判

諸文

日莫遠塗行未休白頭又作長沙遊湘江一點不
容俗岳巖四時皆是秋香草汀洲付騷客紅蓮幕
府聚名流吟邊萬象寫不得上有風流趙倚樓

山中見梅寄曾無疑自號雲巢名三異臨江軍人

香動寒山寂寞濱直從空谷見佳人樹頭樹底參
差雪枝北枝南次第春有此瑰琦在巖壑其他草
樹亦精神移根上苑誰云晚桃李依然在後陳

余惠叔訪舊

扁舟訪舊入橫塘新柳今如舊柳長室邇入遙春
寂寂風流雲散事茫茫縱題紅葉隨流水誰弄青
梅出短牆政是沈郎愁絕處杜鵑不斷叫斜陽

兩山趙仁甫宰臨安有武學生張文相訪酒
邊弄刀舞劍甚可觀因成七言縣乃錢王故
宮九龍十錦皆其地

風流晉宋時人物花縣鳴琴調甚新不厭開樽留
劍客仍能下榻待詩人九龍池館空陳迹十錦山

川自好春但見清吟度白印不知佳政最宜民

友人朱淵出示廷對策不顧忌諱讀之使人

凜凜受准東制置辟

龍墀射策對明君憂國忠言駭見聞皎皎一心如
白日寥寥千古再朱雲時危諸老皆求去兵滿三
邊未解紛要使文臣知武事不妨王粲且從軍

裘司直見訪留款

清風爲我拂塵襟坐聽先生說古今道誼欲灰傷
世變利名如海溺入深一言可重輕雙璧片善相

資直萬金聞道門牆不多遠明朝修敬到山陰傑

萬興隆東湖
襄居西山下

訪張元德號主一道
學中人

今宵何幸宿書林議論從橫感慨深黃卷具傳千
古意青燈照破幾人心狂夫嗜飲夜偷酒汙吏容
私晝攫金堯澤君民舊風俗凡經幾變到于今

滕審言相遇話舊

憶昨同君訪月林幾年相別到于今江山花草生
詩夢風雨憂愁長道心久矣無波觀古井悠然得

趣聽鳴琴一生奔走成何事塵滿征衫雪滿簪

陳孟參陳明子同游麻姑山

麻姑壇上共登臨野客悠然起道心丹井汲泉深
百尺星杉聳壑到千尋青蓮花白僊蹤遠烏柏葉
紅秋意深何用金鑿擊麟脯山肴濁酒可同斟

興國軍晚春簡吳提幹

幾夜林間哭杜鵑東風又作落花天青春不覺過
三月白髮誰能滿百年日射江波光閃閃天連烟
草碧芊芊異鄉欲作登樓賦心逐歸鴻到海邊

朱子昂司戶登滕王閣帶鄂州雪醅來飲

笑傲不禁秋興長登臨誰復問滕王江湖周折地
襟帶雲霞絜爛天文章人如野鶴何飄逸目送飛
鴻去渺茫安得雪醅三百斗發君豪氣對吾狂

汪給事守鄂渚元宵代江夏宰吳熙仲獻燈

鄂州新得主人翁今歲元宵便不同燈火夜深回
晝印管絃聲動起春風遼天月借三秋白陸地蓮
開十丈紅妙手信能移造化速宜歸去補蒼宮
一晴收盡四山雲天與黃堂作好春西楚東吳獻

風月南樓北榭擁星辰扶持入郭觀燈更歌舞攔
街醉酒人此是太平真氣象今年第一箇良辰

袁州化成巖李衛公謫居之地

一巖端坐挹千峯三兩亭臺勝槩中江水驟生連
夜雨松聲吹下半年風因思世故吾頭白獨步林
臯夕照紅欲吐草茅憂國志誰能喚起贄皇公

友松亭代松語

從來巖壑守孤蹤豈料移歸寶籞中幸在交游一
人數願勤培植百年功朱門縱有三千客青眼毋

忘十八公根本既深枝葉茂相期直上碧霄中

京口別石龜翁際可

把劍樽前砍地歌有何留戀此蹉跎心期難與俗
子道世事不如人意多蓮葉已空猶有藕荷花雖
老不成莎扁舟四海五湖上何處不堪披釣蓑

讀放翁先生劍南詩草

茶山衣鉢放翁詩南渡百年無此奇入妙文章本
平澹等閑言語變瑰琦三春花柳天裁剪歷代興
衰世轉移李杜陳黃題不盡先生模寫一無遺

古田縣行覽呈劉無競

客游花縣自逍遙百里風光在兩橋語出桑陰鳩
婦喜身穿麥秀雉雛嬌青山一任雲來去綠水多
爲風動搖上下相安長官好野亭閑坐聽民謠

諸葛仁叟縣丞極貧能保風節有權貴超之不屑其行
時人誰識老聾公滿口常談杜少陵俗輩衆多吾

輩少素交零落利交興權門炙手炎如火詩社投
身冷似冰堪笑皇天無老眼相知賴有竹林僧

萬安江上

不能成佛不能作僊虛度人間六十年鏡裏姿容
雖老矣酒邊意氣尚飄然安排玉白花紅句趁辦
橙黃橘綠天無柰秋風動歸興明朝問訊下江船

過昭武訪李友山詩社諸人

吟過長亭復短亭喜於溪上訪詩朋雕鏤已被天
公怒狂狷仍遭俗子憎故愁人長夜雨明明照

我短檠燈。休思京口相逢日。喜雨樓中賦大鵬。

李友山諸丈甚喜得朋留連日。父月洲乃友。

山道號

此身到處自悠悠。一笑非為越女留。風雨不妨雞
戒曉。江湖又見鴈橫秋。途中有客居岩谷。天下何
人似月洲。頗欲相從溪上住。諸君詐我卜隣否。

韻一作酒徒日日通來
往詩社時時肯唱酬

飲中

布衣不換錦宮袍。刺骨清寒氣自豪。腹有別腸能

貯酒。天生在手慣持螯。蠅隨驥尾宜千里。鶴在鷄

群亦九臯賢。似屈平因獨醒。不禁顛顛賦離騷。

陪徐淵子使君登白雪樓約各賦一詩必以

宋玉石對莫愁村

樓名白雪因詞勝。千古江山春雨餘。宋玉遺蹤兩

蒼石。莫愁居處一荒墟。風橫烟艇客呼渡。水落沙

洲人網魚。借問風流賢太守。孟亭添得野夫無。

唐
羅州錦王浩然手樓上蓬有浩然亭後人尊浩
然改為子孟亭徐使君詩借錄于此水落方成放牧
水生遂作浴鷗波春風自共桃花笑秀色偏於
麥壠多村說莫愁芳想憶石名宋玉謾摩挲試符

有詩無標曲翻
作勝春白雪歌

靜齋張敏則舍人贈詩因用其韻爲酬

胸次詩書一派清學如耕稼到秋成十年閉戶存
吾道萬事無心逐世情葉落花開關氣數山長水
遠是功名摩挲老眼看新貴九鼎鴻毛孰重輕

客游

不能鬱鬱窟中藏大笑出門游四方與世周旋持
酒盞觀人勝敗坐碁坊倒餐甘蔗入佳境書着錦
衣歸故鄉此志十年猶未遂倚樓心事楚天長

都下書懷

京華作夢十年餘不道南山有弊廬白髮生來美
人笑黃金散盡故交疎明知弄巧翻成拙除却謀
歸總是虛出處古人都說盡功名未必勝鱸魚

新安寒食

不擬今年到歙州要知行止豈人謀一百五日客
懷惡三十六峯春雨愁老矣此身猶道路淒其歸
夢繞松楸花瓢僊子無由見千里江山負遠游

烏聊山登覽

抖擻罽塵上翠微。旁溪寺上坐題詩。忽聞啼鳥不知處。細看好山無厭時。風掃雲烟開遠景。人携香火謁叢祠。客來千里登臨意。說與時人未必知。

癖習

平生癖習未全除。虛事經心實事疎。爲惜落花慵掃地。每看脩竹欲移居。逢人共作亡何飲。撥冗時觀未見書。爭柰一貧隨我在。思量不若把犁鋤。

田園吟

俗語桐樹發花茶戶大
家又云樹無梅手無杯

自古田園活計長。醉敲牛角取宮商。催耕啼後新

秋綠。鋤磨鳴時大麥黃。桐樹着花茶戶富。梅林無實秫田荒。狂夫本是農家子。拋却一犁遊四方。

九日登裴公亭得無災可避。自登山之句何

季臯滕審言爲之擊節足以成篇

良辰樂事兩相關。不可不求今日閒。有酒能賒堪薦菊。無災可避自登山。心懷屈賈千年上。身在瀟湘八景間。好向樽前開笑口。人生枉自作愁顏。

趙升卿有官不肯爲里居。有賢聲訪之於深

卷中

深居陋巷不妨幽翠竹當門水滿溝每遇事來先
覺懶欲爲官去又還休田園自樂陶元亮鄉里多
稱馬少游除却讀書無所好有時閑作北巖遊北即
成巖也

括蒼石門瀑布

少泊石門觀瀑布明知是水却疑非亂拋雪玉從
天下散作雲烟到地飛夜聽蕭蕭洗塵夢風吹細
細濕人衣謝公蠟屐經行處聞有留題在翠微

杜門自遣

世事茫茫心事灰衆人爭處我驚回閉門不管花
開落避俗唯通燕往來富貴在天求不得先陰轉
地老相催平生任達陶元亮千載神交共一杯

登快閣黃明府強使和山谷先生留題之韻

未登快閣心先快紅日半簷秋雨晴宇宙無邊萬

山如

一作今古如

雲烟不動入窓明飛來一鶴天

相近

一作旁羅萬

過盡千帆江自橫借問金華老

僊伯幾人無忝入詩盟

滕王閣次韻劉允叔

消遣客懷尋勝事。酒杯詩卷得同携。當年傑閣棲
龍子。今日空梁落燕泥。斜照浴紅秋水。好山橫
碧畫欄西。幾人登覽皆磨滅。唯有前峯壓不低。

竹洲諸姪孫小集永嘉將子高有詩次韻

美景能兼樂事難。愁來唯仗酒遮欄。昂藏病骨兼
詩瘦。料峭春風帶臘寒。喬木尚疑前輩在。好花應
笑老人看。忍拋明月先歸去。輸與諸郎徹夜歡。

游雲溪與郡宴用太守韻即事二首

溪堂久矣無人到。千騎傳呼五馬來。流水奔騰砥

柱立好山呈露晚。雲開指揮壯士馳。驍騎管領衰
翁吊。古梅笑問風流羊叔子。幾人登覽不塵埃。
官府太平無一事。凝香座上着衰翁。飄搖短棹游
方沼。縹緲高樓倚半空。把酒夜深霜落後。吹簫入
在月明中。使君笑指一作梅花說。一作去歲今年事不
同。去歲臘月十一夜寇至

和高與權

相逢休說昧平生。高適能詩久擅名。欲課荒蕪來
入社。羞將老醜對傾城。近來客裏仍多病。強向花

前舉一觥樂極自傷頭白早一作白髮樽前知我孟雲卿

懷雪蓬姚希聲使君唐姚梁公作冰壺賦雪蓬有碑

寒入疎蓬夜雪深是非難辯口如瘖一官不幸有
奇禍萬事但求無愧心想像騎牛開畫卷丁寧回
鴈寄來音傳家一首冰壺賦未信橫舟竟陸沉

其三

有感中來不自禁短長亭下短長吟梅花差可強
人意竹葉安能醉我心世事無憑多改變仕途相
識半昇沉一作龍隱湘江春水潤猿啼樹頂暮雲深摩挲老眼從頭看

只有青山無古今存一作百

豫章東湖宋謙甫黃存之酌別

湖邊長記昔年游生怕清波照白頭楊柳蕭疎多
困雨芰荷顛顛早驚秋無功及物談何益有酒開
懷醉即休江上買舟猶未定明朝尚可為君留

都中懷竹隱徐淵子直院

手携漫刺訪朝官象似滄洲把釣竿萬事看從今
日別九原叫起古人難菊花到死猶堪惜秋葉雖
紅不耐觀多謝天公憐客意霜風未忍放深寒

人日

自換端平新曆日眼看日月倍光輝南州有雪古
來少人日不陰今見稀鼓舞萬方觀德化轉移一
世屬天機朝廷有道吾君聖辦作昇平老布衣

送劉鎮叔安入京

謫居三山二十餘年真西山奏令自便趙用父使君為唱優其行坐客二十八人分韻賦詩得君字

二十餘年謫宦身此行便可上青雲西山一手為
推轂南浦幾人爭送君橫水流傳無垢集海神驚
見老坡文回頭莫有關情處別酒須教滿十分

三山林唐傑潘庭堅張農師會于丁巖仲新樓

又携詩卷到南州塵滿征衫雪滿頭桃李春風故
園夢江山落日異鄉愁樽前一笑真奇事坐上諸
君盡勝流政倚清談洗胸臆莫教王粲賦登樓

次韻杜運使見贈

飄零敢說是詩人故舊多居要路津窮賤交游誰
復記江湖蹤跡早成陳無心涉世當歸隱有口逢
人肯說貧家在翠屏山下住茅廬雖小可容身

訪漳州趙用父使君

幸遇故人爲太守客來不憚路程遙九龍山水連
滄海五馬聲名動紫霄一意志行寬大詔多君不
負聖明朝欲知惠愛及人處聽取街頭賣炭謠

見曾提刑兼安撫鴻甫侍郎子也

傳家學術用如新風采英英照七閩澄按併開都
督府平反專奉太夫人關河未定心憂國麾節相
仍澤在民間說青雲多故舊不應久作外臺臣

思歸

地上皇皇蟻虱臣着衣喫飯亦君恩不能待詔金
鑾殿嘗欲獻詩光範門身在草茅憂社稷恨無毫
髮補乾坤才疎命薄成何事白首歸耕東海村
躬耕海上奈無田乍可經營買釣船未有人供令
狐米欲從鬼借尉遲錢回頭歸路三千里藉手還
鄉五百篇幸遇太平時節好白雲深處了殘年

趙克勤曾橐卿景壽同登黃南恩南樓

欲從高處賞新秋上盡層坡更上樓天地無窮吾
輩老江山有恨古人休寧隨狡兔營三窟且跨飛

鴻閣九州憶着當年杜陵老一生飄泊也風流
鄂州南樓不可到到此南樓眼亦青乾坤日月與
高致城郭江山無遁形把酒縱談心耿耿倚欄
眺髮星星世間萬事關愁思莫使秋風吹酒醒

山行遇秀癡翁

新冬行樂賞新晴幾箇江湖舊友朋霜蟹得橙同
臭味一作是水可臨山可梅花與菊作交承樽前
盡是論文客林下那逢作好事僧機解到時言語
別李翱詩句入傳燈

石亭野老家

野老將余到石亭先呼小豹出相迎依凭林谷住
家穩奔走兒童見客驚牛豕與人爭徑路桑麻繞
屋蔽柴荆溪邊不合栽桃李猶恐春風惹世情

讀王幼學上殿劄子

才到朝廷被論歸孤忠幸有九重知神醫能識未
蘇病國手難翻已敗碁四海爭傳治安策諸公如
在太平時老夫懷抱綠何事未到秋來早自悲

謝史石窓送酒并茶

遣來二物應時須客子行厨用有餘
午困政須茶料理春愁全仗酒消除
不勝歡喜拜嘉惠無限慙懃作謝書
君既有來何以報一牀蘄簟兩淮魚

閱舊稿見喬丞相詩跋因成此詩

三十年前舊詩兩兩行鈞翰儼如新
自甘白屋爲寒士敢說黃扉有故人
五雨十風勤燮理九州四海費經綸
年踰八十貂蟬貴不負明君恐負身

衡陽度歲

爲懷賈誼到長沙又過衡雲湘水涯
詩酒放懷

是癖江湖久客若無家茫茫萬事生
春草三杯度歲華把定東風笑相問
忍將桃李換梅花

遇張韓伯說邊事

每上高樓欲斷魂
沿江市井幾家存
飛鴻歷歷傳邊信
芳草青青補燒痕
北望苦無多世界
南來別是一乾坤
相逢莫說傷心事
且把霜螯薦酒樽

有議袁蒙齋者

世上苦無公是非
譏評人物信猶疑
鏡中妍醜無私照
碁上高低有誤時
懷古尚餘喬木在
傷春唯

許落花知黃金可辦將何用鑄出當年鍾子期

醉吟

草茅無路謁君王白首終為田舍郎近讀南華資
曠達欲師西洛愧荒唐乾坤萬象供詩料風月一
樓為醉鄉日晚棲禽歸自樂飛鳴不是怨斜陽

慈雲避暑

相邀避暑到慈雲細聽諸君講見聞六月美宣歌
北伐五絃思舜奏南薰不憂冷澹無歡伯自致清
涼有此君想像當時河朔飲樽前不用着紅裙

久客還鄉

短簪紗帽舊麻衣鐵杖扶衰步履遲老去分為無
用物客游誰道有歸時豐年村落家家酒秋日樓
臺處處詩生長此方真樂土江淮百姓政流離

聞時事

昨報西師奏凱還近聞北顧一時寬淮西勲業歸
裴度江右聲名屬謝安夜雨忽晴看月好春風漸
老惜花殘事關氣數君知否麥到秋時天又寒

宗趙德行

嘗有先諸公進詩之說

平生幸甚識諸公未免歸爲田舍翁詩稿敢求經
御覽客身自笑坐天窮肯將釣手遞西日獨聳吟
有訴北風枉使西山有遺恨不能置我玉堂中

到鄂渚

連宵歌舞醉東樓不信樽前有別愁半夜月明何
處笛長江風送故人舟十年浪迹游淮甸一枕高
眠到鄂州明日擬蘇堤上看當春楊柳政風流

艤棹清江

艤棹江濱訪舊游十年重到戲漁洲不知芳樹在

何許但見落花從此流我醉欲眠因假榻客行未
定且登樓有錢贖買張家酒準備明朝話別愁

萬安縣芙蓉峯

凌空傑閣爲誰開隔岸芙蓉不用栽今古相傳彩
雲現江山曾識大蘇來酒邊歌舞共一笑客裏登
臨能幾回翠浪玉虹從此去明朝人在鬱孤臺

汪見可約游青原

來訪青原古釣磯溪流袞袞濯龍竒一茶可款從
僧話數局爭先對客暮雲雨那能敗吾事山林政

喜得君詩石頭路滑籃輿小換得扁舟在水湄

除夜

掃除茅舍滌塵囂一炷清香拜九霄萬物迎春送
殘臘一年結局在今宵生盆火烈轟鳴竹守歲筵
開聽頌椒野客預知農事好三冬瑞雪未全消

黎明府約尋梅

霽雪園林繁陸離九峯山下探梅時三川風月醉
中見百里襟懷琴上知老樹著花春到早長街籠
燭夜歸遲奚囊一路生光采中有琴堂唱和詩

葉宗喬爲令叔求竹山詩

愛竹舊稱王子猷今君異世等風流山中便是清
涼國門下合封瀟洒侯有此一堂真可隱不妨諸
姪與同游吟邊想像參差綠許我携琴一到不
一景分明似渭川竹山堂好以人賢蘭亭價爲義
之重峴首名因叔子傳紫翠數峯長在眼琅玕萬
箇欲參天老夫身墮塵埃底遙挹清風亦洒然

春日風雨中

瀟瀟風雨閉柴門年紀衰頹病着身大似梁鴻居

海曲略如公幹卧漳濱三春晴暖無多日一世安
閑有幾人聞道明朝新醞熟不妨祭竈請比隣

寄吳明輔秘丞

吾鄉幸有吳夫子星斗網羅文字胸百鳥收聲聽
鳴鳳千山落木秀孤松旁通滄海江山水高壓雲
城恰憤峯每見一斑三歎息白頭未得奉從容
七十七翁猶眼明三台星畔見奎星文章有氣吞
餘子議論無差本六經愧我不能攀逸駕得君自
足振顏齡玉溪常與荆溪接分得餘波到石屏

靈洲梅花

穿林傍水幾平章合有春風到草堂自入冬來多
是暖無尋花處却聞香枝南枝北一輪丹山後山
前兩履霜直看過年開未了醉吟且放老夫狂

寄廣西漕陳魯叟誥院

回首元龍百尺樓一時詩酒記同遊好山歷歷在
人眼流水滔滔任客舟歸鴈欲從何處去落花恨
不爲春留錦囊佳句無人問自別君來白盡頭
隨軍轉運司王宣子上巳日會客

邊頭相遇若相期又見隨軍轉運司憶昨醉君京
口酒傷今讀我石壕詩蘭亭飲客酬佳節淝水收
功定幾時準擬看花花較少春風全在綠楊枝

湖廣李漕革夫大卿飲客西湖湖一作朔

管領風光此會稀坐中賓客總能詩神仙有洞尋
難見山水當軒看轉奇春不再生陶侃栢人來多
打李邕碑因思屈賈傷今古國有忠臣無用時

曾雲巢同相勉李玉澗不赴召

詔書催赴紫宸班九奏君王乞掛冠日暮倒行非

我事

作

急流勇退有何難地靈不隱金砂勝秋水

長流玉澗寒好把山林寄圖畫試教天下故人看

寄撫州樓使君

夢上江西江上船行隨五馬五峯前臨川太守賢
無敵攻媿先生學有傳佳政可書循吏傳斯民共
樂太平年不知擬峴臺前景公暇清吟得幾篇

江山一作江上

借得茅樓一倚欄見成詩句滿江天歸鴉啼處客
投宿野鴨飛邊人上船老眼尚嫌隨物轉閉心可

借被貧牽平生錯。功名夢金印。何時須一作二項
賢一作田

京口遇薛野鶴

天下江山第一州。可能無地着詩流。黃金不愛買
官職。白髮猶堪上酒樓。懊恨牡丹遭雨厄。丁寧芍
藥爲春留。狂吟有禁風騷歇。語燕啼鶯代唱酬。

題邵武熙春臺呈王子文使君

步到風烟上上頭。恍如造物與同游。千山表裏重
圍過。一水中間自在流。近郭樓臺隔雲見。鄰峯鐘

磬出林幽。風流太守詩無敵。有暇登臨共唱酬。

秋日病餘

桂子吹香風露深。老夫吟了聽蟬吟。秋來賸有行
山興。病後全無涉世心。詩苦積成雙白髮。酒豪輕
用萬黃金。平生意氣今如許。獨抱傳家一破琴。

次韻郡倅王子文小園詠春

州縣徒勞喜近民。民間何事不關身。誰知風月臺
中客。自是絲綸閣上人。萬縷綠垂楊柳雨。一梢紅
破海棠春。小園暫作風光主。朝馬行隨輦路塵。

安豐倅李華被旨監軍入閩討賊華身督諸
將先破賊巢穴所鄉輒勝招捕使之成功監
軍之力居多守汀州四年民賴以安有應變
壓難之才僕遊汀邵間實知其詳為賦二首

一作爲
作二詩

三年壯士起淮濱賈勇從公定七閩在昔猩鼯中
夜嘯而今桃李萬山春臨危性命輕如葉破敵機
鋒妙若神自此南人不知反使君還亦是天人作

壯上三年隆七閩監軍談笑靜風塵端深豁畧高
率智破敵機鋒妙獨神在昔猩鼯長夜嘯而今未死

平萬山春南山自此不
復返北望開河事業新

英雄踈畧書生腐守調如公天下無眼底紛紛付
談笑胸中事事有規模從他要路爭馳軼獨坐偏
州再剖符平寇功成在誰手亂山深處問樵夫

海上魚西寺

北風三日弭行舟登陸因爲島寺游自笑奔馳如
野馬本無拘束似沙鷗人誰與語自緘口山有可
觀頻舉頭小雨踈烟晚來景老僧相對倚鐘樓

甘窮

自甘寂寞坐詩窮何取多牛積穀翁
痛飲不孤連夜月淨生禁得幾秋風
芙蓉媚日紅相對螃蟹著霜黃
在中白盡鬢毛無可老此身未死抑愁儂

詠梅投所知

潔白無瑕美不嬌
炯如珠玉祭林臯
獨開殘臘與時背
奄勝衆芳其格高
欲啓月宮休種桂
如何仙苑却栽桃
不特品質分優劣
痛飲花前讀楚騷

黃州竹樓呈謝國正

每日黃堂事了時
一心惟恐上樓遲
發揮天地讀

周易管領江山歌
杜詩切戒吏來呈
簿曆常邀客至共琴瑟
風流太守誰其似
半似元之半牧之

漢陽登覽呈王中甫使君

西州城郭雖然小
江漢規模壯矣哉
大別山頭觀禹迹
楚波亭上望吳臺
蕭蕭修竹鳳不至
漠漠平沙鴈又來
五馬相邀共登覽
欲醉秋興費詩材

簡陳叔方問病

聞君卧病知何病
醫者難從脉上尋
自是讀書多損氣
或緣憂國重驚心
飽參妙理牀頭易
細寫幽

懷膝上琴蛇影無疑自無恙此方何止直千金

鍾春伯園林

西風吹起蓴鱸興八座歸來有北山林麓兩峯亭
榭外瀟湘一片水雲間天生景物四時好人滿乾
坤幾箇閑語喚石屏非浪語常思蠟屐共躋攀

清明前夢得花字

白頭那辨老生涯幸有癡兒可主家百歲光陰一
場夢三春消息幾番花掃松預造清明酒入峽先
租穀兩茶隨分支吾度時節那求不死煉丹砂

題王制機池上千岩奇觀

華堂掩映一池清着此崔巍若化成胸次玲瓏具
丘壑世間髣髴見蓬瀛碧雲堆上千峯如綠水光
中萬象生欲去河陽種桃李回頭又覺宦情輕

訪慧林寺僧因有詩

故人有約訪鄉僧少坐西林待晚晴雙燕護雛更
出入群鴉攫肉闌飛鳴長溪積水流無盡古木號
風訴不平一段見成公案在請君判斷要分明

陳漕領客西園賞海棠

追隨玉節賞仙葩。滿座風流客更嘉。錦綉有光搖竹影。珍珠無價買春華。猩紅滴滴嬌含蕊。雪白紛紛老半花。肯對騷壇輕着語。后山詩句已名家。

王和甫主簿卜地改葬雙親一夕夢到一處風水佳甚及到鴈蕩羅漢寺後山宛如夢中所見及造壙衆石之中獨有一穴僅可容雙

棺孝感如此

仇香竭力奉雙親。孝感於天得此墳。衆石中藏一抔土。來山面對五峯雲。龜巒爲遠近。參差見龍虎。低

昂正石分早見。凌雲牡丹現。他年朱紫定紛紛。旁

龜峯爲峯前有凌雲岩時有牡丹花現也

喜梅兩旣晴

屋角鳴禽弄好音。樓頭夏木綠陰陰。鑷空白髮愁根在。熟盡黃梅雨意深。苔榻有泥妨客坐。稻田足水慰農心。老夫已作豐年想。鼓腹思爲擊壤吟。

李司直會客吳運幹有詩次韻

使君高會集群仙。也使狂夫坐細氈。白壁一雙酬議論。青春十載棹船客。愁遇酒退三舍。梅信與

春開一先已辨扁舟明日去幾時重得到花前

一相識無辜獲罪

一宿津亭睡不成愁來物物是離情月輪高掛山河影江浪巧爲風雨聲志士失塗爲鬼笑佳人泣血送君行塞翁得馬非爲福公論如天久自明

送黃教授日巖之官章貢

久矣聞名不相識江湖還有見君時出入意表發高論入我眼中多好詩欲對春風開笑口不堪世事上愁眉憑誰寄語一作謝安石莫爲蒼生起太

遲時召崔丞相不出

家居復有江湖之興

寒儒家舍只尋常破紙窓邊折竹床接物罕逢人可作語尋春多被雨相妨庭垂竹葉因思酒室有蘭花不炷香到底閉門非我事白鷗心性五湖傍

題亡室真像

求名求利兩茫茫千里賦悼亡夢井詩成增悵恨鼓盆歌罷轉淒涼情鍾我輩那容忍乳臭諸兒最可傷拂拭丹青呼不醒世間誰有返魂香

題趙忠定公雪錦樓詩

斷句云早晚扁舟會東下莫占衡岳問歸程人以爲後來謫君之譏云

九鼎重安國勢牢功名易辦謗難逃手扶日月掃雲霧身向江湖直羽毛雪錦詩成先識兆金滕書啓見勤勞紛紛論定知忠定不負朝廷兩字褒

陪厲寺丞賞芍藥

黃堂開宴領佳賓白鷺青原景一新寄興江山擅名勝折衝樽俎靜風塵醪壓架垂垂老芍藥翻階楚楚春從此廬陵作佳話平分風月兩詩人

次王應求韻

逐日輪蹄走四方來來去去爲何忙無人肯問山林樂舉世爭趨名利場以道自脩身是寶無求何用智爲囊愛梅栽竹平生語吐出清風六月涼

郡圃寒食

與民同樂一開園佳節何曾禁得烟拍岸綠波浮舫艇翻空紅袖打鞦韆眼看花柳心如醺身在蓬瀛我亦仙明日徐翁墳上約欲求竹帚恐無緣

杜仲高相遇約李尉

適有此事見此
不覺絕倒

胸中無地着塵埃有我唯堪把酒杯
苦恨好山移不得生憎俗客去還來
秋風吹老東籬菊春信攬開北嶺梅
管領風光須我輩急吹短笛掉船回

題蕭宰十二詠堂三山兩水之亭

百載園林復故廬收功全在五車書
一翁二季蘇家樣三水兩山喻曲居
十二詠成傳不朽三千篇出又何如
年來事事如人意敢請先生賦遂初

陪虞使君登岳陽樓

片帆飛過洞庭來百尺巍巍水面開
疑泛靈槎上

河漢如從弱水到蓬萊釣天廣樂無聞矣
袖劍仙人安在哉物物盡隨波浪去
君山一點獨崔嵬

贈洞霄道士

高枕清流卧白雲靈龜骨相鶴精神
凡為九鍊山中客定是群仙數
內人馴虎岩前攀逸翠蚊亭下濯
征塵練師莫笑狂夫老乞我金丹養病身

閱世

一懶一愚兼一癡從教智士巧能為
坦途失脚溪山險暗室萌心天地知
江水長流無盡意夕陽雖

好不多時老夫閱遍人間事欲和寒山捨得詩
積鏹多金生怨尤一温飽外更何求自甘韜道陶
元亮不愛羸餘馬少游何取纍纍兼若若終成莫
莫與休休花前適意三杯酒萬事忘機對白鷗

少筭

吾生落落果何為世事紛紛無了期少筭人皆嘲
我拙多求我却笑人癡庭花密密踈踈蒞溪柳長
長短短枝萬事欲齊齊不得天機政在不齊時

南康六老堂

廬山脚下開亭館柰此千峯百嶂何逸少大書池
上墨少陵狂作醉時歌碧荷秋老香猶在好月夜
深明更多五老揖君天上笑把杯相對酌金波

韓張亭

唱黎謫宰臨武張御史宰連山二公相會于此亭

此地曾棲雙鳳凰登高懷古北風涼忠規萬乘龍
顏絜謫遇千山鳥道荒百里隣居天作合兩賢名
與日爭光幾人緘口貪官職身在朝廷志已忘

處世

風波境界立身難處世規模要放寬萬事盡從忙

裏錯一心須向靜中安路當平處經行穩人有常
情耐久看直到一作道始終無悔吝旁生枝葉便多端

送別朱蕪僉

恰喜相逢又語離愁於江上送君時清談未了風
吹斷白髮可憐天不知樗木自肥傷竹瘦海棠諭
放笑梅遲黃堂若問痴頑老新有登樓二十詩

題王制機新樓

綠雲圖上新輪奐彈壓江山氣勢豪手拍危欄拂
星斗目窮滄海見波濤人間何處望不到天下有

樓無此高俯視河陽桃李巷清風吹斷市塵囂

呈姚顯叔奉親送死極孝

鴈去多年缺寄音扁舟無復到山陰卧牛崗上經
過少下馬陵前感慨深細讀文公千字誄足知孝
子一生心無才為作招魂此自有悲風宰樹吟

題姚顯叔南嶼書院

朝夕置身書卷間紛華滿眼幾曾看山林不受塵
埃浥屋宇無多氣象寬立脚怕隨流俗轉留心學
到古人難漫山桃李爭春色輸與寒梅一點酸

寄朱仲是兼僉

光陰日夜催吾老已作鷄皮鶴髮翁萬事裝成百年夢五行注定一生窮殘花但有凋零分枯木難沾造化功若見黃堂頌寄語何如停我雪樓中

寄項宜甫兼簡韓右司

匆匆不暇去相違草吟成送別詩千里江山客行遠三秋風雨桂開逢安居但欲無公事舉枉終須有直時若見右司頌寄語世間公道要扶持

閱四家詩卷

翁原可弟沂叔孫季蕃高九萬

閱盡四家詩卷子自然優劣在其中石龜野鶴心相合菊朶花翁道不同鳴鳳翱翔上霄漢亂蟬蕭瑟度秋風一篇論盡諸家體憶着當年鞏瞻翁

謝吳秘丞作石屏集後序

說破當年舊石屏自慙無德又無能鄉來江海踈狂客今作山林老病僧高卧一樓成宇宙冷看獨影當賓朋惡詩有誤公題品不是夔州杜少陵

有感

老子生來世法踈白頭思欲把犁鋤摩挲此腹空

無物僥倖，虛名愧有餘。憔悴不堪漁父笑，寒溫無益貴人書。詩家幸有嚴華谷，襟誼猶能眷眷予。

湘中

一棹無情度碧湘，行行不脫水雲鄉。旗亭少飲村醪薄，田舍新炊晚稻香。簫鼓遠來朝嶽去，包籠爭出趁虛忙。塗人有愧黃居士，十載看經不下堂。

九日櫂洲舟中

幾年重九客他州，少泊櫂田古渡頭。人向飲中言我樂，誰知笑裏是吾愁。黃華可忍拋三徑，白髮猶

堪柰幾秋。今日登高無處所，一樽携上枕江樓。

曾景建得罪道州聽讀

聞說烏臺欲勘詩，此身幸不墮危機。少陵酒後輕嚴武，太白花前忤貴妃。遷客芬芳窮也達，故人評論是耶非。飽參一勺瀟溪水，帶取光風霽月歸。

朱行父留度歲

衡山之下湘江上，風月留連去較遲。四海弟兄多不遇，一門父子兩相知。梅邊竹外三盃酒，歲尾年頭幾局棋。馬旅宦游俱是客，細論心事共題詩。

梅花

瀟灑春葩縞壽陽百花惟有此花強月中分外精神出雪裏幾多風味長折向書窓疑是玉吟來齒頰亦生香年年茅舍江村畔勾引詩人賞品量

金陵游覽用劉子明韻

英雄割據已焉哉逝水滔滔去不回里巷難尋王謝宅江山空對鳳凰臺登臨無伴詩爲侶興廢不知梅自開同是游人不同樂青樓歌舞待君來

呈趙國令

翠雲屏嶂碧瑤池萬象前陳屬指揮彷彿神仙居處好尋常賓客到來柳荷花香裏渾無暑棊子聲中却有機別院笙歌促君去野夫自步月明歸

吉州堆勝樓謝景周司理居其上

半天輪奐獨崑峩遙望青原瞰碧螺納納乾坤森萬象重重洲渚繞層波詩情雅興江山合酒興偏於故舊多靴笏縛君難放浪樽前狂客自高歌

吳子似提幹九高亭小景

前日作詩題大槩亭前小景亦堪題綠楊樹下茅

三架白水田頭菜兩畦似酒新鷺初泛浦如孩黃
犢試牽犁十分野趣關心事到此令人憶剡溪

泉州紫極宮壽星殿古檜諸葛機宜同賦

浪說陳朝八檜碑何如此檜古而奇靈根據地高
千尺黛色浮空閱四時人欲棟梁勞想像樹存陵
谷有遷移壽星賜汝長生訣化作蒼龍守殿墀

都中次韻申季山

車馬喧臨十二門樂從閑處度朝昏詩書豈爲功
名重軒冕何如道誼尊志士不能行所學明君亦

或諱忠言世間事事如人意未必商山有絢園

蘄州上官節推同到浮光

馬蹄相逐到浮光客裏相寬對舉觴夜暖試鋪新
枕簟曉寒仍索舊衣裳櫻桃着雨便成齋柳絮隨
風如許狂連歲經行淮上路憂時贏得鬢毛蒼

蘄州呈雪蓬姚使君

白旗走報山前事昨日官軍破綠林千里人烟皆
接堵一春農事最關心不知郊外雨多少試探田
間水淺深翠玉樓中無限好可無閑暇一登臨

撫州節推蕭學易衙宇一新

掇取高科如拾芥愛君才調望君深莫誇書判君
蓮幕要把文章入禁林華屋修成官滿去好詩改
定客來吟西窓共對蕭蕭竹不負三杯話此心

汪見可教授約諸丈鳳山酌別

鳳凰洲上鳳凰山草草登臨見一斑不立樊墻天
廣大賸栽花竹地寬閑白雲四面峯千疊綠柳前
頭水一灣行色催人詩未就寄情庭院落花間

吉州李伯高會判送鹽蠟子魚比海味之珍

者未免爲鱸魚動歸興

每思鄉味必流涎一物何能到我前怒奮兩螯眸
炯炯飽吞三印腹便便形模突出鹽池底風味橫
生海邊合爲羣鱸動歸興久拋東浦釣魚船

癸巳端午呈李伯高

客裏幾逢端午節看成雪鬢與霜髯救人未得三
年艾背世翻成六日蟾老境可憐歸未得羈懷長
是病相蒸猛思一醉酬風月笑撚菖花揭酒帘

李深道得蘇養直所爲深字韻一首不知題

何處景倂跋其後

唐人詩云欲向愁烟問故
恐愁烟推白鳥

都來五十有六字寫出山林無限奇當日所題何

處景祇今但見後湖詩一言一語堪傳世某水某

丘仍屬誰試向愁烟推白鳥無情白鳥又何知

石屏久遊湖海祖妣遂題二句於壁云機番

白苧和愁織門掩黃花帶恨吟後石屏歸祖

妣已亡矣續成一律

伊昔天邊望藁砧天邊魚鴈幾浮沉機番白苧和

愁織門掩黃花帶恨吟自古詩人皆浪跡誰知賢

婦有關心歸來却抱雙雛哭碑刻雖深恨更深

絕句

臘梅二首

天寒好風日清香透窓紗誰知早脾底有此返竟

花

籬前抱香死化入歲寒枝依然色尚黃雪中開更

奇

汀州道上

字內何牢落客行雙鬢華千山萬山底老眼付梅

祀

題周仁甫占香堂三首

一登君子堂滿目是秋光桂是月中桂花非今日

香
秋風動窓戶兼聞書傳香種花兼種德當有折桂
郎

寄興代作

長願如人意一生無別離妾當年少日花似半開
時

黃金無足色白璧有微瑕求人不求備妾願老君
家

贈萬杉老秀凝翁二首

識得慶雲和尚不癡自號癡翁此老端如五老高
出廬阜諸峯

讀儒書五千卷通禪門八萬條冥坐萬杉林下四
旁風雨蕭蕭

江村晚眺二首

數點歸鴉過別村隔灘漁笛遠相聞菰蒲斷岸潮

痕濕日落空江生白雲

江頭落日照平沙潮退漁舸閣岸斜白鳥一雙臨
水立見人驚起入蘆花

見山居可喜

一溪盤曲到堦除四面青山畫不如脩竹罩門掩
夾路詩人居處野人居

初夏

紅紫光陰不久長一聲啼鴉靜年芳陰陰綠樹黃
鷓語將與人間作夏涼

桂

金谷園林知幾家競栽桃李作春華無人得似天
工巧明月中間種桂花

江陰浮遠堂

橫岡下瞰大江流浮遠堂前萬里愁最苦無山遮
望眼淮南極目盡神州

淮村兵後

小枕無主自開花烟草茫茫帶曉鴉幾處敗垣圍
故井鄉來一一是人家

時貽北望

北望茫茫渺渺間，鳥飛不盡又飛還。
難禁滿日中原淚，莫上都梁第一山。

訪友人家即事

爛茅遮屋竹為床，口誦時文鬢已霜。
妻病無錢供藥物，自尋野草試單方。

晚春

池塘渴雨蛙聲少，庭院無人燕語長。
午枕不成春草夢，落花風靜煮茶香。

揚州端午呈趙帥

榴花角黍鬪時新，今日誰家不酒樽。
堪笑江湖阻風客，却隨蒿艾上朱門。

次韻郭子秀曉行

脫葉園林帶曉鴉，馬蹄步步踏霜華。
山邊水際頻凝顧，怕有寒梅昨夜花。

山村

山崦誰家綠樹中，短窗半露石榴紅。
蕭然門巷無人到，三兩烏鴉隨白髮翁。

萬竹梢頭雪氣生西風吹雨又吹晴題詩未了下山去一路吟聲雜水聲

題吳熙仲雲萍錄

家在蓬萊海上居出身履歷一時無姓名羞上雲萍錄本是烟波一釣徒

湘中遇翁靈舒

天台山與馬山鄰只隔中間一片雲一片雲邊不相識三千里外却逢君

客中秋晚

榴花纔放客辭家客裏因循見菊花獨坐西樓對風雨天寒猶自著輕紗

都中冬日

脫却鷄裘付酒家忍寒圖得醉京華一冬天氣如春暖昨日街頭賣杏花

寒作貧

湖上

湖上團團三十里若非揚柳即樓臺城門未鎖黃昏月更住旗亭把一杯

冬至

時光流轉

世故驚心感慨多一歲休祥在

雲氣今朝雲氣未如何

釣臺

萬事無心一釣竿三公不換此江山平生誤識劉
文叔惹起虛名滿世間

端午豐宅之提舉送酒

海榴花上雨蕭蕭自切喜蒲桃酒醪今日獨醒無
用處為公痛飲讀離騷

同蘄州上官節推登光州增勝樓

增勝樓中共倚欄平原渺渺接青山夕陽明處入
烟少胡馬曾來闖五關

次韻梅花

百花香遍莫如梅更向群芳缺際開寒冷怕行門
外路為渠踏雪過山來

餘醪

東風滿架索春饒三月梁園雪未消賸護何人炷
蘭麝柔枝無帶瓊瑤

次韻

正字野興

芋圃蔬畦

茅簷四面擁籬園門前盡日無

人過牛渡橫野鴨飛

題黃州謝深道國正山庵

就荒山竹重抽筍新種池荷晚著花意象全然似
村落又添茅屋兩三家

題鄭子壽野趣

菜花園圃槿花籬麥滿前坡水滿池野老橫竿攔
鴈過牧兒携笛倚牛吹

山中見梅

踏破溪邊一徑苔好山好竹少人來有梅花處惜
無酒三嗅清香當一杯

湘西寺觀瀾軒

東岸樓臺西岸山瀟湘一片在中間紅塵不到滄
波上僧與白雲相共閑

道鄉臺

萬里南遷直諫臣世間無地可容身夜衝風雨過
湘水賴有青竹作主人

定

長沙耒耜

築此崔嵬寄遠觀客子登臺千

載後倚欄亦曾望長安

陶侃栢

四絕堂前枯栢樹晉人栽植宋人吟無枝無葉無
吟處聊寓一時懷古心

東池蕪叔倫隱居之地

來尋吾祖隱居處嫺嫺春風吹酒旗手把梅花寄
愁絕東池只是舊東池

寧鄉道上遇張伯聲

山禽調舌待春弄江雨收聲閑撓晴偶遇故人同
杖屨梅花樹下一詩成

初夏游張園

乳鴨池塘水淺深熟梅天氣半陰晴東園載酒西
園醉摘盡枇杷一樹金

鄂渚解纜

日日言歸不得歸今朝真箇是歸期西樓烟水南
樓月別後何更有詩

別

久不相
日相從未久又分襟扁舟自逐便
風去却恨無江水深

船過桐江懷郭聖與

只言君在桐江住及到桐江不見君日暮空山獨
惆悵不知又隔幾重雲

買歸舟篙子請占牌戲成口號

詐稱官職不如休白板無題又可羞只寫江湖散
人號不然書作醉鄉侯

書事

打鼓行船未有期恰如江上阻風時詩中一段閑
公事幸不妨人喫荔枝

綠陰亭自唐時有之到今五百年盧肇二三
公題詩之後吟聲寂寂久矣亭前古木不存
綠陰之名殆成虛設今詩人李賈友山作尉于此
實居此亭公事之暇與江山風景應接境內
人勝見於吟筆多矣友人石屏戴復古訪之
相與周旋亭上題四絕句以記曾來

五百年前

亭前古木綠陰清而今古木無

存者賴在

舊名

惻惻秋風吹少，有唐人遺跡。宋人吟浮雲，世事多遷變。不獨此亭無綠陰。

遠山橫碧，一溪清白。鳥飛邊，落照明吏散。庭塔一無事，綠陰亭上。又詩成遠作千。

政是國家多事秋，渝川縣尉亦風流。吟詩不廢公家事，坐使孟郊輸一籌。

次韻谷口鄭東子見寄

閉門覓句飯牛翁，囊有新詩不怕窮。十里梅花生

眼底，九峯山色滿胸中。

不管家居四壁空，琢成佳句有神工。謫仙會有金鑿，召莫道詩人命不通。

相看俱作白頭翁，出處規模自不同。我走江湖作狂夢，君能面壁課成功。

一生飄泊客途中，扶杖從人類百工。白首歸來入詩社，猶思渭北與江東。

吾鄉自昔詩，少委羽先生。後有翁坐客，無擅君

莫笑雲其

象風 鄭谷有雲臺集

自笑詩人

君能不飲任樽空勸君莫倚醒

醒眼却笑傍

白面紅

寄後村劉潛夫

朝廷不召李功甫翰苑不着劉潛夫天下文章無
用處奎星夜夜照江湖
擁節持麾澤在民仰看臺閣笑無入劉蕢一策傳
千古何假君王賜出身
客游仙里見君時擁絮庵中共說詩別後故人知
我否年幾八十病支離

中秋李漕冰壺燕集

把酒水壺接勝游今年喜不負中秋故人心似中
秋月肯爲狂夫照白頭

登樓絕句和者甚多又從而用韻擇其可錄
者錄之

勞生百計不如閑合把人間比夢間天與老夫供
享用一樓風月兩屏山有前屏後屏

心地清涼日

只怕沾塵土莫低頭置身不在衆

人下處

尺樓

小樓題

一段風流在水西白鳥飛來知

鄉背青山元有高低

富貴於人造物慳出門又覺世途艱樓頭適意三
杯酒未末清風雨後山

寄上趙南仲樞密

貴爲公相不如歸一夕飄然去不知樂在五湖風
月底扁舟載酒對西施
能爲明哲保身謀富貴功名總罷休早向急流中
勇退歸來閑伴赤松游

初夏

等閑過了一年春雨後風光夏景新試把櫻桃薦
杯酒欲將芍藥贈何人

覓芍藥代簡豈潛

照映亭池芍藥春紅紅白白聞精神與其雨打風
吹去爭似慇懃折贈人

趙芾江與東嘉詩社諸君游一日携吟卷見
過一
其來

白首無

一心唯覓死頭顱時人誤作梅

花看今

也無

得早

不携訪酒家

旗亭沽酒少裴回左手梅花右手杯眼見枝頭開
數蓋春風自我掌中來

巾子山翠微閣

雙峯直上與天參僧共白雲棲一庵今古詩人吟
不盡好山無數在江南

贈饒叔虎談易論命多奇中

中年多病早衰翁詩不能工枉受窮郊島五行君

識否要知我命與渠同

招山乃詩人劉叔擬故居朱清之得其地清
之赴南官中道而返就招山下築不久亦去
世

半路袖回攀桂手一生才遂買山心要知此老風
流處來向劉郎吟處吟

有錢可買滄浪景無術能還夢幻身一段江山寄
愁絕百年人

詩人

胡句

子夫被召乃丐歸

浪說歸書

新居萬柳百花傍何如表奏明

光殿乞取書

醉鄉

軒冕難遮兩鬢華官居雖好不如家一心懶上朝天馬要趁春風歸種花

清明感傷

客中今日最傷心意着家山松樹林白石岡頭聞杜宇對他人墓亦沾巾

次韻李伯高

蓮幕高吟冰雪篇天才秀發思華年千金買得驚

人句落在鷄林渡海船

徽市勝業寺悅亭

尋幽攬勝老猶勤但覺吟身瘦幾分淨洗一生塵上眼細看七十二風雲

訪舊

欲尋西舍問東隣兩巷都非舊住人唯有桑邊石池在依然春水碧粼粼

代簡

有父

六七十

百書不如一會面之子相期十

日間事

私見

寄劉

在康康作制幹唐人詩芳譽香各滿數市

八斗文章用不餘數車聲譽滿江湖今年好獻南郊賦幕府文章有暇無

周子益年八十赴殿

所居勝曰漁村

七尺漁竿八十翁釣絲輕裹荻花風功名未遂英雄老人道磻溪即箇中
拋却漁村老釣竿手遮西日上長安青衫着了尋歸路莫過羊裘七里灘

觀捕黃雀

披綿爭豕晚禾秋決起森然網扼喉一飽等閑輸性命知機萬不及沙鷗

九日

醉來風帽半欹斜幾度他鄉對菊花最苦酒徒星散後見兒女倍思家

雪中觀鄭子壽畏寒不到

孤負溪橋

母怕寒不肯出門來欲邀鄭老同

清賞

小開

蕙

及燭醉梅花

古甌斜插
此即君家勸酒人移取堂前雙
蠟燭花邊照出玉精神

東湖看花呈宋原父

團團堤路行無極一林一步楊柳碧佳人反覆看
荷花自恨髮邊簪不得

贛州上清道院呈趙雪蓬

短牆不礙遠山青無事燒香讀道經時把一杯非
好飲客懷宜醉不宜醒

無題

憶聞春燕語雕梁又聽秋鴻叫斷腸一縷沉烟飛
不過兩樓相對立斜陽

到西昌呈宋愿父伯仲黃子魯諸丈

一秋無便寄平安新鴈聲聲報早寒昨夜檢衣開
故篋去年家信把來看

扁舟幾度到西昌東望家山道路長醉裏不知身
是客故人亦吾鄉

山中

不借擔頭

梅花

莫惜頻到酒家行李蕭然還

嚴儀卿李友山高與權酌別

江天慘澹日淒涼木未經霜葉未黃今日樓頭一杯酒明朝行客在誰鄉

李敷文酌別席上口占

客子明朝早問程樽前今夜苦爲情使君亦恐傷離別不使佳人唱渭城苦一作若

李友山索詩卷汀州急逋到昭武

清時無事更年豐兩地風光詩詠中可是山前無警報旗鈴千里逋詩筒

題牛圖

牡丹花下連宵醉今日閑看黑牡丹得此躬耕東海曲一貧無慮百憂寬

既別諸故舊獨黃希聲往曲江稟議未回不及語離

別盡諸君

客愁多似海南雲一聲何處離

群鴉那

何處聞

老年情

入教去思君重黯然聞道歸來有

消息江頭

入船

林伯仁別二絕

別酒三杯醉不知梅花嶺外故人稀
片心暗逐白雲去日日向君行處飛
茉莉花邊把酒危
桃柳樹下共談詩
醉來一枕西窗下
酒醒方知有別離

題陳景明梅廬

手栽梅核待成林
慈母當年屬望深
梅未成林人

已往空酸孝子一生心

思親如海渺無涯
觀物驚心感歲華
誰見詩人心苦處
年年揮淚看梅花

題蔡中卿青在堂二首

蕭蕭洒洒屋三間
日日開門見好山
但使青青長在眼
一毫塵俗莫相干

幾人富貴下
閑夜運牙籌
日跨鞍後後
一生忙裏過不知

青山

劉

秋光

比尋常巖桂花天與劉卽作

嘉瑞枝枝

丹砂

寄玉溪 逢吉六首 癸卯春

經年不見玉溪翁
百里江山萬里同
無計相從話
心曲時揮一紙寄西風

問君那向城中住
賴有清風濯市塵
門外數根楊柳樹
細看別作一家春

心腹相知會面稀
一春未有盍簪期
西窓風雨愁眠夜
夢到君家賦小詩

陋巷深深屋數椽
以文爲業硯爲田
一觴一飯常留客
知是君家內子賢

老夫特作白頭吟
爨下焦桐孰賞音
敢望荆溪作詩跋
自慚樊帚享千金

王達不能憐賈島
吟邊懷抱向誰開
扶病欲迎新太守
不知千騎幾時來

重陽

茱萸半紫 時節催人日夜忙
便使老夫年

滿百

陽

身

紀

東海邊來

長亭三百路三千飄零到此成

何事結得梅

一笑緣

淮南得道嶺南行嶺上回頭作麼生傳得祖師心
印了鉢盂何必與人爭

鑿破青山兩壁開石頭路上踏成埃梅花自與白

雲笑幾見夷齊出嶺來

南遷過嶺面無慙前有東坡後澹庵兒輩欲知當

日事青山解語水能談

戲題詩藁

冷澹篇章遇賞難杜陵清瘦孟郊寒黃金作紙珠
排字未必時人不喜看

昭武太守王子文日與李賈嚴羽共觀前輩
一兩家詩及晚唐詩因有論詩十絕子文見
之謂無甚高論亦可作詩家小學須知

文章隨世作昂變盡風騷到晚唐舉世吟哦推

李杜時人

陳黃

古今均

此諸公十倍過時小文章供

卷下

六百五十五

戲語

夕

曾向吟邊

詩家氣象貴雄渾
雕鋸太過傷

於巧朴拙性

怕近村

意匠如神變化生
筆端有力任從橫
須教自我胸中出
切忌隨人腳後行

陶寫性情爲我事
留連光景等兒嬉
錦囊言語雖奇絕
不是人間有用詩

飄零憂國杜陵老
感寓傷時陳子昂
近日不聞秋鶴唳
亂蟬無數噪斜陽

欲參詩律似參禪
妙趣不由文字傳
箇裏稍關心有悞
發爲言句自超然

詩本無形在窈冥
網羅天地運吟情
有時忽得驚人句
費盡心機做不成

作詩不與作文比
以韻成章怕韻虛
押得韻來如砥柱
動移不得見工夫

草就篇章口
閑作詩容易改詩難
玉經雕琢方成器
句要

詞

要安

望江南

壺山宋謝父寄新刊雅詞內有壺山好三十闕自說平生傑謂猶有說未盡處為續四曲

壺山好博古又通今結屋三間藏萬卷揮毫一字
直千金四海有知音 門外路咫尺是湖陰萬柳
提邊行處樂百花洲上醉時吟不負一生心
壺山好胆氣不妨麤手奮空拳成活計眼穿故紙
下工夫處世未全疎 生涯事近日果何如背錦
奚奴能檢點畫眉老婦出交租且喜有贏餘
壺山好文字滿胸中詩律變成長慶體歌詞綽有

稼軒風最會說窮通

中年後雖老未成翁兒大

相傳書種在客來不放酒樽空相對醉顏紅

壺山好也解憶狂夫轉手便成千里別經年不寄

一行書渾似不相踈 催歸曲一唱一愁予有劍

賣來酤酒喫無錢歸去買山居一向作狂徒壺山有催

歸曲贈僕甚妙

僕既為宋壺山說其自說未盡處壺山必

有答語僕自朝三解

石屏老家住海東雲本是尋常田舍子如何呼喚

作詩人無益費精神 千首富不救一生貧賈島
形模元自瘦杜陵言語不妨村誰解學西崑
石屏老長憶少年遊自謂虎頭須食肉誰知猿臂
不封侯身世一虛舟 平生說事著也堪羞四海
九州雙脚底千愁萬恨兩眉頭白髮早歸休
石屏老悔不住山林注定一生知有命老來萬事
付無心巧語不如瘡 貧亦樂莫負好光陰但願
有頭生白髮何愁無地覓黃金遇酒且須斟

錦帳春

淮東陳提舉清明奉母夫人游徐仙翁庵

處處逢花家家插柳政寒食清明時候奉板輿行
樂使星隨後人間稀有 出郭尋仙綉衣春晝馬
上列兩行紅袖對韶華一笑勸國夫酒百千長壽

醉落魄

九日吳勝之運使黃鶴山登高

龍山行樂何如今日登黃鶴風光政要人酬酢欲
賦歸來莫是淵明錯 江山登覽長如昨飛鴻影

裏秋光薄祗有黃花覺
牢裹烏紗一任西風作

柳梢青 岳陽樓

袖劍飛吟洞庭青草
秋水深深萬頃波
光岳陽樓上一快披襟
不須携酒登臨
問有酒何人共斟
變盡人間君山一點
自古如今

行香子

未州爲魏深甫壽

萬石崔嵬二水漣漪
此江山天下之奇
太平氣象百姓熙熙
有文章公經綸手把州麾
滿斟壽酒笑撚梅枝
管年年長見花時
佳人休唱淺近歌詞

讀潘漢頌愚谷記澹岩詩

木蘭花慢

鶯啼啼不盡任燕語語難通
這一點閑愁十年不斷
惱亂春風重來
故人不見但依然楊柳小樓東
記得同粉壁而今壁破無蹤
蘭皋新漲綠溶溶
流恨落花紅
念著破春衫
當時送別燈下裁縫
相思謾然自苦
算雲烟過眼
總成空
落日楚天無際
凭欄目送飛鴻

鷓鴣天

題趙次山魚樂堂

圍圍洋洋各自由或行或舞或沉浮觀魚未必知
魚樂政恐清波照白頭 休結網莫垂釣機心一
露便魚愁終知不是池中物掉尾江湖汗漫游

浣溪沙

病起無聊倚綉床玉容清瘦懶梳粧水沉烟冷橘
花香 說箇話兒方有味喫些酒子又何妨一聲
啼鴉斷人腸

臨江仙代作

誤入風塵門戶駟來花月樓臺擗前幾度得徘徊

可憐容易別不見牡丹開 莫恨銀瓶酒盡但將
妾淚添杯江頭恰恨北風回再三相祝去千萬寄
書來

祝英臺 近別李嶽之諸丈

泛杭州臨塵水幾日共游戲歌笑開懷酒醒又還
醉柰何一旦分携連宵風雨剪不斷客愁千里
水雲際遙望一片飛鴻言是失群地滿眼春風管
甚閑桃李此行歸老家山相逢難又但一恁相思
而已

鵝橋仙

周子俊過南

昌問訊宋吉甫黃存之

兄弟

兄弟

兄弟

兄弟

兄弟

西山岩壑東湖亭館盡是經行舊路別時相見有
荷花還又見梅花歲暮 宋家兄弟黃家兄弟一
一煩君傳語相忘不寄一行書元自有不相忘處

又

新荷池沼綠槐庭院簷前雨聲初斷喧喧兩部亂
蛙鳴怎得似啼鶯睨睨 風光流轉客游汗漫莫
問髮絲長短醒時杯酒醉時歌筵省得閑愁一半
大江西上曲寄李實夫提刑時郊後而相記

乞歸

大江西上鬱孤臺八境人間圖畫地湧千峯搖翠
浪雨添玉虹如瀉彈壓江山品題風月四海今王
謝風流人物如公一世推也 一片憂國丹心彈
絲吹笛未必能陶寫西北風塵方瀕洞宰相閑歸
綠野月斧爭鳥風斤運巧不用修亭榭紫樞黃閣
要公整頓

減字木蘭花 寄欽州劉叔治史君

羊城舊路檀板一聲驚為客去不擬重來白髮飄飄

上越臺 故人居處曲巷深深通竹所問訊桃花
欲訪劉郎不在家

又寄五羊鍾子洪

天台狂客醉裏不知秋髮白應接風光憶在江亭
醉幾場 吳姬勸酒唱得廉頗能飯否西雨東晴
人道無情又有情

又

胆風中酒流落江湖成白首歷盡艱關贏得虛名
滿世間 浩然歸去憶著石屏茅屋趣想見山村

樹有交柯續有孫

清平樂 興因呈司直

今朝欲去忽有留人處說與江頭揚柳樹繫我扁
舟且住 十分酒興詩腸難禁冷落秋光借取春
風一笑狂夫到酒猶狂

又嘲人

醉狂痴作誤信青樓約酒醒梅花吹盡角翻得一
場寂寞 相如謾賦凌雲琴臺不遇文君江上琵琶
舊曲只堪分付商人

詩

醉太平

長亭短亭春風酒醒無端惹起離情有黃鸝數聲
芙蓉綉茵江上畫屏夢中昨夜分明悔先行一
程

沁園春自述

一曲狂歌有百餘言說盡平生費十年燈火讀書讀史四方奔走求利求名蹭蹬歸來閉門
獨坐贏得窮吟病句

石屏詩集卷下終